




Poulenger




John Carter Brown
Library
Brown University

773

75





TRAICTE
DE LA SPHERE
DV MONDE.

Diuisé en Quatre Liures, ausquels est
adiousté le Cinquiesme de
l'vsage d'icelle.


*Par le Sieur BOVLENGER, Lecteur
ordinaire du Roy.*

Seconde Edition, reueuë, corrigée, &
augmentée par l'Autheur.



A PARIS,
Chez IEAN MOREAU, rue saint
Iacques, au Globe Celeste.

M. DC. XXVIII.
Avec Priuilege du Roy.





A TRES-HAVT

ET TRES-PVISSANT PRINCE,
MONSEIGNEVR LOVYS DE BOVRBON,
Comte de Soissons, &c. Prince du
Sang, Pair & Grand Maistre de
France, Gouverneur & Lieutenant
pour le Roy en Dauphiné.



ONSEIGNEVR,

*Vn des contentemens qu'a-
uoit ce grand Roy Salomon, à ce qu'il en
escriit luy-mesme, estoit de ce que Dieu luy
auoit donne la cognoissance de la constitu-
tion du monde, de la vertu des Elemens, de
la vicissitude des solstices, de la mutation
des saisons, du circuit des ans, de la situa-*

tion des astres. Aussi ces sciences-là estoient elles sortables, & du gibier d'un esprit releué, qui pour lors n'estoit porté qu'au bien, & qui par vne sainte inspiration, n'auoit requis de Dieu par sa priere autre chose que la sagesse, n'ignorant pas que tous les biens & félicitiez du monde, ont de coustume d'accompagner vn sage Prince & vertueux. Et de fait, quel plus grand contentement peut re. ceuoir personne, que d'auoir acquis avec si peu de peine tant de sciences comme il fait? de sçauoir la propriété & vertu de tant de choses naturelles, comme on tient qu'il a sceu? de cognoistre les causes & origines de tant de mouuemens qui se font aux Cieux? A la verité, ie n'estime pas qu'il y ayt plaisir egal à celuy-là. Car encores qu'il y ayt vne infinité d'occupations honnestes, quantité d'exercices auxquels les hommes sont diuersement portez, selon les passions diuerses qui plus viuement les touchent: Il ne s'en trouuera toutesfois aucune, qui puisse aller du pair avec la scien.

EPISTRE.

3

ce de l'univers. Car soit que l'on y considère la matiere, il n'y en a point de si noble, ny de si grande estenduë: Si on a esgard à la forme, ou à la fin, qu'y peut il auoir de plus excellent & parfait que le Theatre du monde, qui par son admirable structure & fabrique, a incité l'homme à considerer la souveraine Majesté & gloire de ce grand Architecte? Car c'est sans aucune doute, que Dieu a voulu que ces Astres, & ces diuers mouuemens des Cieux nous seruissent de guide, pour nous conduire à la cognoissance d'une Diuinité, comme s'y trouuant vn tel ordre & disposition, où les vestiges d'une puissance immense s'y peuuent aysement recognoistre. Qui fait que i'admire dauantage vne infinité de personnes, qui suiuant à la trace les sentimens des Epicuriens, negligent avec eux la theorie de ces mouuemens comme inutiles, & à l'imitation de ces Cyclopes d'Homere, ne se soucient, ny de quelle part le Soleil se leue, ny en quel endroit il se couche. Mais comme

telle sorte de gens, ont esté de tout temps en abomination & mespris : Aussi les plus sages & aulsez, ont ils tenu fort peu de compte de toutes leurs opinions, ceste doctrine celeste estant si vtile & necessaire à la vie humaine, que difficilement s'en peut-on passer, attendu les commoditez notables que l'on en tire, le contentement quel'on en re- goit, & que tous les iours on recognoist, que toutes les autres sciences, sont man- ques & imparfaites sans la cognoissance d'icelle. C'est, MONSEIGNEUR, ce que ie desire de deduire icy, non pas pour vostre esgard, qui suis assure de l'affection singuliere, que vous auez tousiours portée à tous exercices honnestes & curieux : mais pour arracher, s'il est possible, ceste mau- uaise creance, qui possede la phantasie d'une bonne partie des hommes, par laquelle ils s'imaginent qu'il n'y a que les esprits le- gers qui s'enuolent là-haut, pour s'occuper à la contemplation des mouuemens celestes. Et partant, pour faire succinctement quel-

EPISTRE,

7

que recit des principales utilitez. Qui est
celuy qui en premier lieu n'estime la santé
pour vn des beaux presens que nature nous
fasse ? pour la conseruation de laquelle, s'il
est utile d'estre commodement & sainement
logé. N'a-ce pas esté l'Astronomie qui a
monstré comment cela se pouuoit faire ?
ayant enseigné à l'Architecte la maniere de
discerner les quatre parties du monde, pour
faire eslection de la plus saine qui soit en la
contree, & cognoistre de quelles parties du
Ciel soufflent les vens plus dangereux, pour
n'y donner les ouuertures aux maisons par-
ticulieres, ny aux villes libre chemin le long
des ruës ? Combien y en a-t'il eu, qui pour
n'auoir pris garde assez pres à ceste obser-
uation, comme l'affaire le requeroit, ont
esté contraincts d'aller chercher giste ailleurs,
pour se trouuer en leurs maisons sujets à vne
infinité de maladies ? On ne scauroit ayse-
ment supputer, quelles sont les commoditez
que l'on tire iournellement de la nauigation,
au trafic de laquelle quantité de peuples, re-

cognoissent vn notable accroissement de leur puissance, ausquels si vous demandez à qui ils ont l'obligation de tant de biens & de richesses qui possèdent? ils respondront franchement que c'est à l'Astronomie, qui guide & regit maintenant si bien leurs pilotes, qu'ils ne s'egarent en aucune sorte dans la vastité de l'Ocean. Car c'est vne chose vraye & admirable, qu'il est maintenant plus commode de voyager sur la mer, que sur la terre, & que l'on peut plus facilement arriuer en vn port desiré, en prenant l'aduis des Astres & d'une petite buffole, que si on prenoit langue des hommes, pour sçauoir par terre quel chemin il faut suivre. Qui ne s'estonnera de l'inuention subtile des Anciens, qui considerans que l'annee civile, de laquelle ils se seruoient, estoit inutile pour determiner le temps des semences & des moissons, ont esté chercher, par maniere de dire, vn Almanach dedans les Cieux, & distingué les quatre saisons de l'annee par le leuer & coucher des estoilles. Et ja-

EPISTRE.

5

Soit que ceste partie ne soit pas maintenant si necessaire qu'elle a autresfois esté, si profite-elle beaucoup encore, pour bien entendre ce qu'en ont escrit de ce sujet les Poëtes, Historiens, & Autheurs de l'Agriculture. Touchant la Medecine, c'est vn art qui est si estroitement lié avec l'Astronomie, que sans elle il seroit impossible au Medecin de iuger de l'ysuë des maladies, il ne pourroit discerner les iours critiques, ausquels il se fait vn combat de la maladie & de la nature, il ignoreroit les causes pourquoy par fois ces crises auancent, par fois retardent, selon que la Lune s'accroist de nombre & de lumiere. Que diray-je maintenant de l'Histoire, qui est vne cognoissance si necessaire à toutes personnes, & principalement à ceux qui sont en quelque consideration dans les Republiques: n'a t'elle pas esté corrigee & redressée de nostre siecle, par les obseruations des apparences celestes? En laquelle s'il y auoit de la confusion, la vie de l'homme seroit en perpetuelles tenebres,

on seroit en doute, sous quel regne, sous quelle domination, les plus belles actions ont esté excecutees; & telle decision semble estre de consequence, qui est estimée de nul poids, quand on a esgard au temps. Quand est de la Theologie, il est besoin que ceste Princesse des sciences, ayt souuent recours à l'Astronomie, pour se pouuoir desmesler des difficultez qui se rencontrent dans les Escritures saintes. Car sans son ayde: Comment vn Theologien expliqueroit-il l'eclipse du Soleil qui arriva le Vendredy saint en la mort de Iesus-Christ? comment enseignera-il au peuple que ce fut vn miracle, vn dereglement de la nature, de ce qu'elle se fit en pleine Lune contre l'ordinaire? Ne demeurera-il pas court à l'exposition de l'estoille des Mages, s'il ne sçayt que c'est que des cometes & de leurs mouuemens? S'il ignore qu'il y a diuers principes de iours aux cercles immobiles, comment donnera-il à entendre à ses auditeurs, qu'en mesme iour naturel, Iesus-Christ fit la vraye Pas-

que & la Typique? Afin que ie ne die rien de la diuersité des heures inegales, pour concilier les repugnances qui se trouuent dans l'Euangile. Que si à toutes ces vrilitez si manifestes, i'adionste encore l'vsage de ceste partie, qui discourt des effects des Astres en la mixtion des Elemens, diuersité des temperammens, alteration des humeurs, & par consequent des mœurs, d'où s'en ensuiuent tant de confusions aux affaires du monde: qui sera celuy qui n'aduoüera que l'on en peut tirer vn grand profit, pour bien regir aussi les estats & republiques? N'est-ce pas vne chose profitable, de cognoistre sa propre inclination, & celle des autres, pour ayder par art & industrie, les bonnes impetuosittez que nous receuons de l'influence des Astres, & reprimer les vicieuses? D'auantage, il y a des tempestes fatales, qui arriuent souuent dedans les Royaumes, qui peuuent estre euitées par l'aduertissement que ceste science nous en donne. Ioinct à ce, que souuent les mauuais destins sont chan-

gez en mieux par les bons conseils. C'est pourquoy l'Empereur Adrian dressoit tous les ans, luy-mesme, la reuolution de son regne, pour considerer s'il n'y auoit point quelques mauuais aspect, qui semblaissent menacer son gouuernement de desordres & de confusions. Encore que ie sçache bien, qu'il y a vne autre cause que les secondes, qui fait rouler les infortunes & malheurs sur la teste des hommes. Mais cependant, il est tousiours bon de preuoir ces calamitez futures, pour auoir recours à Dieu & à sa misericorde, & le prier qu'il detourne les orages desquels vn pauvre estat est souuent menacé. Car il n'y a rien plus certain, que les Royaumes & Empires, ne sont pas pour tousiours subsister, qu'ils ont leur establissement, leurs limites, leur estenduë, leur duree, leur declin, & l'impetuosité des gouuerneurs qui est fatale, non fortuite; & en vn mot, qu'ils ont leur annee climacterique, aussi bien que les hommes. Sçache, disoit Cræsus à Cyrus, qu'il

Il y a vn certain cercle des choses humaines, qui ne permet pas qu'un mesme estat puisse tousiours fleurir. On estimera, MONSIEUR, ce que ie dis icy estre vanité, n'estoit que l'on a remarqué, que les plus grands changemens qui se sont faits aux Empires, touchant leurs grandeurs, puissances, loix, Religions, ou police Ecclesiastique, se sont rencontrez au temps des grandes conionctions celestes. Durant que Saturne & Iupiter estoient au signe du Scorpion, les Arabes publièrent la doctrine de Mahomet, & se rebellerent contre les Empereurs. La mesme conionction s'estant trouuee au mesme signe, l'an mil quatre cens soixante & quatre, Zadamac Roy des Tartares, fut chassé par les siens: & Henry cinquiesme, Roy d'Angleterre, decapité par vn de ses suiers. Quand elle arriva au Sagittaire, toute la Palestine fut saccagée, la ville de Hierusalem rasée, & mise entierement à feu & à sang. Et quelques uenx cens quarante ans apres, quand

ces *Astres* se trouuerent au *Capricorne*, il y eut des changemens si notables dans l'*Empire*, que *Constantin le Grand*, apres auoir osté la vie à quatre *Empereurs*, arracha en fin du milieu de ces peuples la superstition *Payenne*. Enuiron l'année quatre cens vingt, quand ces planètes superieures s'assemblerent au *Verseau*, les *Goths*, *Ostrogoths*, & les *Hongres*, ne se deborderent-ils pas pour enuahir l'*Empire Romain*? Et pour dire quelque chose, qui approche plus près de nostre siècle, quand ces estoilles se trouuerent au signe des *Poissons*, tous les *Princes de l'Europe* se liguerent contre le *Roy de France*, durant lequel temps il fut pris en bataille, & l'*Isle de Rhodes* rauagée par les *Turcs*. Quels maux se sont ensuiuus encores, depuis l'année soixante & quatre, lors que *Saturne*, *Iupiter*, & *Mars*, se trouuerent de compagnie au signe du *Lion*? Ce seroit chose odieuse, de repasser la main par dessus ces cicatrices, attendu que les *Histoires* de ce temps-là sont toutes

pleines & regorgent de calamitez publiques. C'est pourquoy les plus grands personnages, n'ont iamais mesprisé la cognoissance de ces mouuemens celestes, tant pour l'honneste curiosité qu'ils ont eu, de sçauoir quel estoit le bastiment de cét vniuers, que pource qu'ils ont estimé que ceste contemplation estoit necessaire aussi à la conduite des affaires du monde. On dit que Charlemagne y estoit si sçauant, que luy-mesme auoit composé des Ephemerides. Et si on croit ceux qui ont escrit la vie de Charles Quint, cét Empereur affectionna ceste science de telle sorte, qu'aussi tost que ses affaires d'importance luy donnoient du loisir de respirer, il se faisoit incontinent apporter ses liures, & ses instrumens Mathematiques, qu'il appelloit ses passe-temps ordinaires. Cesar mesme, à ce que nous lisons dans Lucain, n'a-il pas tousiours pris vn singulier plaisir à obseruer le mouuement des Astres? Et non sans cause: Car ces grands Capitaines qui faisoient estat de l'art militaire, sçauoient

fort bien qu'aux occurrences ceste science y
estoit aussi utile. Hannibal fit bien sentir
aux Romains, & leur apprit bien, à leur
dommage, à la bataille de Cannes, combien
l'Astronomie estoit utile en guerre, quand
ayant observé le vent & le Soleil, qui dans
peu d'heure s'alloient joindre ensemble, prit
occasion de combattre si à propos, que pre-
nant le dessus du vent, en mesme temps, à
ce que dit Florus, il fit que le Ciel, la terre,
le iour; & toute la nature des choses, fu-
rent d'un mesme accord pour ruiner vne mi-
serable armée. Il ne faut donc s'estonner
maintenant, si les Poètes ont feint que dans
le bouclier d'Achille il y avoit les Hyades,
les Pleiades, & principaux Asterismes du
Ciel qui y estoient ciselez, par lesquels com-
ils vouloient signifier que l'Astronomie de-
voit estre en la protection des grands Prin-
ces, aussi donnoient-ils à entendre, que par-
my les fatigues de la guerre, il se trouue
tousiours quelque opportunité de s'en servir.
Qu'enst fait Pericles l'Athenien, voyant ses
Soldats

Soldats éperdus, sur le point d'une bataille, pour avoir veu une eclipse de Soleil : S'il eust esté ignorant des causes de ces apparences ? c'estoit fait de luy, & de son armée. Mais apres qu'il leur eut discouru, & demonstre comment cela arriuoit naturellement, il leur remit le cœur au ventre, & la force au bras, pour frapper avec plus de courage sur leurs ennemis, & ainsi gagna la victoire. Au contraire, Persens Roy de Macedone, estant près de combattre contre Paulus Emilius, ayant veu le Soleil perdre sa lumiere sans aucune cause manifeste, perdit ensemble tout espoir de pouuoir vaincre, & croyant que ce prodige estoit vn asseuré presage de la ruine de son Estat, se laissa laschement mettre à vau-deroute par son ennemy. Quelle lourde faute commirent encore les Grecs, quand ils equipperent une si grande armée navale, pour recouurer ceste belle Grecque que Paris auoit rauie, de ne sçauoir en quelle partie d'Asie estoit si-

tuee Troye? Ne furent-ils pas contraincts de refaire volie en leurs maisons, apres auoir rauagé quelque contree qui n'en pouuoit mais? Les Perses & Afriquains ne laisserent-ils pas en ceste region-là des trophées de leur ignorance, pour n'auoir rien entendu en la charte du païs? Xerxes mesme, pour mesme defaut, n'a il pas remply la Grece de ses naufrages? le serois possible ennuyeux, de faire vn plus long denombrement des vtiluez & inconueniens notables, qui sont arriuez pour auoir sçeu ou ignoré l'Astronomie. Ils auront plus d'autorité & de poids, quand on les rencontrera en la lecture des bons *Autheurs & Historiens*. Cependant, c'est vne chose déplorable que ceste science que l'on appelle la science des Princes, soit si peu estimee, qu'il s'en trouue si peu qui en fasse cas, si peu qui vueillent y employer du temps, pour y sçauoir quelque chose. Mais si c'est l'ordinaire de cognoistre le naturel des hommes, si c'est la pier-

re de touche la plus certaine, de iuger de leur esprit, par l'inclination ou apprehension du sujet où ils s'addonnent. Ceux-là certes, qui n'ont iamais esté touchez du desir des choses celestes, donnent assez à cognoistre au monde, qui n'ont gueres de genereuses conceptions en l'ame. Hermes Trismegiste, dit que les ames des hommes prouiennent de diuers endroits, que celles du vulgaire prennent leur source de la masse des Elements, mais que celles des grands personages, distillent icy bas des Cieux supérieurs: & partant qu'il ne faut pas s'esmerveiller, si par fois les ames heroïques produisent des actions si genereuses, si leurs courages prennent des impetuositez si grandes du mouuement des causes secondes, d'où elles tirent leur origine? Au lieu qu'une infinité d'autres ne sentent que leurs Elements, ne rampent que par terre avec les animaux, & semblent n'auoir autre difference d'avec eux que la seule figure humaine. Pour moy, MONSIEUR,

ie souhaitterois auoir assez d'Eloquence, pour animer la ieunesse à ces estudes, & croy que qui employeroit son temps sur ceste matiere, s'il ne faisoit chose beaucoup vtile pour le bien public: au moins donneroit-il occasion à vn honneste diuertissement à quelques esprits dereglez, qui pour ne se voir violentez en leur ame, de recognoistre qu'il y a necessairement vne cause premiere, ont tousiours mesprisé ce qui estoit de la theorie des Cieux. Ce qui m'a semblé plus à propos pour cet effect, a esté de remettre en lumiere ce present Traicte, & y comprendre maintenant tout ce qui est de plus facile & plaisant en l'Astronomie, esperant attirer vn chacun par ces principes, à ce qui sera de conception plus difficile. Et ne doute point, qu'apres que l'on aura receu quelque contentement à considerer que le monde est rond, qu'il se meut spheriquement, que la terre & l'eau font vn Globe, que ce Globe est au centre du monde, qu'il est immo-

bile, qu'il n'est qu'un point au respect de l'univers, que l'on ne desire sçavoir apres, s'il y a des mouuemens contraires aux Cieux? que l'on ne veuille cognoistre quel est leur periode, rapidite, distance, & grandeurs? Et comme l'esprit de l'homme s'accroist en curiosité, que l'on ne veuille entendre la cause de tant de phenomenes celestes? comment la Lune tous les mois renouvelle sa face? quelles sont les causes des eclipses? d'où vient la quantité si inegale des iours & nuicts artificielles par tout le monde? en quel temps se font les equinoxes & solstices? & de là se porter puis apres, si l'on veut, à la consideration de la prouidence de Dieu, qui regit & gouuerne cet univers par sa sagesse immense, & donne tel bransle que bon luy semble aux revolutions des affaires de ce monde? En gardant cet ordre, se peut-il faire qu'un esprit bien né & courageux, se lasse & rebute au heurt & rencontre de quelques occurrentes difficultez? il n'y

a pas grande apparence. Car quan^t le
fois le desir des choses celestes s'est insinué
dans nos ames, quand il y a sejourne quel-
que temps, il y prend si bonne place, &
s'y fortifie de telle sorte, qu'il n'y a pas-
sion si violente qui l'en puisse faire deslo-
ger. On recite d'un Astronome qui demeu-
ra quarante ans sur vne montaigne, pour
considerer quel estoit le cours des estoilles
fixes : & en ceste consideration, finit plu-
stost sa vie que ses desirs. Il se lit d'un autre,
qui ne souhaitoit autre chose pour toute
felicité, que de voir de près quelle estoit
la grandeur du Soleil, pour puis apres estre
consumé par le feu de ses rayons. Il ne se
voit point de pareille agitation d'esprit aux
autres exercices. Quelques vns diront que
ce sont gens de basse condition : le le veux.
Mais que dira-t'on d'Alfonse Roy d'Ar-
ragon? car cet exemple est fort notable. On
luy offrit vn iour l'Empire Romain : Tou-
tesfois, craignant que l'embaras des affai-
res d'un si grand Estat, & que les diffi-

cultez & trauerses, qui sont comme attachees aux diademes, ne le destournassent de son contentement ordinaire, le refusa. Que s'il l'eust accepté, comme il y a grande apparence, qu'un si sçauant Prince s'en fut dignement acquitté, aussi n'eust-il pas tant acquis d'honneur en ceste administration, qu'il a acquis de gloire par les tables Astronomiques, qu'il a laissé pour iamais à la posterité. Ce ne sont dont pas icy des estudes que l'on doine mespriser, qui soient indignes d'occuper les bons esprits, puis qu'il y a eut tant de Princes, tant de Roys, & Empereurs, qui les ont affectionnées. Au contraire, on en trouuera bien peu, si on y regarde de près, qui ayent excellé par dessus les autres en vertu & renommée, qui n'ayent aussi excellé en ceste science. Nostre siecle a veu de fresche memoire, finir les iours à ce grand Prince des Pais bas, à qui l'antiquité, quoy que presomptueuse & hardie, n'o seroit iustement luy comparer aucun, lequel comme iamais il

ē iiii

n'a eu son pareil, qui l'ait égalé en la cognoissance generale des Mathematiques, aussi a il esté tenu pour vn des plus grands Capitaines qui ayent iamais esté, pour vn des plus experts en l'art militaire, le renom duquel s'espan dra non seulement à ceux de son siecle, mais à la posterité aussi, tant que l'on fera estat en terre des armes & de la vail lance. Mais iusques en quelles terres escartees m'a ietté la consideration de ces mouuemens celestes ? il faut dire verité, MONSEIGNEUR, qu'il y a long temps, que sans auoir aucun esgard à qui i'escris, i'ay passé les bornes accoustumées de l'estendue d'une Epistre. C'est pourquoy il est heure maintenāt, apres auoir si longuement vogué sur cet Ocean, de caler les voiles, & m'efforcer à coups de rames de surgir au port, pour vous offrir cet abbrege de l'vniuers, qui s'en va doucement rendre entre vos mains, pour se mettre à l'abry de la tempeste, & mauuais vens de la medisance. Il vous a desia l'obligation de sa naissan

ce, ayant receu les premiers traictz & li-
 neamens pour vostre sujet: Il vous est encore
 redeuable, du favorable accueil que l'on luy
 a fait par toute la Frâce, vne infinité s'estans
 delectez de vous imiter, & suivre comme à
 la trace les exercices d'un si grand Prince.
 Il ne luy reste maintenant, pour comble de
 toute fælicité, sinon que vous luy fessiez la
 faueur de le reuoir de bon œil, & le recognoi-
 stre pour vostre, encore qu'il soit accreu de-
 puis quatre ou cinq ans de la iuste moitié.
 Ce que faisant, vous me donnerez courage
 de mediter chose qui sera desormais plus
 conuenable à vostre aage, & continuer
 tous les iours mes prieres & mes vœux pour
 vostre prosperité, comme estant,

MONSEIGNEVR,

De vostre maison de l'Hostel
 de Soissons, ce 18. Decembre
 1627.

Vostre tres-hum-
 ble, & tres-obeis-
 sant seruiteur,
 BOULENGER.



TABLE
DES DEFINITIONS
QUI SONT AVX QUATRE
premiers Liures.

A



Imucantath,	page 33.	Aspects,	152.153.
Amphisciens,	212	Astronomie,	2
Antipodes,	217	Asterisme,	74
Angle Spherique,	7	Ascensions droites,	133
An,	90	Ascensions obliques,	133
An tropique,	89.90	Axe,	3.9
An fideral,	89.90	Azimuths.	31
An Solaire,	47		
Année. ciuile,	80		
Année grande,	67		
Année Iuliane,	80		
Année Astronomique,	80		
Anteciens,	216		
Apogée,	83.142		

B

B Iffexte, 90

C

Cercles, 5.12.27.29
Cercle mobile, 24
Cercle variable, 24
Cercle vertical, 31
Cercle de longitude, 32

Cercle de latitude, 32

Cercles de declinaison,

33

Cercles de hauteur, 33

Cieux, 58

Climat, 208

Colure, 18. 19

Comete, 173

Coniunction, 154

Coniunction apparente,

151

Coniunction vraie, 155

Cone, 166

Convexe, 4

Concave, 4

Concentrique, 4

Constellation, 74

Coucher cosmique, 137

Coucher acronyque, 138

Coucher des signes, 132

Coucher Solaire, 138

Crepuscule, 161

Crises, 149

D

D Declinaison, 39

Declinaison varia-

ble, 93

Declinaison des estoiles,

52

Degrez, 12

Diametre, 2

E

E Ccentrique, 4

Eclipses, 162. 163

Ecliptique, 17

Ecliptique triple, 72

Ecliptique fixe, 72

Ecliptique mobile, 73

Ecliptique vraie, 73

Ecliptique immuable,

73

Ecliptique terrestre, 173

Elemens, 115

Epicycle, 83. 145

Equant cercle, 86

Equinoctial, 14

Equinoxe 14. variable

74. 81

Equateur, 13

Equateur terrestre, 182

Estoilles de Bourbon,

176

Estoilles nouvelles, 174

Estoilles de Medicis, 176

Estoilles fixes, 74

Essien, 3. 9

G

G Lobe terrestre, 178

H

H Auteur du Soleil,

45

Hauteur des estoilles,	45	Minute,	12
Hemisphere,	3	Midy,	42
Hesperus,	98	Mois Solaire,	113
Heterosciens,	213	Mois periodie,	114
Heures egales,	97	Mois synodic,	114
Heures inegales,	97	Mois d'illumination,	114
Horizon,	19.20.22	Monde,	I
Hypothese,	118	Mouuement spherique,	130,

I

I Our natutel,	96	Mouuement premiet,	56
I our artificiel.	40.96	Mouuement rapide,	56
		Mouuement second,	57
		Monuement de trepidation,	72

L

L Aritude,	219	Nuit artificielle,	40.
L Latitude des estoilles,	51		160

N

N	Viet artificielle,	40
		160

O

O	Ccident,	42
O	Occidentaux,	45
	Ombre de la terre,	160
	Ombre de s. soire,	192
	Opposition,	152
	Orbe,	3
	Orient,	42
	Orientaux,	45

P

P	Arallaxe,	155
P	Paralle de iours,	211

M

M	Eridien,	24.25.26
M	Meridien terre-	
	stre,	182

Parallels du Soleil, 158
 Perigée, 83. 142
 Perieciens, 215
 Perisciens, 214
 Phenomenes, 132
 Phosphore, 98
 Planete, 77
 Planetes superieurs, 78.

82

Planetes inferieurs, 78
 Planete directe, 145. 148
 Planete retrograde, 145.

148

Planete stationaire, 145.

148

Planetes nouveaux, 175
 Polaires terrestres, 185
 Poinçts cardinaux, 37. 48
 Pole, 3. 10
 Pole du cercle, 6
 Premier mobile, 59

Q

Q Vartes du monde, 49

Quadrat aspect, 152

Queuë de Dragon, 113

R

R Efracions, 169

R Region Echerée, 53

R Region Elementaire, 53.

115

S

S Atellites de Iupiter, 176

Seconde, 12

Septentrion, 42

Sextil aspect, 152

Signes, 15. 16

Signes Septentrionaux,

35

Signes Meridionaux, 35

Signes ascendans, 38

Signes descendens, 38

Solstice, 28. 29

Sphere, 2. 7

Sphere naturelle, 53

Sphere artificielle, 8

Sphere droite, 23

Sphere oblique, 23

Sphere parallele. 23

T

T Este de Dragon, 112

T Trine aspect, 152

Tropique, 27. 28

Tropiques terrestres,

184.

V

V Ents, 43

Venus, 98

Z

Z Odiague, 14

Zodiaque triple, 72

Zone, 48. 185.

ADVERTISSEMENT.

L Es Spheres duquel l'usage est icy
monstré, se vendent chez Jean
Moreau, rue saint Jacques, à l'ensei-
gne du Globe Celeste.

NOtez que pour bien monter les Sphe-
res, il faut que le Pole Arctique
(autour duquel est le cercle horaire) soit
à l'endroit où commencent les Climats, se-
lon les Anciens.

EXTRAICT DV PRIVILEGE du Roy.


PAr grace & privilege du Roy, il est permis à Iean Boulenger, Lecteur du Roy, d'imprimer ou faire imprimer, vendre & distribuer, tant de fois qu'il luy plaira, les Liures de Mathematiques qu'il a composez & composera : avec defences à tous Libraires & Imprimeurs, & autres, de quelque estat & condition qu'ils soient de les imprimer, ny en extraire aucune chose, sans le congé & consentement dudit Boulenger, pendant le temps & terme de dix ans, à compter du iour & date que chacun de sesdits Liures aura esté paracheué d'imprimer, sur peine de confiscation des exemplaires qui en seront trouvez, & de deux mil liures d'amende, moitié à nous applicables, & l'autre moitié audit Boulenger, comme plus à plein est contenu & déclaré es lettres dudit privilege. Donné à Paris, le 2. iour de Mars 1624. & de nostre regne le 14.

Par le Roy en son Conseil,

Signé. FAVVRE.

LEdit Sieur Boulenger a permis & accordé la iouissance de son privilege à Iean Moreau, pour imprimer un liure intitulé, *Traicté de la Sphere du monde, diuisé en Quatre Liures, ausquels est adiousté un Cinquiesme, de l'usage d'icelle, reueu, corrigé, & augmenté par l'Auteur,* & ce pour le terme de six ans seulement, suivant la cession qu'il luy en a fait le 18. Decembre 1627.

BOVLINGER.





TRAITTE'
DE LA SPHERE
DV MONDE.

LIVRE I.



*Le Monde est vne Sphere composée
du Ciel & de la Terre, & des Na-
tures qui sont en l'vn & l'autre.*

Encore que les Traitez ordi-
naires quel'on fait de la Sphere,
ne comprennent principalement que la do-
ctrine du premier mobile, & des cercles qui y
sont imaginez, pour rendre raison des appa-
rèces Celestes, qui se font au dessus: si est-ce
que la plus part y adioustent aussi la Sphere
du Soleil, & de la Lune, comme estant la co-
gnoissance de ces deux planetes plus neces-
saire que celle de tous les autres. Mais pour
faire quelque chose de plus general, nous
traicterons icy de la Sphere du monde: c'est

à dire, de tous les Cieux, & de la terre, qui est au centre de l'univers, apres auoir donné quelques definitions necessaires, pour la commodité de ceux qui sont destituez de personnes qui les enseignent. Ce qui leur sera vn grand acheminement pour paruenir à la connoissance generale du mouuement des corps Celestes, que l'on nomme Astronomie

DEFINITIONS.

1 **S**phere ou globe est vn corps solide, compris sous vne seule superficie, qu'on appelle *Spherique*, au milieu duquel il y a vn poinct qu'on nomme *centre*, duquel toutes les lignes droites tirées à la superficie sont egales.

Sphere, est ce que l'on nomme vulgairement vne boule: car sphere, globe, & boule, sont synonymes, c'est à dire, signifient vne même chose. Sphere est Grec, globe Latin, & boule est François.

2 *Diamettre de la sphere*, est vne ligne droite, qui passant par le centre, touche des deux costez à la superficie.

Comme si au trauers d'une boule, on imaginoit des lignes droites, qui passassent toutes par le fin mitan; ces lignes droites là seroient nommées diametres de la boule.

3 *Axe ou effieu de la Sphere, est vn diamettre, sur
laquelle la Sphere se tourne.*

Le diamettre & l'effieu d'une Sphere, dif-
ferent entre eux de telle sorte, que tout ef-
fieu est diamettre, mais tout diamettre n'est
pas effieu, pour ce qu'il n'y a point d'effieu
ou d'axe si la sphere n'est mobile. Diamettre
donc est vn mot plus general, Axe plus par-
culier.

4 *Les poles d'une Sphere, sont les deux poincts
qui sont à l'extremité de l'axe.*

Cecy est aisé à considerer. Percez vne pe-
tite boule de cire par le milieu avec vne espin-
gle: lors si en pressant les deux bouts de l'es-
pingle, vous faites tourner la petite boule,
cette espingle sera l'axe ou effieu de la boule,
et les deux bouts de l'espingle representa-
ront les deux poles, sur lesquels la boule
tourne.

5 *Hemisphère, est vn corps solide, compris
entre vn cercle qui passe par le centre de la sphere,
et la moitié de la superficie de la sphere.*

Hemisphère vaut autant à dire que demy
boule. Si donc on coupe vne boule droite-
ment par le milieu, on en fera deux pieces,
chacune desquelles se nommera demy-boule
ou Hemisphère.

6 *Orbe, est vn corps solide, compris entre*

4

Traicté de la Sphère

deux superficies spheriques, l'une interne qu'on appelle *concaue*, l'autre externe, qui est dite *conuexe*.

On pourra se représenter que c'est qu'un orbe, si on imagine une cerise, de laquelle on aura osté le noyau : car lors un tel corps sera compris de deux superficies, l'une interne ou *concaue* qui entouroit le noyau, l'autre externe ou *conuexe* qui est au dehors.



7 Les orbes sont *concentriques* ou *eccentriques* : les *concentriques* sont ceux qui ont un mesme centre, les *eccentriques* l'ont diuers.

Qu'es'il s'entrouue quelque un de solidité inegale & qui n'ait qu'une superficie concentrique, il s'appelle *concentrique* en partie.

8

Les cercles de la sphere, sont cercles desquels

circonférence est descrite en la conuexité de la sphere.

Prenez vne boule, & mettant le pied d'un compas sur sa superficie, descriuez y vne circonférence. Ceste circonférence est ditte cercle de la sphere: & defait, plusieurs estiment que les cercles de la sphere sont seulement circonférences.

9 Les cercles d'une sphere, sont grands ou petits: Les grands, sont ceux qui ont leur centre avec celui de la sphere, ou qui diuisent la sphere en parties égales.

Pour bien conceuoir ce que dessus. Prenez vne boule, & descriuez vn cercle sur sa superficie, avec vn compas qui ait les iambes largies du quart de la boule, & vous y descrirez vn grand cercle. Notez que le compas doit auoir les iambes courbes pour pouoir bien descrire vn cercle sur la sphere.

10 Les petits cercles, sont ceux qui n'ont pas leur centre avec celui de la sphere, ou qui ne diuisent pas la sphere en parties égales.

Il est aisé par l'explication precedente de connoistre que c'est qu'un petit cercle: car tout autre qui sera descrit avec vn compas, qui aura les iambes plus ou moins essargies que d'un quart de la sphere, sera petit.

11 Cercles parallels ou equidistans, sont ceux

desquels les circonferences sont paralleles.

Prenez vne boule, & mettant le pied d'un compas sur la superficie, descriuez y vn cercle, puis estressissant ou essaigissant ledit compas, descriuez encore du mesme point quelques autres cercles, lors tels cercles seront dits parallels, ou equidistans, a cause de l'egale distance de leurs circonferences.

12. *Cercles concentriques, sont ceux qui ont vn mesme centre: les eccentriques l'ont diuers.*

C'est vne propriete aux cercles concentriques, d'auoir les circonferences paralleles, & d'egale distance, & ne se couper iamais: les eccentriques au contraire, ont leurs circonferences d'une distance inegale, & souuent s'entrecourent.

13. *Le Pole d'un cercle, est vn poinct en la superficie de la sphere, au milieu de la circonference du cercle.*

Quand avec vn compas on a descrit vn cercle sur vne boule, le poinct ou l'on a mis le pied du compas, est dit le pole du cercle. Pource que si ce cercle auoit à tourner, il se tourneroit sur ce poinct, & sur celuy qui luy est diametralement oppose. Le pole donc differe d'avec le centre d'un cercle. Car le pole est sur la superficie de la sphere, & le centre est dans la solidité.

14 *Angle spherique, est vn angle qui est fait sur la superficie de la sphere.*

Si sur vne boule vous y tirez deux lignes, qui fassent vn angle, cet angle est dit spherique, pource qu'il est descript sur vne sphere. Ainsi les coustures qui paroissent sur vn ballon quand il est enflé, sont autant d'angles spheriques.

DIVISION DE LA Sphere.

LA Sphere, est ou naturelle, ou artificielle; la naturelle, est tout ce que Dieu a créé, que l'on appelle monde. L'artificielle, est celle qui par certains cercles represente les mouuemens de la naturelle.

La sphere est consideree en deux façons, en la doctrine Astronomique; c'est à sçauoir, quand elle signifie le premier mobile, ou quand par certains cercles ioints ensemble, elle represente son mouuement. La premiere est dite naturelle, l'autre artificielle. La naturelle est le premier mobile ou dernier ciel, ou pour mieux dire toute la machine du monde. L'artificielle est la representation ou image de la naturelle, composée de certains cercles, par lesquels on demonstre la raison

du premier mouuement. Les Grecs l'appellent Sphera cricotos; c'est à dire sphere circulaire, pour la distinction du globe celeste, qui n'a que deux ou trois cercles. Archimede en fit faire vne de verre qui est vne matiere transparente, afin de pouuoir voir au trauers tous les mouuemens des autres cieux inferieurs. Et Sapor Roy de Perse en fit faire vne fort grande de mesme matiere, au milieu de laquelle il estoit assis comme vn petit Dieu mortel, d'où il contemplant à son aise tous les cieux qui se mouuoient par des ressorts que luy mesme il auoit inuentez.

DIVISION DE LA SPHERE re artificielle.

L*A Sphere artificielle, est parfaite ou imparfaite. La parfaite est celle qui par plusieurs cercles represente tous les Cieux, & leurs mouuemens. L'imparfaite est celle qui en represente seulement les principaux.*

Il n'y a guere de Spheres qui representent tous les Cieux & leurs mouuemens comme ont fait celles d'Archimede, & du Roy Sapor. Les ordinaires ne seruēt que pour monstres seulement le mouuement du premier mobile, avec celui du Soleil & de la Lune.

Ily en a d'autres où l'on y voit les trois cieux
superieus. & telles spheres sont bien bon-
nes, pource qu'elles monstrent le mouue-
ment du Firmament, & les trois Ecliptiques,
qui sont de plus difficile conception.

DES PARTIES DE LA Sphere Artificielle.

Les parties principales sont l'essieu, les poles,
& les cercles.

Il faut s'accoustumer apres auoir confide-
ré les partie de la sphere artificielle, à imagi-
ner la mesme chose en la naturelle, car autre-
ment on apprendroit sans aucune vtilité cet-
te science.

DE L'AXE OV ESSIEV.

L'Axe ou essieu de la Sphere artificielle, est vn fil
de fer, sur lequel on fait tourner la sphere, le-
quel represente celuy de la naturelle, ou axe du
monde.

Comme l'artificielle represente en gros
la naturelle, ainsi chaque partie d'icelle re-
presente les parties del autre, & est vtile de
s'accoustumer à ces representations, pour
bien conceuoir le mouuement de tout le

monde; car l'axe du monde n'est qu'imaginaire. Et quand les Poëtes ont dit qu'Atlas soustenoit l'acte du ciel, de peur qu'il ne tombast sur la terre, ce n'estoit que pour donner à entendre, qu'il falloit imaginer vn axe, pour bien comprendre le mouuement des cieux.

DES POLES.

Les Poles de la Sphere artificielle, sont les deux extremitex de l'essieu, qui representent les poles du monde, l'un desquels est dit le pole Arctique, l'autre le pole Antarctique.

Les poles, sont les deux bouts de l'essieu du monde, ainsi dits, pource que dessus eux tous les corps celestes se tournent en 24. heures, & sont ainsi nommez du verbe Grec *πολέω*, qui signifie tourner. Virgile les appelle *vertices*, sommets: Mantuan, *cardines*, gonds ou piuots.

DU POLE ARCTIQUE.

Le pole Arctique, est celuy là qui est du costé du Septentrion.

Les Grecs l'ont ainsi nommé, à cause des deux Ourses qui luy sont voisines, qui sont

deux constellations celestes. Car Arctos en Grec signifie ourse Les Mariniers prennent pour le pole Arctique, l'estoille qui est à la queue de la petite Ourse, qui toutesfois est esloignée du pole du monde de trois degrez ou enuiron. Et partant quand ils font leurs obseruations avec leurs astrolabes, ils peuvent par fois errer de trois degrez; c'est à sçauoir, quand ceste estoille est au meridiem du lieu où ils font l'obseruation.

DV POLE ANTARCTIQUE.

LE Pole antarctique, est celuy là qui est du côté du Midy.

Les Grecs l'ont ainsi nommé, à cause qu'il est opposé à l'Arctique; car anti en Grec vaut autant que contre, ou opposé. Cestuy cy ne peut pas estre si facilement remarqué au ciel, comme l'Arctique, à cause de ceste estoille de l'Ourse, qui en est si proche. Ceux toutesfois qui ont passé au delà de la ligne, ont obserué qu'en temps serain, il y a tousiours deux petits nuages, qui tournent incessamment au tour de ce pole. Le plus petit de quels en est plus proche, & l'autre, quelque peu plus distant, lesquels avec le pole Antarctique font vn triangle isoscele. Il n'y a

donc, qu'à imaginer ce triangle, pour remarquer le lieu où est le pole antarctique.

DES CERCLES DE LA SPHERE.

IL y a dix cercles en la Sphere artificielle, six grands & quatre petits.

On s'est contenté iusques au iourd'huy de ce nombre, pour éviter la confusion aux Spheres artificielles, s'il y en adjoûtoit davantage: Mais il y en a encore d'autres, la cognoissance desquels est vtile pour entendre l'astronomie, lesquels nous definirons apres les dix cercles qui sont d'ordinaire.

DES PARTIES DES CERCLES.

Tous les cercles de la Sphere, tant grands, que petits, sont diuisez en trois cens soixante parties egales, que l'on appelle degrez. Chaque degre en 60. parties, que l'on appelle minutes, chaque minute en 60. parties, que l'on appelle seconde, chaque seconde en 60 tierces, & ainsi de suite.

Ceste diuision n'a esté qu'à la volonté des astronomes, qui toutesfois ont pris plutoſt ce nombre de 360. qu'un autre, pour auoir plusieurs parties quotes. Et pour ceste mesme raison, ont derechef diuisé chacune de

tes parties en 60. pour éuiter le plus qui pourroient les fractions. Les Grecs se sont contentez du nombre sexagenaire en toute diuision & subdiuision de cercles.

DES SIX GRANDS CERCLES.

Les six grands cercles sont l'equateur, ou lequinotial: le zodiaque, les deux colures, l'horizon & le meridien.

Tous les grands cercles sont égaux entre eux, & iacoit que l'horizon de la sphere artificielle soit plus grand que le meridien, & cestuy-cy plus grand que l'equateur, & les colures, si faut-il les conceuoir entre-eux tous égaux, & que ceste inegalité ne vient que du costé de l'artizan, qui pour faire tourner commodément la sphere, les fait d'une grandeur inegale.

DE L'EQUATEUR.

L'Equateur ou Equinoctial est vn grand cercle, également distant des poles du monde.

Ce cercle est dit equateur, à cause qu'il est comme la mesure & regle de tous les autres, & que par son mouuement qui est réglé, il egale le mouuement irregulier des autres.

On l'appelle aussi Equinoctial, pource que le Soleil estant deffous, il se fait equinoxe par tout le monde; c'est à dire, les iours sont faits egaux aux nuicts: ce qui arriue deux fois l'an, enuiron le 21. Mars, & le 23. de Septembre: Ce cercle se cognoit aisément en la sphere. Car si on la fait tourner avec la main, il est tout au milieu de ce mouuement, qui est cause que quelques vns l'ont nommé aussi la ceinture du premier mobile.

DV ZODIAQUE.

LE Zodiaque, est vn grand cercle, d'une circonférence large, sous laquelle les sept planettes cheminent continuellement.

Ce cercle est ainsi nommé de zoé, qui signifie en Grec vie. pource que le Soleil, & autres planettes, qui tournent perpetuellement au deffous, donnent vie à toutes choses naturelles. D'autres le deriuét du mot de zodion, qui est à dire animal, à cause qu'il contient au deffous de soy les douze signes celestes, ou animaux, il est seul qui a de la largeur.

Ptolomée luy donne douze degrez de largeur: mais les nouueaux luy en ont donné seize, pource qu'ils ont obserué Mars & Venus, s'esloigner d'environ de 8. degrez du milieu.

DES PARTIES DV ZODIAQUE.

ENCORE que le zodiaque soit diuisé en 360. parties, comme tous les autres cercles, si est-il toutesfois diuisé premierement en 12. parties egales, que l'on nomme signes, chacun desquels est de 30. degrez, selon l'ordre qui s'ensuit. Le Signe du Belier, du Taureau, des Gemeaux, de l'Escrimeuse, du Lyon, de la Vierge, de la Balance, du Scorpion, du Sagitaire, du Capricorne, du Verseau, & des Poissons.

L'aduertiray icy en passant, que les douziemes parties du zodiaque, que l'on appelle signes, ne sont ainsi nommées pour contenir quelques signes ou constellations celestes, veu qu'il n'y a aucun astre au premier mobile, & que les douze signes, sont au huitiesme ciel ou firmament: Toutesfois on ne laisse pas de nommer ces douziemes parties, le signe du Belier, le signe du Taureau, &c. Pource que les estoilles du huitiesme ciel qui font ces constellations-là, estoient du temps des premiers Astronomes au dessoubz de ces douziemes parties du zodiaque du premier mobile, qui est cause que le nom leur en est demeuré, encore que les signes ayent changé de place, & que maintenant le signe du Belier du huitiesme ciel soit au

Taureau du dixiesme. Et c'est pourquoy quand on dit que le Soleil est au Belier, on n'entend pas au Belier du firmament, mais au Belier du premier mobile.

DES DIVERSES ACCEP- tions de signe.

LA douziemesme partie du zodiaque est appelée signe, comme nous auons dit. Mais d'autant que les Astronomes rapportent toutes les estoilles à quelque signe, il est besoin d'entendre comme ils le conçoient.

C'est qu'ils imaginent six grand cercles qui passent par les poles du zodiaque, & par les commencemens de six signes consecutifs, qui diuisent toute la superficie du ciel en douze parties; qui s'estressissent deuers les poles du zodiaque. Et toutes les estoilles ou parties du ciel qui sont comprises entre deux demy cercles, sont dites estre au signe qui est compris entre iceux, comme il est aisé à voir manifestement sur vn globe celeste.

DE L'E


DE L'ECLIPTIQUE.

L Ecliptique, est une ligne au milieu du zodiaque, sous laquelle le Soleil chemine tous-jours.

Cette ligne a esté ainsi appelée du mot *eclipo*, qui signifie defaillir, à cause que les eclipses ou defaux du Soleil & de la Lune se font sous ceste ligne.

DES COLURES.

L Es colures, sont deux grands cercles, qui s'entre-couppent en angles droits spheriques, aux poles du monde, l'un desquels se nomme le colure des solstices, l'autre le colure des equinoxes.



Ces deux cercles sont ainsi nommez de *coluo*, qui signifie en Grec autant que tronquer, retrancher, pource que iamais ils ne se voyent entieremēt, mesme en la conuersion de la Sphere, mais tousiours quelque partie d'eux, est cachée sous l'horison, si ce n'est en ceste position.

de la Sphere où l'equateur est vertical, c'est à dire au dessus de la teste des habitans du lieu. Car lors ils peuvent paroistre par la reuolution du premier mobile.

DV COLVRE DES SOLSTICES.

LE colure des Solstices, est vn grand cercle qui passe par les poles du Monde, & par le commencement de l'Escrénisse & du Capricorne.

Ce cercle est ainsi nommé à cause qu'il passe par les lieux du zodiaque, ou quand le Soleil est, ou en approche, il s'éble estre immobile, & s'arrester comme en vne station pour l'insensible declinaison ou esloignement qu'il fait de l'equateur.

DV COLVRE DES equinoxes.

LE Colure des Equinoxes, est vn grand cercle, qui passe par les poles du monde, & par le commencement du Belier & de la Balance.

Ce cercle est ainsi nommé, à cause qu'il passe par les lieux du zodiaque, où quand le Soleil est, il se fait equinoxe par toute la terre: c'est à dire que les nuicts sont egales aux iours.

DE L'HORIZON.

LA diuerse acception de ce cercle, a esté cause qu'il est difficile de le définir, que premierement il n'ait esté diuisé. On peut dire seulement en gros, que c'est vn cercle qui borne là veü au ciel, ou en la terre. Car pour ce sujet est il dit horizon du mot Grec *orizo*, qui signifie borner.

DIVISION DE L'HORIZON.

L'*Horizon selon Geminus & autres Astronomes, est diuisé en horizon sensible, & horizon rationel.*

Ceste diuision fait entendre la varieté en la definition de ce cercle qu'ont donné les anciens. Car quelques vns l'ont appellé la borne du ciel, ou cercle de l'hemisphere, ce qui s'entend de l'horizon rationel; les autres l'ont nommé circuit de terre, ce qui se doit prendre de l'horizon sensible.

DE L'HORIZON SENSIBLE.

L'*Horizon sensible est ceste espace de terre, que l'on void en rond tout au tour de soy, quand on*

est en plaine campagne, outre laquelle la *venë* ne peut atteindre, à cause de la rotondité ou tumeur de la terre. Geminus donne à ce cercle vn demy diametre de 400. stades.

C'est chose certaine, que tant plus l'œil sera esleué, plus grand apparoiſtra cét horizon sensible. Et si selon Geminus, cē cercle a 400. stades de demy diametre, (ce qui faut qui arriue quand l'œil est en vn lieu biē esleué) on pourra descouurir enuiron 25. lieues de loin. Il y en a d'autres, qui definissent l'horizon sensible, vn cercle sur la surface de la terre, en l'estenduē duquel les Phœnomenes du ciel, comme sont le leuer & coucher des estoilles, la hauteur du pole, la quantité des iours & des nuits, ne se change sensiblement. Mais de definir precisément la grandeur de ce cercle, il est impossible, à cause de l'inegale longueur ou largeur des climats, ausquels les phœnomenes font des mutations grandes.

DE L'HORIZON

Rationel.

L'Horizon rationel, est vn grand cercle qui separe la partie du monde *venë*, de celle qui ne l'est point.


L'horizon rationel, est celuy là qui est proprement considéré en l'astronomie, & est vrayment vn grand cercle que l'on conçoit passer par le centre de la terre, pour separer la sphere en deux parties esgales; sçauoir en l'hemisphère superieur qui paroist à nos yeux & l'hemisphère inferieur que nous ne voyôs point. Mais l'horizon sensible n'est pas proprement vn cercle, ains vne petite superficie, conuexe de la terre, bornée par vne circonference.

DIVISION DE L'HORIZON Rationel.


L'*Horizon rationel est diuisé en horizon droit, horizon oblique, & horizon parallele.*

La diuision des anciens estoit seulement en horizon droit & horizon oblique, mais ceste diuision n'estant suffisante, on y a adiousté l'horizon parallele, que les anciens comprennent sous le nom d'oblique.

L'horizon droit, est celuy là qui coupe l'equateur en angles droits.




L'horizon oblique, est celuy là qui coupe l'equateur en angles obliques.



L'horizon parallele, est celuy là qui est ioinct avec l'equateur.

L'horizon droit, ne coupe pas seulement l'equateur en angles droits, mais tous les cercles qui luy sont paralleles, comme l'ho-



zon oblique, les coupe obliquement, & l'horizon parallele leur est parallele.

DE LA DIVERSE POSITION de la Sphere.

DE la diuision de l'horizon rationel, on considere trois diuerſes positions de la sphere; ſçauoir, droite, oblique, & parallele.

La Sphere droite, eſt celle qui a l'horizon rationel droit. La sphere oblique, qui a l'horizon rationel oblique: & la sphere parallele qui a l'horizon rationel ioinct avec l'equateur.

Tournez la sphere, la tenant par le meridien, iuſques à ce que les poles du monde ſoient en l'horizon, lors vous verrez la position de la sphere droite, qui eſt ſeulement à ceux qui habitent ſous l'equateur. En apres

leuez vn des poles sur l'horizon, & vous verrez la disposition de la sphere oblique. Finalement leuez le pole de la sphere, en sorte qu'il soit tout au plus haut, & vous verrez quelle est la position de la sphere parallele. Que si vous la faites mouuoir en quelque vne de ces trois positions, vous cognoistrez comment le monde se tourne à leur respect. On obseruera en passant, qu'il n'y a que deux poincts sur la terre, où la sphere soit paralleles; sçauoir sous les poles du monde. Vne circonference sur la terre, ou la sphere soit droite; sçauoir sous l'equateur. Et tout le reste de la superficie d'icelle à la sphere oblique.

DV MERIDIEN.

IL y a en la sphere, des cercles variables & invariables. Les variables qui se changent, en changeant de lieu, sont immobiles: c'est à dire, ne sont emportez avec le mouuement du monde: les invariables sont mobiles. Ainsi l'equateur, les colures, le zodiaque sont invariables, mais mobiles: Et l'horizon & le meridien sont variables, mais immobiles. Car en quelquelieu que l'homme soit, il a son horizon, & son meridien, & s'il change de lieu, principalement vers l'O;

tient, ou l'Occident, il change necessairement d'horizon, & de meridiem aussi.

DIVISION DV MERIDIEN.

LE meridiem selon les Astronomes, est diuisé en meridiem sensible, & meridiem rationel.

Le sujet qui a esté cause que l'on a diuisé l'horizon en sensible & rationel, est celuy là mesme qui a meu les Astronomes d'en faire autant au meridiem, y en ayant vn qui tombe sous les sens, & l'autre qui seulement est conceu par l'entendement & la raison. Le rationel à chaque pas est variable: le sensible ne se varie point, qu'apres auoir fait quatre cens stades, du costé d'Oriët ou d'Occident, Car pour aller vers le Midy & Septentrion, il ne varie aucunement.

DV MERIDIEN SENSIBLE.

LE meridiem sensible d'un lien, est vne espace du ciel, compris entre deux grands demy cercles, qui passent par les poles du monde, & par les poinçts Verticaux de deux autres lieux esloignez de celuy où l'on est de 400. stades, vers l'Orient & l'Occident.

Telle a esté la conception des Grecs tou-

chant le meridiem sensible qu'ils ont inuenté, afin de n'en constituer vne infinité à chaque pas que l'on fait vers l'Orient ou l'Occident. Mais pour bien faire, & mieux qu'ils n'ont fait, il faudroit commencer sous l'equateur pour y establir ceste distance de quatre cens stades, de part & d'autre; & ce faisant on conteroit 432. meridiens sensibles en tout le circuit de la terre, lesquels s'estreciroient vers les poles du monde: Aussi bien les phœnomenes, desquels nous auons parlé à l'horizon sensible, varient plus aisément, plus on s'approche de ces quartiers là.

DV MERIDIEN RATIONEL.

LE Meridien Rationel, est vn grand cercle, qui passe par les poles du monde, & de l'horizon, sous lequel le Soleil estant, il est midy.

Ce cercle est nommé meridiem, pource qu'il diuise le iour en deux parties egales, y ayant autant depuis le Soleil lené iusques à midy, que du midy iusques au coucher. Il passe par les poles de l'horizon, l vn desquels se nomment senith ou poinct vertical pource qu'il est sur nostre teste, & l'autre nadir ou poinct des pieds qui luy est diametralement opposé.

DES PETITS CERCLES.

Les petits cercles, qui sont au nombre de quatre, sont diuisez en deux tropiques, & deux polaires.

Ces quatre petits cercles, sont entre-eux parallels ou equidistans, & diuisent la superficie de la sphere, en cinq parties, desquels il sera parlé cy-apres.

DES TROPIQUES

Les deux tropiques, sont celui de l'Ecreuisse & du Capricorne.

Quand le Soleil est paruenue aux tropiques, c'est lors qu'il fait sa conuersion vers l'equateur, & pour ceste cause ils ont esté nommez tropiques du mot *tropos*, qui signifie conuersion.

DV TROPIQUE DE L'E- creuisse.

Le tropique de l'Ecreuisse, est vn petit cercle parallele à l'equateur, qui passe par le premier poinct du signe de l'Ecreuisse.

Il est aussi nommé tropique d'Esté, pour

ce que le Soleil estant au dessous de ce cercle, ou s'en approchant fait les plus grands iours de l'Esté. On le nomme aussi cercle du solstice d'Esté, pource que le Soleil en s'approchant ou s'esloignant de ce cercle, à ce que dit Proclus, semble demeurer en mesme endroit quelque temps, à cause que les ombres meridiennes ne croissent ny diminuent, & que les iours sont en mesme estat, sans qu'ils apparroissent s'agrandir ou diminuer. Et pour cette cause les anciens ont creu, que les solstices n'arriuoient que quand le Soleil passoit par le huitiesme degré de l'Ecreuisse, ou du Capricorne, à cause qu'ils obseruoient les ombres, pour determiner les saisons, qui ne varient qu'environ ce temps-là.

D V T R O P I Q V E D V Capricorne.

L E tropique du Capricorne, est vn petit cercle parallele à l'equateur, qui passe par le premier poinct du signe du Capricorne.

Ce cercle est aussi nommé tropique d'Hyuer, pour la mesme raison que l'autre a esté dit tropique d'Esté. Car quand le Soleil approche de ce cercle, c'est lors que les iours de l'Hyuer sont les plus petits. On l'appelle

aussi le cercle du solstice d'Hyuer, pource
que le Soleil semble demeurer en mesme en-
droit, & courir tousiours vne mesme route
l'espace de 15. ou 20. iours, quand il s'appro-
che ou s'esloigne de ce cercle.

DES CERCLES POLAIRES.

Les deux cercles polaire, sont le cercle arctique,
& le cercle antarctique.

Ces cercles sont ainsi dits, pource qu'ils
passent par les poles du zodiaque Les Grecs
les imaginent variables, tantost grands, tan-
tost petits, selon l'inclination de la sphere.


DU CERCLE ARCTIQUE.

Le cercle arctique, est vn petit cercle parallele
à l'equateur, qui passe par le pole Septentrio-
nal du zodiaque.

Les Grecs le definissent en ceste façon; le
cercle arctique est le plus grand de tous les
cercle qui apparoissent, qui touche en vn
point l'horizon, dans lequel tous les astres
qui s'y rencontrent ne se leuent & ne se cou-
chent iamais.

DV CERCLE ANTAR- étique.

LE cercle antarétique, est vn petit cercle parallele à l'equateur, qui passe par le pole meridional du zodiaque.



Selon les Grecs, c'est le plus grand de tous les cercles qui n'apparoissent point, & qui touche en vn point à l'horizon, dans lequel tous les astres qui s'y rencôtrent ne se leuent & ne se couchêt iamais.

DE QUELQUES AVTRES cercles qui ne sont descrits sur la sphere artificielle.

IL y a plusieurs autres cercles grands & petits, qui sont vtils à la doctrine spherique, lesquels ne sont point descrits sur la sphere artificielle, tant à cause qu'ils ne sont pas si necessaires que les autres, qu'à cause qu'ils y apporteroient de la confusion, & qui plus est ne pourroient souuent y estre repre-

sentez, comme sont les cercles azimuths ou verticaux, les cercles de longitude, de latitude, de declinaison, de hauteur, & d'autres encores moins considerables, lesquels nous definirons icy le plus facilement qu'il nous sera possible.

DES CERCLES VERTICAUX, ou Azimuths.

Les cercles Verticaux, ou azimuths, sont plusieurs grands cercles, qui s'entre coupent tous au pole de l'horizon.

Il y en a qui en content 180. les faisant passer par tous les degrez de l'horizon: Mais on en peut mettre tant que l'on voudra. Que si on desire les représenter sur la sphere, il la faudra tourner, en sorte que l'horizon soit joint avec l'equateur: Et lors les deux colures de la sphere représenteront deux azimuths, entre lesquels on en pourra imaginer une infinité d'autres. Ils sont dits verticaux, pource qu'ils paient par le faiste ou sommet de nos testes, que les Latins appellent *Vertex*.

DES CERCLES DE LONGITUDE des estoilles.

Les cercles de longitude, sont plusieurs grands cercles qui s'entrecoüpent tous aux poles du zodiaque.

Si on desire les représenter facilement, cela se pourra faire sur vn globe celeste, sur lequel on en verra six depeints, qui passant par les poles du zodiaque, diuisent tout le ciel en 12. parties égales. Ils sont dits cercles de longitude, pource qu'ils determinent quelle est la longitude ou distance que les astres peuuent auoir, à conter du premier qui passe par le commencement du Belier, &c qui seul est représenté en la sphere par le coültre des equinoxes.

DES CERCLES DE LATITUDE des estoilles.

Les cercles de latitude, sont plusieurs petits cercles parallèles à l'ecliptique, tous d'inegale grandeur, qui s'appetissent vers les poles du zodiaque.

On pourra considerer cela sur le globe celeste, sur lequel il y en a trois de chaque costé de l'ecliptique. Ils sont dits cercles de latitude,

latitude, pource qu'ils monstrent quelle est la latitude ou esloignement des astres, à compter depuis l'ecliptique.

DES CERCLES DE DECLINAISON.

Les cercles de declinaison sont plusieurs petits cercles, parallels à l'equateur, tous d'inegale grandeur, qui s'appetissent vers les poles du monde.

Pour les concevoir sur la sphere, il faut considerer vn tropique & vn polaire, qui sont parallels à l'equateur. Car ces deux cercles là, sont cercles de declinaison: Et le tropique monstre en effect quelle est la plus grande declinaison du Soleil, où le plus grand esloignement qu'il fait de l'equateur. Que si on en imagine plusieurs semblables entre l'equateur & le pole, tels cercles seront dits cercles de declinaison.

DES CERCLES DE HAUTEUR ou Almucantaraths.

Les cercles de hauteur ou almucuntaraths, sont plusieurs petits cercles parallels à l'horizon, tous d'inegale grandeur, qui s'appetissent vers les poles de l'horizon.

Il y en a qui en content seulement 88. les faïsans distans chacun d'un degré: Mais on en peut imaginer tant qu'on voudra. Que si on desire les représenter sur la sphere, qu'elle soit tournée en telle façon, quel equateur soit ioint avec l'horizon, lors on verra sur la sphere deux cercles parallèles à l'horizon; sçavoir vn tropique & vn polaire, qui représenteront deux cercles verticaux, entre lesquels & par delà, on en peut concevoir vne infinité d'autre. Ils sont dits cercles de hauteur, pource qu'ils determinent la hauteur des astres, au dessus de l'horizon.

DE L'VSAGE OV OFFICE des cercles.

Tous les cercles de la sphere, tans grands que petits, ont l'usage tel qui s'ensuit.

DE L'VSAGE DE l'Equateur.

I. **C**E cercle est la mesure & la regle du premier mobile.

Car sur ce cercle, on obserue que le premier mobile, fait son mouuement en 24. heures d'Orient en Occident, & qu'à cha-

que heure il monte 15. degrez de l'equateur sur l'horizon.

2. *Il mesure le temps.*

D'autant que le iour naturel, est déterminé par son circuit, en y adioustant toutesfois vne certaine petite partie, qui correspond à la partie du zodiaque, que le Soleil a fait de son propre mouuement vers l'Orient.

3. *Distingue les equinoxes.*

Cela est euident, car il coupe l'ecliptique au commencement du Belier, & de la Balance, là où se font les equinoxes quand le Soleil y est.

4. *Diuise le ciel en deux hemispheres, en l'hémisphere Septentrional, & l'hémisphere meridional.*

Estant vn grand cercle, il diuise donc la sphere en deux parties égales, dont l'une du costé du Septentrion, s'appelle hemisphère septentrional; & l'autre qui est vers le Midy, s'appelle hemisphère meridional.

5. *Donne à cognoistre qui sont les signes septentrionaux, & qui sont les meridionaux.*

Les signes qui sont en l'hémisphere septentrional, sont dits septentrionaux; & les autres qui sont en l'hémisphere meridional, sont dits meridionaux. Mesme le Soleil pendant qu'il est dessous ceux là, est dit septentrional, & quand il est sous ceux-cy, meridional.

6. Determine la quantité des iours, en toute position de la sphere.

Cela s'entend en la sphere droite, & en l'oblique, iusques à l'elevation de 66. degrez. Car par delà, il ne mesure plus la quantité des iours: cecy se verra plus aysément en l'usage de la sphere, cy apres.

7. Il est grandement utile à la Geographie pour la situation des lieux.

Car les lieux sont dits auoir autant de latitude, comme ils sont esloignez de l'equateur.

8. Sert grandement à la construction des cadrans.

Car par son mouuement reglé les espaces des heures sont rendues egales, & reglent l'inegalité des autres.

DE L'VSAGE DV ZODIAQUE, & ecliptique.

1. **S**ous l'ecliptique se font les eclipses du Soleil, & de la Lune.

Sçauoir, les eclipses du Soleil en la conjunction du Soleil & de la Lune. Et les eclipses de la Lune, quand le Soleil & la Lune sont opposez l'un à l'autre.

2. L'obliquité du zodiaque, au respect du pre-

mier mobile, est la cause de la vicissitude des saisons de l'année.

Car l'approchement ou esloignement du Soleil, de quelque region qui arriue, à cause de ceste obliquité, en augmentant ou diminuant la chaleur, fait les quatre saisons de l'année.

Pythagore, selon Plutarque, a esté le premier qui a obserué ceste obliquité. Et si on en veut croire Pline, ç'a esté Anaximander, encore qu'Oenopides Chius se l'attribue.

3. L'ecliptique est grandement vtile à l'Astronomie, pour determiner le lieu des estoilles.

Car la longitude des estoilles se prend sur l'ecliptique, & les estoilles sont dites auoir autant de latitude, comme elles sont esloignées de ceste ligne.

DE L'VSAGE DES COLVRES.

1. **L**es deux colures, monstrent les quatre poinets principaux du Zodiaque, que l'on appelle cardinaux, ausquels par le mouuement du Soleil, se font les plus grandes mutations de temps, le Prin-temps, l'Esté, l'Automne, & l'Hyuer.

Le commencement du Prin-temps, arriue quand le Soleil entre dans le Belier, qui est le 21. Mars: l'Esté quand il entre au signe

de l'Ecreuiffe, le 21. Iuin: l'Automne au signe de la Balance, le 24. Septembre: & l'Hyuer au signe du Capricorne, le 21. Decembre. Ce qui toutesfois se doit entēdre à peu pres, & non precisément, à cause de la diuerse quantité de l'an.

2. *Le colure des solstices, monstre les deux poincts des solstices, & le colure des equinoxes, les deux poincts des equinoxes.*

Les quatre poincts cardinaux, sont les deux des solstices, & les deux des equinoxes. Les solstices se font le Soleil entrant dans l'Ecreuiffe, & dans le Capricorne; l'un desquels se nomme le solstice d'Esté, l'autre le solstice d'Hyuer: Et les deux equinoxes se font le Soleil entrant dans le Belier, & dans la Balance, le premier desquels est nommé l'equinoxe du Printemps, l'autre l'equinoxe de l'Automne.

3. *Le colure des solstices, diuise les douze signes du zodiaque en signes ascendants & descendans.*

Les signes ascendants sont le Capricorne, le Verseau, les Poissons, le Belier, le Taureau, & les Gemeaux ainsi nommez à cause que le Soleil depuis le premier poinct du Capricorne, iusques à la fin des Gemeaux monte, & s'approche de nostre senith ou poinct vertical. Et les signes descendans sont l'Ecreuiffe,

le Lyon, la Vierge, la Balance, le Scorpion, & le Sagittaire, a cause que le Soleil courant par ces six signes, descend; c'est à dire, n'est pas si haut à midy, & par consequent se recule de nous.

4. Sur le colure des solstices, on y conte la plus grande déclinaison du Soleil; c'est à dire, le plus grand esloignement qu'il fait de l'equateur.

Car la plus grande déclinaison du Soleil est aussi grande, qu'est l'arc du colure des solstices, compris entre l'equateur & le point du solstice.

5. Le colure des solstices monstre aussi la distance des poles du zodiaque de ceux du monde.

Ceste distance est 10 iours égale à la plus grande déclinaison du Soleil; sçauoir, de 23. degrés, 28. minutes.

DE L'VSAGE DE L'HORIZON.

I. **I**L diuise le ciel en deux hemispheres, l'un visible, l'autre caché.

Cet vsage est manifeste, quand on est sur vne montagne, & que l'on regarde à l'entour de soy. Car pour lors la moitié du ciel est visible, l'autre cachée. Ce qui arriue par la diuision qu'en fait l'horizon.

2. La quantité du iour & de la nuit artificielle,

se prend à l'horizon.

La quantité du iour artificiel, est le temps que demeure le Soleil depuis son leuer iusques au coucher, qui se prennent à l'horizon, comme la nuit artificielle est le temps que le Soleil demeure sous terre, depuis son coucher iusques au leuer.




3. *Monstre le seiour que font les astres sur l'horizon.*

Il y a des astres qui sont proches du Midy, qui ne demeurent gueres apres estre leuez sur l'horizon sans se cacher. Ainsi voyons nous le Soleil tant plus il s'approche de ces quartiers-là, tant moins les iours estre grâds, & se coucher bien plustost, que quand il approche vers Septentrion.

4. *Monstre le leuer & coucher de toutes les estoilles.*

Le leuer & coucher des estoilles, c'est par fois le point de l'horizon d'où elles se leuent, & où elles se couchent, par fois aussi le degré du Soleil, qui se leue & se couche quand & elles, dequoy nous traiterons en l'usage de la sphere.


5. *Monstre quel degré du zodiaque se leue avec chaque estoille.*



Ceux qui ont la
sphere droite, peu-
uent voir leuer tou-
tes les estoilles, à
cause qu'il ny a au-
cune partie du ciel
qui ne se leue à leur
respect. Ceux qui ont
la sphere parallele

n'ont aucun leuer ny coucher d'estoille. Et
ceux qui ont la sphere oblique, selon qu'ils
l'ont plus ou moins, en voyêt vne plus gran-
de ou moindre partie. Ainsi l'estoille de Ca-
nopus qui à peine peut estre veüe à Rhodes,
paroist à Alexandrie.

6. Manifeste quelles sont les estoilles qui pa-
roissent tousiours, & qui sont celles que l'on ne
voit iamais.



Voyez la precedente explication, les estoiles qui sont tousiours sur l'horizon sans se coucher ny leuer, les Astronomes les appellent, estoiles de perpetuelle apparition, & celles qui

sont tousiours cachees au dessous de l'horizon, estoiles de perpetuelle occultation. Les Grecs comprennent celles-là dans leurs cercles arctique comme nous auons dit, & celles-cy dans leur cercle antarctique, lesquels s'agrandissent ou s'appetissent selon l'obliquité de la sphere.

7. L'horizon est coupé en huiet endroits, par le meridien, equateur, & deux tropiques. Les deux endroits, où le meridien le coupe, s'appellent le Septentrion, & le Midy: où l'equateur le coupe, l'Orient & Occident de l'equinoxe, qui sont les quatre parties plus principales: les quatre autres se font aux sections des tropiques, deux à celui de l'Ecreuisse, que l'on nomme l'Orient & l'Occident d'Esté, les deux autres à celui du Capricorne, qui sont l'Orient & l'Occident d'Hyuer.

Les quatre parties principales du monde se prennent donc en l'horizon; mais les qua-

tre autres, comme l'Orient & Occident d'E-
sté; & l'Orient & Occident d'Hyuer, ne s'y
peuvent pas tousiours prēdre, à cause qu'au-
cunes fois les tropiques ne coupent aucune-
ment l'horizon comme il arriue, par delà l'e-
leuation de 66. degrez. Ceste diuision tou-
tesfois sur l'horizon faite par ces quatre cer-
cles, a esté cause que les anciens Grecs & La-
tins constituoient seulement huit vents, sça-
uoir, deux à la section du meridien, deux à
la section de l'equateur, deux à la section du
tropique de l'Ecreuisse, & deux autres à la
section du tropique du Capricorne. Mais les
nouveaux y en content 32. également distans
les vns des autres.

DE L'VSAGE DE L'HORIZON sensible.

L'*Horizon sensible, monstre comme necessai-
rement la terre est ronde.*

Car si elle estoit plate, comme quelques
vns ont voulu dire, outre plusieurs absurdi-
tez qui s'ensuiuroient, on pourroit voir tou-
te la terre d'un seul lieu. Et si elle estoit de
toute autre figure, les demy diametres de
l'horizon sensible seroient inegaux, & ver-
roit-on plus loin d'un costé que d'autre.

2. Denote aussi combien grande est la distance sur la terre, où les phænomenes du ciel ne se changent.

C'est le sujet pourquoy les anciens ont mis cét horizon sensible, iugeant estre vne chose absurde, de changer d'autant d'horizons que l'on changeroit de pas: & pariant ont donné au demy diametre de ce cercle 400. stades, en l'estenduë desquels le leuer & coucher des astres, la hauteur du pole & du Soleil, sont peu sensibles.

DE L'VSAGE DV MERIDIEN.

IL diuise les iours & les nuiëts en deux parties egales.

Car il y a tout autant de temps depuis le leuer du Soleil iusques à midy, que du midy iusques au coucher: & autant depuis le Soleil couché iusques à minuiët, que de minuiët iusques au Soleil leué.

2. Tant plus les estoilles approchent du meridiën, tant plus sont elles esleuées sur l'horizon.

Comme on voit les estoilles petit à petit se leuer sur l'horizon, ainsi quand elles sont arriuees sous le meridiën, elles s'abaissent apres de pareille façon vers le coucher.

3. Monstre combien le Soleil & les estoilles sont

fléuées à midy, & minuiét sur la terre.

Car l'arc du meridien compris entre l'horizon & le Soleil, où l'estoille monstre la hauteur meridienne du Soleil, ou de l'estoille.

4. Selon les Astronomes, le commencement du jour naturel est au meridien.

Les Babyloniens commencent leur iour au leuer du Soleil, les Atheniens & Italiens au coucher, les Ægyptiens & Chrestiens à minuiét, les Astrologues à midy.

5. Distingue la partie du monde Orientale & Occidentale.

Encore qu'il n'y ayt point proprement d'Orient & d'Occident au monde, à cause du mouuement du Soleil circulaire, si est-ce qu'au respect d'un lieu les vns peuuent estre dits Orientaux, les autres Occidentaux. Ainsi la France est Occidentale au respect de l'Italie, mais elle est Orientale au respect de l'Espagne.


DE L'VSAGE DV MERIDIEN sensible.

LE meridien sensible marque combien grande est l'estendue de la terre vers le leuant & le couchant, où les phænomenes du ciel demeurent semblables.

Encore que le meridiē sensible soit au ciel, sia-il quelque raport à la superficie de la terre qui luy est sēblable au dessous d'iceluy. Ce-
minius ne le constituē variable qu'apres auoir
varié vers l'Orient ou l'Occident de 400. sta-
des de distance, qui sont quelques 25. lieues,
tout autant qu'il en a constitué à l'horizon
sensible. Apres lequel changement plusieurs
apparences celestes se changent, comme la
hauteur du Soleil & des astres, la latitude de
la region, le leuer & coucher des estoilles, la
grandeur des iours & des nuits.

DE L'VSAGE DES TRO- piques.

I. **L** Es deux tropiques enferment la route ordi-
naire du Soleil, & en sont comme les bor-
nes, au delà desquelles il ne s'estoigne point.



Depuis vn tropi-
que iusques à l'au-
tre, le Soleil fait en-
viron 182. reuolu-
tions & demy, &
autant auant qu'il
soit retourné d'où il
est party, & ceste
espace de temps de-

termine l'année solaire.

2. *Les deux tropiques monstrent où le Soleil fait le plus long iour d'Esté, & le plus petit iour de l'Hyuer.*


Le iour est le plus grand en la sphere oblique quand le Soleil est au tropique d'Esté, & la nuit plus petite, pource que la plus grande partie de ce cercle paroist sur l'horizon, & la plus petite est cachée; & au contraire, le iour est plus petit, & la nuit plus grande au tropique d'Hyuer, pource que la plus petite partie est sur l'horizon, & la plus grande au dessous.

DE L'VSAGE DES POLAIRES.

L*Es cercles polaires monstrent quelle est la distance entre les poles du monde & du zodiaque.*

Les polaires des Grecs n'auoient pas cet vsage là, mais aussi en auoient vn autre, qui estoit de monitrer la partie du ciel qui estoit tousiours visible, & qui ne se couchoit iamais, & qui estoit celle que l'on ne pouuoit voir, & qui ne se leuoit point.

2. *Les cercles polaires, avec les deux tropiques, diuisent la superficie du ciel en cinq bandes, que les anciens ont nommé zones.*



Les Grecs appellent *zones*, comme s'ils disoient ceintures, pource que ces *zones* entourent le ciel en façon de ceintures, ils en nommoient vne torride entre les deux tropiques, deux froi-

des dans l'entour des cercles polaires, & deux tempérées entre les polaires & tropiques, desquelles nous traiterons cy-apres en autre endroit.

DE L'VSAGE DES CERCLES verticaux ou azimuths.

L Es deux principaux azimuths diuisent l'hémisphère supérieur en quatre parties, que l'on appelle *quartes*.

Pour voir cela facilement, prenez la sphere, & ioignez l'equateur avec l'horizon. En apres, mettez vne des colures sous le meridiem, lors vous verrez que l'hémisphère est diuisé en quatre parties, par les deux colures qui representent les deux principaux azimuths, & la partie qui est entre le Septentrion & l'Orient, s'appelle *quarte Septentrionale*.

trionale Orientale: celle qui est entre l'Orient & le Midy, quarte Orientale Meridionale: celle qui est entre le Midy & Occident, quarte Meridionale Occidentale: & finalement celle qui sera entre l'Occident & Septentrion, se nomme quarte Occidentale Septentrionale.

2. *Ils monstrent en quelle partie du monde sont les astres, & combien ils sont distans d'icelles.*

Cela est aisé à concevoir; car si vne estoile se trouue entre le vertical, qui passe par le Septentrion, & celui qui passe par l'Orient (que d'aucuns appellent premier azimuth) on dira qu'elle sera en la partie du monde Septentrionale Orientale: Si elle estoit sous l'un d'iceux, elle seroit dite absolument Septentrionale ou Orientale. Et si elle en estoit esloignée de trois ou quatre azimuths, on diroit qu'elle seroit esloignée de trois ou quatre degrez, selon la partie du monde où elle se trouueroit.

DE L'VSAGE DES CERCLES de hauteur, ou Almucantaraths.

I. *Ces cercles monstrent la hauteur des astres sur l'horizon.*

C'est bien la verité, que la hauteur des

astres se prend sur les verticaux: Mais l'arc du vertical compris entre l'horizon & l'Almucantarath, & celuy-là qui la determine aussi.

2. *Avec les cercles Verticaux ils seruent, pour cognoistre les estoilles qui sont à la sphere, & pour assigner le vray lieu qu'elles ont au ciel.*

Car la sphere artificielle estant disposée selon les parties du monde (comme il sera enseigné cy-apres au V.liure) les verticaux monstreront en quelle partie du ciel sont les astres, & combien ils sont distans du commencement d'icelles: Et les almucantarats, quelle est leur éléuation, qui ensemble determineront précisément le lieu qu'ils occupent au dessus de l'horizon.

DE L'VSAGE DES CERCLES de longitude.

I*ls monstreront quelle est la longitude des estoilles.*
Pour bien entendre cecy, il faut auoir vn globe celeste, où l'on verra que le cercle de longitude qui passe par le commencement du Belier, est le premier: & que les estoilles qui sont sous iceluy, n'ont aucune longitude: Mais autant qu'ils s'en esloignent, selon l'ordre des signes, ils sont dits en auoir au-

tant qu'il y a de degrez de l'ecliptique, compris entre le premier cercle de longitude, & de celuy de l'estoille.

2. On cognoist par leur moyen en quel signe sont les planetes & estoilles.

Pource qu'il y a six cercles de longitude qui passent par les commencemens des douze signes (comme on peut voir au globe celeste) qui partissent toute la superficie du ciel en douze parties ; chaque estoille est dite estre au signe, lequel est compris entre deux demy cercles de longitude.

DE L'USAGE DES CERCLES de latitude.

Ils monstrent quelle est la latitude des estoilles.

Encore que la latitude des estoilles (qui est la distancé qu'elles ont de l'ecliptique) se prenne sur les cercles de longitude, si est-elle bornée par les cercles de latitude, qui sont parallels à l'ecliptique.

2. Avec les cercles de longitude ils seruent à la fabrique des globes celestes, & à cognoistre le vray lieu des estoilles.

Car le vray lieu de l'estoille se trouue sur le globe à la section des deux cercles de lon-

DE L'VSAGE DES CERCLES
de declinaison.

Ces cercles monstrent quelle est la declinaison
des planetes & des estoilles.

Encore que la declinaison des estoilles (qui
n'est autre chose que la distance qu'elles ont
de l'equateur, se prenne sur les meridiens, si
est-elle terminée par les cercles de declinaison,
qui sont parallels à l'equateur.





LIVRE SECOND.

Jusques icy nous auons expliqué toutes les parties de la sphere artificielle, pour auoir plus facile intelligence de la sphere naturelle, de laquelle nous traiterons icy.

DE LA SPHERE NATURELLE.

LA Sphere naturelle est diuisée en deux parties: en la Region Etherée, & la Region Elementaire.

La region etherée est la partie du monde, qui comprend les orbes celestes, que l'on appelle cieux: & la region elementaire, est celle qui contient les Elemens.

SYSTEME DE L'VNIVERS, comprenant l'une & l'autre region.

LA region etherée est composée de dix ciexx : à sçauoir, du dixiesme ou premier mobile, du neufiesme ou Crystallim, du huitiesme ou Firmament, du ciel de Saturne, de Iupiter, de Mars, du Soleil, de Venus, de Mercure, & de la Lune.



I'aduertiray icy en peu de mots ceux qui

sont cupides de ces sciences, qu'il n'est pas
nécessaire de croire que les suppositions
Astronomiques soient vrayes, il suffit qu'el-
les soient vray semblables. Car en effect, s'il
y auoit de la verité, elles seroient vne, & non
diuerfes, comme il appert par les diuerfes
conceptions de diuers Autheurs. Cependât,
l'inuention des Astronomes est à louer, d'a-
uoir excogité ces orbés concentriques, ec-
centriques, & ces epicycles aux mouuemens
des cieux, pour rendre raison des apparen-
ces celestes. Mais d'autant que les vns ont
procedé d'une façon, les autres d'une autre,
i'ay suiuy icy la plus commune opinion, qui
est celle d'Alfonse, pour n'auoir encore
rien d'assez resolu, selon les hypotheses
nouuelles. Ioinct à cela, que ceux qui ap-
prennent, conçoient plus aysément la sim-
plicité de ces cercles, que la multiplicité des
concentriques, ou systemes nouuellement
inuentez, ny finalement ceste fluidité des
cieux, par le milieu desquels il y en a qui veu-
lent que les astres soient portez par vne na-
ture interne qui les conduit.


QUE LES DIVERS MOUV-
emens que l'on a obserué aux corps
celestes, ont esté cause que l'on
a supposé plusieurs Cieux.

LES obseruations ont fondé ceste hypo-
these comme les autres. Car on a veu
que les corps celestes n'estoiēt pas tousiours
en pareilles distances entr'eux, & que le So-
leil, la Lune, & autres planetes, s'appro-
choient & s'esloignoient par fois de quel-
ques estoilles fixes, & de nous pareillement.
Qui a esté cause que les Astronomes ont dit
qu'il y auoit plusieurs cieux, pour auoir ob-
serué plusieurs sortes de mouuemens.

DES DEUX MOUVEMENS
contraires qui sont aux cieux.

IL y a deux sortes de mouuemens aux
cieux, l'un qui se fait d'Orient en Occi-
dent par le Midy, qui appartient au ciel plus
esloigné, & s'appelle mouuement premier,
ou mouuement rapide, pource qu'il entrai-
ne quant & soy tous les cieux inferieurs.
L'autre qui est au contraire du premier d'Oc-

cident en Orient, est dit mouuement secōd,
& est propre à tous les cieux inferieuts. Mais
comme il n'y a guere d'hommes au monde
qui n'ayt obserue le premier, aussi s'en trou-
ue-il fort peu qui ayent obseruē le second:
Ce que toutesfois il est aisē de remarquer au
mouuemēt de la Lune, en vne mesme nuit:
Car si on considere combien elle est distan-
te de quelque estoille qui se leue apres elle,
on trouuera auant qu'elle se couche, qu'elle
sera moins esloignée qu'elle n'estoit à son le-
uer, à cause du chemin qu'elle aura fait de



son cours naturel pendant ce temps-là. On
pourra faire la mesme obseruation en tous
les autres planetes, quoy qu'avec plus de
temps & de difficulté.

DV NOMBRE DES CIEUX.


IL y a icy, comme en toute autre doctrine, de la variété, les vns constituant huiët cieux dans la sphere naturelle, les autres neuf, les autres dix, & les autres onze. La variété vient en partie des obseruations, en partie aussi des diuerfes suppositions & hypotheses. Iusques au temps d'Aristote, on s'estoit contenté du nombre de huiët, à cause des huiët mouuemens diuers, que seulement on auoit obserué aux corps celestes. Mais comme les sciences se perfectionnent avec le temps, quand on a recogneu apres vne longue suite d'annees, que les estoiles auoiēt vn mouuement different de celuy du monde, on a esté forcé pour ne dōner deux mouuemens contraires à vn corps simple (comme sont les cieux) de supposer vn neufiesme ciel imaginaire au dessus, qui comme premier mobile, emportoit par sa rapidité tous les autres avec soy. Et pour le mesme sujet, y a-on adiousté encore du depuis vn dixiesme, apres que l'on a recogneu qu'il y auoit trois mouuemens differens au Firmament: Voyla ce qu'ont fait les obseruations. D'autre part, les diuerfes hypotheses que les

Astronomes ont excogité, pour rendre raison des apparences selon leur phantasie, ont confondu aussi ce nombre, les vns asseurant qu'il n'y a que huict cieux, mais que la terre est mobile: les autres neuf, avec la terre ferme: les autres ostant entierement la solidité des cieux que les precedens auoient estably, se sont contentez des reuolutions seules, & ont fait aller les astres parmy la region etherée, comme les oyseaux volent en l'air, & les poissons coulent en l'eau: & tout cela avec tant de varieté, que ce seroit chose superflue, que de vouloir rapporter icy toutes les diuerses opinions. Pour trancher court, nous dirons, se'on l'opinion la plus receüe, qu'il y a dix cieux, qui s'environnent les vns les autres au dessus de la region elementaire: le premier desquels & le plus bas, est celui de la Lune, puis celui de Mercure, de Venus, du Soleil, de Mars, de Iupiter, de Saturne, le Firmament où sont les estoilles fixes: le neuuesme ciel qui est sans estoilles, & le dixiesme & dernier de tous, qui est le premier mobile.

DE L'ORDRE DES CIEUX.


D'Autant qu'au temps passé il y a eu des opinions diuerſes, touchant l'ordre & diſpoſition des cieux, les vns ayant mis le Soleil & la Lune au deſſus des autres planetes, comme y ayant quelque authorité. D'autres comme Platon, aſſeurant que les luminares eſtoient les plus proches de la terre, pour y decouler avec plus d'eſſect leurs influences. Quelques vns, comme Democrite, voulans que Mercure fut le plus haut élevé, à bon droit on pourroit demander comment on a eſtably l'ordre des cieux. Mais en voicy les raiſons: premierement, les eclipses y ont grandement ſeruy. Car c'eſt vne choſe manifeſte, que l'eſtoille qui nous empesche que nous n'en voyons vne autre, eſt la plus proche de la terre. Et partant on a tenu pour aſſuré, que le ciel de la Lune eſtoit le plus bas, puis que la Lune cachoit tous les autres planetes, & qu'aucun n'en empeschoit la veuë d'icelle. Pour la meſme cauſe, on a mis le Soleil au deſſus de la Lune, & de Mercure auſſi, que l'on a veu dans le corps du Soleil. La ſeconde raiſon, eſt tirée du mouuement des planetes. Car ſi on preſuppoſe que les

planetes vont à peu près aussi vistes l'un que l'autre, il est nécessaire que ceux que nous voyons estre plus long temps à faire leurs cours au tour du monde, soient les plus esloignez de la terre: Et ainsi Saturne le sera plus que Iupiter, & Iupiter plus que Mars, & ces trois plus esloignez que les quatre autres. Tiercement, on en peut encore tirer quelque consequence par les ombres, que le stile perpendiculaire fait sur vne superficie plane (en effect, ou par imagination, c'est à di-



re, par le moyen du rayon visuel. Car si le Soleil & la Lune sont par exemple en mesme degré de hauteur sur l'horizon, l'ombre de la Lune s'estendra plus loing que celle du Soleil. Mais la plus certaine preuue, & qui determine plus asseurement les distances que

tous les astres peuuent auoir au respect de la terre, est le parallaxe. Car selon qu'ils seront près ou loing de la terre, le parallaxe sera plus grand ou plus petit, & s'il ne s'en trouue



point, c'est vn indice certain, que le corps est tres-esloigné. Et partant, la Lune a esté mise la plus basse, pour auoir vn plus grand parallaxe: le Soleil plus haut, pour n'en auoir pas tant: & Mars encore plus long, pour l'auoir comme insensible.

DES PERIODES DES CIEUX.

Tous les cieux font vn circuit au tour de la terre, comme au tour de leur centre. Mais plus ils sont distans d'icelle, plus sont-ils long-temps à parfaire leur periode. La Lune comme estant au ciel le plus bas, & plus proche de la terre, fait sa reuolution en

27. iours & huit heures: Mercure, Venus, & le Soleil, en 365. iours & six heures: Mars en deux ans, ou enuiron: Iupiter, en douze: Saturne, en trente: le Firmament, en 7000. ans: le neufiesme ciel, en 49000. ans: & le dixiesme ciel, d'un mouuement tout au contraire de tous ceux, en 24. heures, ou en vn iour naturel.

DES DISTANCES DES CIEUX.

Comme les Geometres se seruent de la toise & de la perche, pour mesurer toutes sortes de grandeurs sur la terre: Ainsi les Astronomes ont pris le demy diametre de la terre, pour mesurer les distances des cieux. & disent que le ciel de la Lune est esloigné du centre de la terre de 33. demy diametre: celui de Mercure de 64. celui de Venus de 167. celui du Soleil de 1121. celui de Mars de 1216. celui de Iupiter de 7852. celui de Saturne de 14373. le Firmament de 22612. Et si les plus petites estoilles sont de mesme grosseur que les plus grandes, & qu'elles paroissent seulement plus petites, pource qu'elles sont plus esloignées depuis le centre de la terre iusques à icelles 45225. demy diametres, qui est vn si grande distance, que si

nostre premier pere, viuoit encore, & que depuis sa creation il eust fait tous les iours dix-huict lieues vers les cieux, encore de present ne seroit il arriué iusques a la concavité du huitiesme ciel. Et diray dauantage, pour représenter combien les estoilles sont esloignées de nous: Que si vne balle de canon estoit au lieu où elles sont, & qu'elle vint à tomber, quand elle descendroit à chaque heure deux cens lieues de bas, si mettroit-elle plus de quinze ans auant qu'elle tombast sur terre. De la distance des Cieux qui est icy mise, on pourra voir quelle est l'épaisseur de chaque orbe, ou ciel, en ostant la moindre distance de la plus grande qui la suit: Comme si on oste 33. de 64. restent 31. & d'autant de demy diametres est l'épaisseur du Ciel, de la Lune, & ainsi des autres.

DE LA VITESSE ET RAPIDITÉ des Cieux.

EN supposant que la terre est immobile, il est necessaire que les cieux se meuuent: mais leurs mouuemens seront bien plus rapides aux vns qu'aux autres. Car tous les cieux ayant à circuir la terre en 24. heures, il s'ensuit que les plus esloignez iront beaucoup

coup plus viste que ceux qui seroient prés, comme ayant à faire plus de chemin: Et par ce moyen la Lune comme la plus basse va plus lentement que ne fait le Soleil; Le Soleil, beaucoup plus viste: Saturne, encore dauantage: Et le Firmament, où sont les estoilles fixes, court d'une telle rapidité, principalement au milieu du ciel, que Cardan apres auoir obserué que le poux d'un homme temperé se meut en vne heure enuiron 4000. fois, assure qu'en l'espace d'un de ces mouuemens d'artere, vne estoille qui seroit sous l'equateur, feroit 2264. lieues Françoises, qui est vne vitesse si grande, que la bale d'un canon ne la scauroit égaler. Et à ceste cause, plusieurs Astronomes iugeant ce mouuement-là estre absurde & incompatible avec la nature, ont mieux aymé, pour sauuer les apparences celestes, supposer que la terre est mobile.

DV DIXIESME CIEL.

LE dixiesme ciel est celuy qui est le plus esloigné de la terre, qui fait son tour en 24. heures d'Orient en Occident par le Midy, & qui de sa rapidité entraîne quant & soy tous les ciens inferieurs.

Il n'est pas besoin d'employer aucuns discours touchant les parties de ce ciel, ayant esté suffisamment descrites au liure precedent. Car tous les cercles de la sphere qui cy-deuant ont esté definis, sont cercles qui sont tous au dixiesme ciel. On obseruera seulement que ce ciel est celuy-là qui donne le bransle à tout l'vniuers, que l'on nomme le mouuement du monde, contre lequel tous les autres cieux cheminent obliquement, sans toutesfois le pouuoir empescher, qu'il ne leur fasse faire vn tour quant & luy malgré eux, comme l'experience iournaliere le tesmoigne.

DV NEVFIESME CIEL.

LE neufiesme ciel est vn ciel imaginaire, qui n'a aucune estoille non plus que le dixiesme, auquel il est contigu, qui fait sa reuolution en 49000. ans.

Si on suppose, pour maxime, qu'un corps simple ne peut auoir qu'un mouuement naturel, & quand il en a plusieurs, qu'il est necessaire que les autres se fassent par accident: Ce n'est pas sans sujet, que les Astronomes ont adiousté au dessus du Firmament deux autres Cieux, pour rendre raison des trois

monuemens qui s'obseruent aux estoilles
fixes.

DES MOVVEMENS DV NEUF- siesme ciel.


IL y a deux sortes de mouuemens au neufiesme
ciel; l'un tres-viste, d'Orient en Occident; &
l'autres tres-lent, qui vatout au contraire.

Le premier mobile n'a eu qu'un mouue-
ment; le neufiesme ciel qui luy est contigu
en a deux, l'un prouenant du ciel superieur
(qui agit sur l'inferieur) qui luy fait faire vn
tour en 24. heures sur les poles du monde.
Et l'autre qui luy est particulier d'Occident
en Orient sur les poles du zodiaque du dixié-
me ciel, lequel n'acheue son circuit qu'en
l'espace de 49000. ans. Ce periode s'appelle
la grande année, à la fin de laquelle les Phi-
losophes du temps passé se sont imaginez,
que toutes choses reuiendroient à prendre le
mesme estre qu'ils ont eu, & que de rechef
ce grand Achille seroit renuoyé pour com-
batre à Troyes.

DV ZODIAQVE DV NEUF- fiesme ciel.

LE zodiaque du neufiesme ciel, est vn grand cercle directement au deffous de celuy du dixiesme, qui fait en vn an, d'Occident en Orient, enuiron 44. minutes regulierement.

Ce zodiaque n'a point d'estoilles, non plus que celuy du 10. ciel. Neantmoins les douziesmes parties d'iceluy, ne laissent pas d'estre appellées signes: où est à noter, que



du temps de l'incarnation de Iesus-Christ, les commencemens du Belier du dixiesme &

neufiesme cieux estoient l'un sous l'autre qui pour le iourd'huy se sont auancez d'environ de 11. degrez , & 30. minutes.

DV HVICTIESME CIEL.

LE huitiesme Ciel ou Firmament , est le ciel des estoilles fixes , qui fait sa reuolution en 7000. ans.

L'espace de la vie de l'homme n'ayant esté suffisant pour remarquer le mouuement des estoilles fixes , a esté cause que longuement il a esté ignoré. Hypparchus fut le premier qui soigneusement s'y addonna , & ayant comparé les obseruations qu'il auoit faites du lieu des estoilles avec celles de Timocharis , qui l'auoit precedé de quelques 56. ans, recogneut en fin qu'elles auoient vn mouuement tres-lent d'Occident en Orient. Ce que Ptolemee , qui vint 280. ans après Hypparchus , confirma, asseurant qu'en cent ans les estoilles faisoient vn degré ; & par consequent , que le periode de ce mouuement estoit de 36000. ans sur les poles du zodiaque : Voyla quelle en a esté l'opinion iusques en ce temps-là. Mais pource que l'on a recogneu du depuis que le mouuement des estoilles n'estoit pas réglé , & que par fois il estoit

plus viste, par fois plus tardif, par fois stationnaire, & par fois retrograde, selon la diuersité des siècles, on a esté contraint d'auoir recours à d'autres hypotheses, pour sauuer les apparences celestes. Thebit fils de Corat, de nation Iuif, en excogita de nouuelles, lesquelles iaoit qu'elles ne puissent rendre raison de tous les phénomènes celestes, si a-il frayé le chemin à ce grand Alfonse dixiesme Roy de Castille, d'inuenter les siennes, qui sont beaucoup plus conformes au mouuement du Firmament. Que si elles ne satisfont encore exactement, au moins donneront-elles peut-estre occasion à quelque bel esprit d'en supposer d'autres, qui seront plus certaines. Cependant on se contentera de celles cy.

DES TROIS MOVVEMENS qui s'obseruent aux estoilles fixes.

IL y a trois sortes de mouuemens aux estoilles: le premier, tres-viste; sçauoir, le iournal: le second, qui est tres-lent: & le troisieme, de trepidation, qui luy est particulier.

Le premier mouuement est tres-manifeste, estant celuy qui se fait d'Orient en Occident sur les poles du monde en 24. heures,

par la rapidité du dixiesme ciel. Le second est celuy qui se fait d'Occident en Orient sur les poles du zodiaque, à chaque centaine d'année, s'avançant de 44. minutes & 4. secondes, son periode est de 49. mille ans, & est causé par le tardif & progrès du neufliesme ciel. Le troisieme, qui luy est particulier, merite bien d'estre descrit particulierement.

DV MOVVEMENT DE
trepidation.

LE mouvement de trepidation est vn mouuement propre aux estoilles, par lequel ils s'approchent & s'esloignent du Midy & du Septentrion.



Ce mouuement se fait sur deux petits cercles de 18. degrez de diametres, qui ont pour centre les commencemens du Belier & de la Balance du neufiesme ciel, & leurs circonferences descrites par les commencemens du Belier & de la Balance du huitiesme. Ils font vn tour en 7000. ans, durant lequel temps les ecliptiques se coupent diuersement, & par fois sont vnies ensemble. Par ce mouuement le commencement du Belier du huitiesme ciel, va pour le temps present encore selon l'ordre des signes, & est distant de celuy du 9. de 8. degrez ou environ, & de l'interfection vernale, ou Belier du premier mobile de quelques 21. degrez.

DV ZODIAQVE DV HUITIESME ciel.

IL y a trois zodiaques; l'vn au dixiesme ciel, sous lequel directement est celuy du neufiesme: Et finalement, le zodiaque du Firmament. D'où s'ensuit qu'il y a trois ecliptiques aux cieux, celles du premier mobile, & neufiesme ciel, qui sont estimées comme vne seule, pour estre l'vne au dessous de l'autre, & s'appellent ecliptique fixe, ou immuable, d'autant qu'elles ne s'escartent en vn temps plus qu'en l'autre de l'equateur. Et

celle du huitiesme ciel, qui est dite mobile, pource qu'elle ne garde semblable distance avec l'equinoctial, mais s'en esloigne, & approche plus ou moins, selon le mouuement propre du Firmament, qui se fait sur ces deux petits cercles, qui ont pour centre les commencemens du Belier & de la Balance du neufiesme ciel. Elle est aussi appelée la vraye ecliptique, pource que c'est sous celle-là que se font les eclipses, & que le Soleil tourne continuellement. Et au respect de laquelle le lieu de toutes les estoilles & planetes se considere; l'ecliptique immuable n'estant supposée que pour regler l'irregularité de la vraye, qui est muable.

DE LA SECTION DES ecliptiques.

ILy a deux choses dignes de remarque au mouuement de trepidation. La premiere, que les trois ecliptiques sont rarement en mesme superficie plane. Celle du huitiesme ciel, faisant le plus souuent vne declinaison notable d'avec les deux superieures qui sont ioinctes ensemble. L'autre, que l'ecliptique du huitiesme ciel, qui est celle sous laquelle le Soleil chemine, coupe l'equateur

en diuers endroits , à cause de sa mutabilité. Et que par conſequent , les ſections equinoxiales qu'elle fait avec ce cercle , ſont variables , & différentes de celles que fait l'ecliptique du premier mobile , qui ſont fixes. Auffi par fois vont elles les premières , par fois vont-elles apres.

DES ESTOILLES.

V*Ne eſtoille eſt la partie la plus denſe & plus lucide de ſon ciel.*

Les anciēns en ont nombré iuſques à 1022. qu'ils ont nommées fixes , pource qu'elles n'ont aucun mouuement déreglé ; mais gardent entr'elles touſiours pareilles diſtances, comme ſi elles eſtoient fichées dans le Firmament : ou comme d'autres veulent, pource qu'elles ſont emportées d'un mouuement tres-tardif, que les Aſtronomes ont reconnu par pluſieurs obſeruations faites en long eſpace de temps.

DES ASTERISMES.

A*ſteriſme ou conſtellation eſt vne quantité d'eſtoilles fixes, repreſentant par leur ordre ou diſpoſition l'image de quelque choſe.*

Les Phœniciens pour mieux cognoistre
es estoilles, les ont distinguées en certaines
classes, qu'Hipparchus nomme asterismes,
& les Latins constellations. Desquelles il y
en a douze au zodiaque; sçavoir, le Belier,
ou Iupiter Ammon: le Taureau, porteur
d'Europe, ou Io: les Gemeaux, ou Castor
& Pollux: l'Ecreuisse: le Lyon Nemeen: la
Vierge, ou Ceres: la Balance: le Scorpion,
ou la grande beste: le Sagittaire, ou Chiron:
le Capricorne, ou bouc marin: le Verse-eau,
ou Deucalion: les Poissons, ou les enfans de
Derceto. Et entre le zodiaque & pole Sep-
tentrional vingt & vne: sçavoir, la Cynosu-
re, ou petite Ourse: Helice, ou la grande
Ourse: le Dragon, ou gardien des Hes-
perides: Cephée, ou lasides: le Bou-
vier, ou gardien del'Ourse: la Couronne de
Vulcan, ou de Thesée: Hercules, ou Pro-
methée: la lyre d'Orphée, ou Vautour tom-
bant: le Cygne, ou la Poule: le Throsne
Royal, ou Cassiopée: Persée, ou porteur
du chef de Meduze: le Chartier, ou Erich-
thon: le Serpentaire, ou Esculape: le Serpent:
le Dard, ou Demon meridien: l'Aigle rauif-
seur de Ganimede: le Dauphin porteur d'A-
rion: le Cheualet: Pegase, ou Bellerophon:
Andromede, ou la femme enchantée: le

Triangle, ou Deltoton. Et quinze vers la partie Australe: c'est à sçauoir, la Balene, ou monstre marin: Orion, ou le furieux: l'Eridan, ou fleuue d'Orion: le Lievre: le petit chien: le grand chien, ou Canicule: la nauire de Iason, ou chariot de mer: le Centaure ou Minotaure: la Tasse, ou la cruche: le Corbeau, ou oyseau de Phœbus: l'Hydre, ou Couleuvre: le Loup, ou la Panthere: l'Autel, ou l'Encensoir: la Couronne meridionale, ou rouë d'Ixion: le Poisson meridional, ou solitaire. Et finalement douze autres qui ont esté remarquées par ceux qui ont nauigé vers le pole antarctique: sçauoir, le Paon, le Toucan, la Gruë, le Phœnix, la Dorade, le Poisson volant, l'Hydre, le Cameleon, l'Abeille, la Mouche Indienne, le triangle Austral, & l'Indien. Dans lesquelles constellations, nouuellement descouvertes, on y compte 561. estoilles.

DV SEPTIESME CIEL.

LE septiesme Ciel est contigu au Firmament, & contient le planete de Saturne, le plus haut de tous, de couleur de plomb, froid & sec, qui est 91. fois plus gros que la terre.

Ciceron pense que planete soit dit par an-

aphrase, comme estoille, qui n'erre aucune-
ment. Mais les Astronomes plus à propos
disent qu'ils sont ainsi nommez, faisant com-
paraison aux estoilles fixes, pource que leur
mouvement est plus diuers. Car planete en
Grec, vaut autant à dire que *errant*.

DES PLANETES.

VN planete est vne estoille adherante en vn orbe celeste, au deffous du huietiesme ciel, qui estant tousiours sous le zodiaque, ne laisse de heminer diuersement.



Il y a sept cieux au deffous du Firmament, & partant sept planetes, desquels les trois plus hauts s'appellent les planetes superieurs, les trois plus bas les planetes inferieurs; le Soleil comme leur Roy & modérateur, & le plus luisant est au milieu.

DE LA DIFFERENCE ENTRE les estoilles & planetes.

Qui veut bien cognoistre les estoilles, doit commencer par la cognoissance des planetes, dit Cardan, pour ne les point confondre avec les estoilles fixes. Ce qui sera facile, sçachant premierement que les planetes ne brillent point comme font les estoilles, qui brillent tantost plus, tantost moins, à cause de la grande distance qu'elles ont de la terre, & des corps diaphanes qui se trouuent interposez entr'eux & nous. Secondement, que les planetes ne gardent pas tousiours entr'eux pareilles distances, ny au respect des estoilles. Tiercement, ceux qui sont accoustumez à regarder au Ciel, distinguent aysement vn planete d'auec vne estoille, pource que les planetes leur apparoiſſent plus bas que les estoilles du Firmament.

DE LA DIFFERENCE
entre les planetes.

IL n'y a personne qui ne cognoisse premierement le Soleil & la Lune, si ce ne sont les fols & les aueugles. Pour Venus c'est la plus claire estoile, & la plus grande qui soit au ciel, & si pleine de lumiere, que souuent les corps jettent des ombres à sa splendeur. Elle se voit aucunes fois de iour, quand elle est à sa plus grande elongation du Soleil. Iupiter n'est pas beaucoup different de la grandeur de Venus : mais il n'est pas si loissant, & puis il est aisé de le distinguer d'auec elle, pourceque Venus ne s'esloigne iamais du Soleil plus de 48. degrez, où Iupiter est distant par fois de la moitié du ciel.

Quand est du planete de Mars, c'est comme vn petit feu rouge, qui esclatte & semble briller par fois, mais on ne le prendra iamais pour Iupiter, ny pour Venus, à cause de sa petitesse, de sa rougeur, & de son obscurité. Saturne n'est pas beaucoup esloigné en apparence de la grandeur de Mars : mais estant paille, & de couleur de plomb, & courant par vn ciel plus esleué, il sera facile de la discerner des autres. Pour Mercure il est

mal aisé à remarquer, pource qu'il ne s'esloigne guere du Soleil plus de 28. degrez: mais on s'efforcera à le cognoistre quand par les tables du mouuement des planetes, on scaura qu'il est en sa plus grande elongation. Je finiray ce chapitre apres auoir enseigné la plus facile methode que l'on puisse excogiter pour cognoistre les planetes: c'est qu'il faut auoir des Ephemerides, & voir en quel signe & degré se trouuent les planetes, & en ce mesme lieu où ils sont, appliquer vn petit morceau de cire sur le zodiaque de la sphere. Et puis la sphere estant disposée selon l'elevation du pole, voir à quelle heure, & de quelle part ils se leuent sur l'horizon. Dequoy nous dirons plus amplement au cinquiesme liure.

DE LA DIFFERENCE DES estailles fixes.

ENcore que les estailles fixes se puissent distinguer par leur grandeur, leur couleur, splendeur, & brislement. Toutesfois, le moyen plus facile est de les remarquer par les configurations qu'elles ont avec les estailles voisines, les vnes faisant vne droite ligne, les autres vn triangle, les autres vn quarré, les autres

autres vne autre figure. Que si cela rend encore la chose incertaine, il faudra auoir vn globe celeste, le disposer selon les parties du monde à l'heure presente, & selon l'elevation du lieu. Et faire vn rapport de nuict des estoilles qui sont au ciel, avec celles qui sont sur l'hemisphere superieur du globe.

DV SIXIESME CIEL.

LE sixiesme ciel est contigu au ciel de Saturne, & contient le planete de Iupiter, fort luisant, d'une vertu temperée, qui est 95. fois plus gros que la terre.

Ce planet est si clair, que souuent le vulgaire le prend pour l'estoille de Venus, ou du grand chien. Mais les sçauans ne s'y abusent pas, pource que Venus est plus blanche, & que les estoilles fixent brillent, & non pas les planetes.

DV CINQVIESME CIEL.

LE cinquiesme ciel est contigu au ciel de Iupiter, & contient le planete de Mars, qui est de couleur rouge, & enflambée, de temperamment chaud & sec. Ce planete excède la grosseur de la terre d'vntiers.

Après auoir dit quelque chose en gros des trois planetes superieurs ; l'adiousteray maintenant la theorie de leurs mouuemens, mais la plus breue que ie pourray, pour donner quelque contentement à ceux qui sont curieux de ces sciences.


THEORIE SVCCINCTE des trois planetes superieurs, Sa- turne, Iupiter, & Mars.

ON a remarqué par les obseruations, que les trois planetes, Saturne, Iupiter, & Mars, auoient semblables mouuemens ; & que leurs reuolutions differoient seulement en quantité de temps. Et partant leur theorie se peut monstrier ensemble.

DV NOMBRE DES ORBES.

IL y a quatre orbes à chacun d'iceux ; sçauoir, les deux concentriques en partie, qui portent l'apogée & perigée, l'eccentrique & l'epicicle, auxquels on adiouste l'equant, ou cercle d'egalité.

DIAGRAMME. V



Les deux concentriques en partie sont E, & D, le centre du monde A, l'epicyclic l'orbe blanc compris entre les deux noirs, son centre B, le lieu plus esloigné de la terre F, qui est dit apogée; celui qui luy est opposé & plus proche, perigée. Le cercle d'egalité G, (que l'on conçoit egal au cercle C, qui est descript par le mouvement du centre de l'epicycle) son centre H, l'epicycle F, qui porte le corps du planete.

Fij

DV MOUVEMENT DES deux concentriques en partie.

CEs deux orbes se meuvent selon l'ordre des signes, an tour du centre du monde, sur les poles de l'ecliptique. Et par la vertu de la huitiesme sphere, font vn circuit en 49000. ans, emportant quant & eux l'apogée & perigée de ces planetes.

Copernic considere icy deux mouuemens, l'vn sous les estoilles fixes, & l'autre sous le zodiaque; & dit que Saturne fait son tour sous les estoilles fixes, en 35333. années Egyptiennes, Iupiter en 119734. Mars en 45088. Mais sous le zodiaque que Saturne reuient en son mesme lieu apres 14917. années Egyptiennes, Iupiter apres 21237. Mars apres 16416. Par ce mouuement l'apogée de Saturne est maintenant au 20. du Sagittaire, celui de Iupiter au 7. de la Balance, & celui de Mars au 29. du Lyon.

DV MOUVEMENT DES Eccentriques.

LEs Eccentriques de ces trois planetes superieurs, se meuvent selon l'ordre des signes,

sur des poles qui leur sont propres, inegalement declinans du pole de l'ecliptique. Le periode de celuy de Saturne s'acheue en 30. ans, celuy de Iupiter en 12. & celuy de Mars presque en deux ans.

Ce mouuement emporte les centres des epicycles, & fait que celuy de Saturne circuit le zodiaque en 29. années Egyptiennes, & presque 162. iours: celuy de Iupiter en 11. années, & quelques 315. iours: celuy de Mars en vn an, & enuiron 322. iours: Mais sous le Firmament ils y retournent plus tard, Saturne estant 29. ans & 174. iours auant que de reuenir au mesme lieu: Iupiter 11. ans, & 317. iours: Mars vn an, & 322. iours.

DV MOVVEMENT DE LEVRS Epicycles.

LEs Epicycles des planetes superieures se meuuent selon l'ordre des signes, au tour des axes mobiles, inclinez sur la superficie de leurs eccentriques. Saturne y fait son periode en 378. iours, Iupiter en 398. & Mars en 779.

Il est aisé à coniecturer, que puisque les axes des epicycles sont inclinez sur la surface de leur eccentriques, que leurs plans ne sont pas vnis ensemble, mais qu'ils ont vne declinaison grande ou petite, selon l'inclinaison.

tion que peuuent auoir leurs axes.

DV MOVVEMENT DE L'E- quant, ou cercle d'égalité.

L'Equant de ces trois planetes, est vn cercle en
mesme plan que l'eccentrique : mais décrit sur
vn autre centre, différent toutesfois de celuy du
monde.

Ce cercle est adiousté à la theorie
des planetes, pource que les conuersions
tant de l'eccentrique que de l'epicycle, ne
sont égales sur leur centre. Mais sur vn autre
point, qui est le cêtre de ce cercle d'égalité,
qui est tousiours dans la ligne de l'apogée.

DV QUATRIESME CIEL.

L'equatresme ciel est contigu à celuy de Mars,
& contient cet astre lumineux du Soleil, qui est
le Prince des planetes, de couleur blanche, tirant
sur le rouge, scis au milieu des autres, comme vn
Roy, & qui par la vertu de ses rayons, eschauffe
toutes les choses terrestres. Il est plus grand que
route la terre de 166. fois.

Plusieurs Astronomes commencent la
doctrine des seconds mobiles par la theorie
du Soleil, comme estant par les hypotheses

la plus simple, & plus facile à concevoir; & d'auantage, pource que selon le dire de Ciceron, il est le Capitaine, Prince, & Modérateur de toutes les autres lumieres, l'esprit du monde, & le temperamment.

THEORIE SVCCINCTE du Soleil.

VOicy la theorie la moins difficile, & toutesfois la plus vtile, d'autant que tous les autres planetes se reglent selon le mouuement du Soleil, qu'ils obseruent comme leur Prince & Modérateur, de telle sorte, que si son mouuement n'est bien cogneu, il est bien difficile de concevoir le mouuement des autres.

DV NOMBRE DES Orbes.

IL y en a trois seulement, deux concentriques en partie, & l'eccentrique, ou deferent du Soleil.

DIAGRAMME.



Les deux concentriques en partie sont les deux orbes d'inegale epaisseur E, & D, le centre du monde A, l'eccentrique qui porte le Soleil est C, son centre B.

DU MOUVEMENT DES deux concentriques en partie.

Ces deux orbes se meuvent selon l'ordre des signes, au tour du centre du monde, & par la vertu de la huitiesme sphere, font leur tour en 49000. ans, emportant quant & soy l'apogée & perigée du Soleil.

Telle a este l'opinion d'Alfonse. Mais Co-

pernic ; par plusieurs obseruations a reconnu que ces orbes passoient au dessous des estoilles fixes en 50718. années Egyptiennes, & au dessous du zodiaque en 17108. par ce mouuement l'apogée du Soleil est maintenant au 8. degré de l'Ecreuisse, selon son calcul : Mais selon Tycho au 6.

DV MOUVEMENT DE l'eccentrique.

L'*Eccentrique du Soleil se meut selon l'ordre des signes sous l'ecliptique, & fait son tour en 365. iours, & près de 6. heures.*

Ce mouuement emportant le centre du Soleil, luy fait faire vn tour sous l'ecliptique en 365. iours 5. heures, & quelques 49. minutes, que l'on appelle l'an tropique. Mais le tour qui luy fait faire dessous le Firmament, est de quelque peu plus grand; scauoir, de 365. iours six heures, & enuiron dix minutes, que l'on appelle l'an sideral.

DE L'AN.

L'An ou l'année est vn phœnomene qui suit le mouuement du Soleil, c'est pourquoy nous en dirons icy quelque chose en passant.

DIVISION DE L'AN.

IL y a deux sortes d'années : l'année civile, & l'année Astronomique. L'année civile est celle de laquelle on se sert communement, soit qu'elle soit réglée selon le mouuement du Soleil ou de la Lune.

L'année civile de laquelle on se sert maintenant, a esté ordonnée par Iules Cesar : Et pour ce sujet, elle s'appelle l'année Iulienne. Elle est de 365. iours & 6. heures, qui font que de quatre en quatre ans, on adioust vn iour en l'an de bissexte, qui a 366. iours.

L'année Astronomique est de deux sortes ; tropique & siderale. L'année tropique est l'espace de temps que le Soleil met à parcourir le Zodiaque.

Encore que ceste année soit inegale, à cause de l'anticipation des equinoxes, on la met toutesfois de 365. iours 5. heures, & 49. minutes. prenant le moyen circuit entre le plus grand & moindre. Elle est dite tropique du mot tropos, qui signifie conuersion.

L'an sideral est l'espace de temps que le Soleil sejourne, iusques à ce qu'il retourne sous la mesme estoille fixe.

Ceste année est constamment de 365, iours six heures, & dix minutes ou enuiron, & plus grande que la precedente, à cause que

les estoilles s'auancent pendant que le Soleil fait son tour, & pour son égalité est la regle de l'année tropique.

QUE L'ON N'A PEU TROU-
uer precisément la quantité de l'an.

SOit que l'on appelle vne année la reuolution que le Soleil fait sous le zodiaque, à commencer depuis vn equinoxe, ou depuis vn solstice. Iusques au iourd'huy on n'a peu trouuer iustement la quantité de l'an, y ayant trois principales causes, tirées des hypotheses, qui l'ont tousiours empesché. La premiere, l'inegal mouuement du Soleil dans son eccentrique. La seconde, le progres de son apogée & perigée. La troisieme, d'autant que le lieu des equinoxes & solstices est incertain, par le mouuement de trepidation. Car l'ecliptique du huietieme ciel, sous laquelle le Soleil est porté, coupant l'equateur en diuers endroits, fait que le retour du Soleil estant pris à vn commencement vague & incertain, de necessité est inegal & incertain: D'où s'ensuit l'anticipation des equinoxes & solstices. Et partant ne faut s'estonner s'il y a de la varieté entre les Autheurs, pour definir ceste quantité.

Ptolémée ayant trouué que l'année auoit

365. I. 5. H. 55. m. 12. se.

Albategnius qui vint apres, 365. I. 5. H. 45. m. 36. se.

Alfóse & ses sectateurs, 365. I. 5. H. 49. m. 15. se.

Coperme, 365. I. 5. H. 55. m. 18. se.

Tycho, 365. I. 5. H. 48. m. 45. se.

Et iacoit que la difference entre l'année civile & l'année tropique soit petite; scauoir de 10. ou 11. minutes: si est. ce que ceste petite augmētation, que Cesar y donna plus que de raison, à excité de grandes difficultez pour la reformation du Calendrier, pource que l'equinoxe du Prin-temps qui arriua du temps du Concile de Nice, au 20. ou 21. du mois de Mars, se fait auiourd'huy au 10. ou 11. selon l'ancien stile, & a-on esté contraint d'oster 10. iours de l'année 1582. pour le remettre au mesme lieu qu'il estoit en ce tēps-là, pource qu'il estoit monté trop haut. Ce changement arriuant d'autant que de quatre en quatre ans, on adioust vñ iour en l'année, que l'on appelle de biffexte, qui est vñe addition plus grande qu'il ne faut, n'ayant l'année que 365. iours cinq heures, & quelques minutes, comme il se voit cy-dessus.

fait del'equateur variables, comme il se peut voir par les obseruations cy-deffous.

Du temps de Ptolemee, la plus grande declinaison du Soleil estoit de 23. d. 51. m.

Du temps d'Albategnius de 23. d. 35. m.

Du temps d'Alcmeon de 23. d. 33. m.

De nostre temps de 23. d. 28. m.

QVE LE PROGREGZ DES estailles fixes est inegal,

PAr la conference des obseruations on a remarqué comme nous auons dit, que les estoilles fixes auoient vn mouuement tardif d'Occident en Orient, que l'on a creu long-temps qu'il leur estoit propre. Mais puis apres on a obserué qu'il estoit irregulier; car du temps de Calippus, les estoilles faisoient vn degré en 72. ans. Entre Hipparchus & Menelaus, elles y estoient 100. ans: entre Menelaus & Ptolemée, seulement 86. ans; & quelque temps apres n'y demurerent plus que 76. ans, pour acheuer ce mesme espace: Ce qui arriue par le concours des mouuemens de la neuuesme & huietiesme sphere. Car encore que le centre du petit cercle soit emporté par la conuersion du

neufiesme ciel également. Toutesfois, le mouuement de trepidation par le petit demy cercle boreal, augmente le mouuement de la neufiesme sphere; & en l'autre demy cercle austral, il en oste tout autant. Et c'est d'où vient ceste anomalie au progrez. des estoilles fixes.

D'OV VIENT QVÉ LE SO-
leil s'est abbaisé dans son
eccentrique.

IL semble que la nature se lasse, & qu'elle doie bien tost aller en son Occident avec le mouuement du monde, comme estant reduite en son extreme vielleſſe: Puis que le Soleil, comme pour eschauffer la terre, & la rendre plus fertile, pour les generations ordinaires, s'est abbaisé dans son ciel de plus de dix-huict mil lieuës. Car estant au temps passé distant de nous de 1190. demy diametres de la terre, il ne se trouue maintenant plus esloigné que de 1179. Copernic s'efforce de rendre quelque raison de ce phœnomene, par vn second eccentrique, qu'il suppose à la theorie du Soleil, par lequel il demonstre que s'il est plus proche de nous en son apogée, aussi en son perigee s'en esloigne-il dauantage.

DES IOURS.

LE iour est naturel, ou artificiel. Le naturel, est l'espace de temps que le Soleil employe à faire vne reuolution, & reuenir sous vn mesme cercle qui est immobile.

Comme le temps que le Soleil est à retourner tous les iour sous le meridien, ou en l'horizon, est proprement le iour naturel. Et partant vne entiere reuolution de l'equinoctial, ne determine pas la quantité du iour naturel; pource que le Soleil par le mouvement contraire qu'il a à celuy du premier mobile, fait en cét espace quelque petite partie de son ciel.

Le iour artificiel est l'espace de temps qu'il y a entre le leuer & coucher du Soleil.

En la zone torride & temperée, les iours artificiels sont tousiours plus petits que les naturels. Mais dans les zones froides, ils sont souvent bien plus grands, comme estant par fois de plusieurs iours, & par fois de plusieurs mois.

DES

DES HEVRES.

L'Heure est egale, ou inegale. L'heure egale, est la 24. partie du iour naturel.

Et partant 15. degrez de l'equateur ne sont pas precisément la quantité de l'heure egale, puis que son entiere reuolution ne fait pas vn iour naturel.

L'heure inegale, est de iour & de nuit: l'heure inegale de iour, est la 12. partie du iour artificiel: l'heure inegale de nuit, est la 12. partie de la nuit.

Et partant, l'heure inegale est par fois plus petite que l'heure egale, par fois plus grande. Aux equinoxes, les heures egales & inegales, sont de pareille durée. Apres l'equinoxe du Prin-temps, iusques à l'equinoxe d'Automne, les heures inegales de iour excedent les heures egales. Apres l'equinoxe d'Automne, au contraire, les heures inegales de iour sont moindres que les egales. On obseruera toutesfois, que si le iour artificiel excede 24. heures, comme il arriue dans la zone froide, lors en ces temps-là cette distinction d'heure inegale n'est plus en vsage.

DV TROISIÉSME CIEL.

LE troisiésme ciel est contigu à celui du Soleil, & contient le planete de Venus d'une lumiere tres-esclatante, d'une qualité temperée. La grosseur de laquelle egale la 37. partie de la terre.

Ceste estoille par fois apparoist, par fois ne paroist point : Quand elle apparoist, elle va deuant le Soleil, ou le suit : Quand elle va deuant, on l'appelle phosphore, ou estoille du iour : Quand elle suit le Soleil, elle est dite hesperus, ou estoille du soir : Et quand elle ne se voit, c'est lors qu'elle est ioincte avec le Soleil, ou obscurcie sous ses rayons : & en ce temps-là s'appelle Venus. Pythagore a esté le premier qui en a obserué le mouuement.


THEORIE SVCCINCTE
de Venus.

Ceste Theorie est si peu differente de celle des trois planetes superieurs, que l'on luy pouuoit ioindre. C'est pourquoy nous la parcourerons legerement.

DV NOMBRE DES ORBES.

IL y a quatre Orbes ; ſçavoir, les deux concentriques en partie, l'eccentrique & l'epicycle, auquel on adiouſte l'equant ou cercle d'egalité.

DIAGRAMME.



Es deux concentriques en partie ſont E & D, le centre du monde A, l'eccentrique, tout l'espace blanc, compris entre les deux orbes qui ſont noirs, ſon centre B, le cercle d'egalité G, (que l'on conçoit egal au cercle C, qui eſt deſcrit par le mouvement du centre de l'epicycle) ſon centre H, l'epicycle F, qui porte le corps du planete.

DV MOVVEMENT DES deux concentriques en partie.

CEs deux orbes se meuuent selon l'ordre des signes, au tour du centre du monde, mais sur des poles qui leur sont propres, & qui errent çà & là, au tour des poles de l'ecliptique. Et par la vertu de la huitiesme sphere font leur periode en 49000. ans.

Icy les Astronomes sont presque d'accord, ils different seulement au temps periodique. Ptolemée dit qu'ils font vn tour en 36000. ans : Ceux qui suiuent Alfonse en 49000. Et Copernic veut que ce soit en 25816. années Egyptiennes. Par ce mouuement l'apogée de Venus est au 17. des Gemeaux. Alfonse a creu que l'apogée du Soleil & de Venus estoient tousiours ioincts ensemble. Ce qui repugne toutesfois aux obseruations.

DV MOVVEMENT DE l'eccentrique.

L'Eccentrique de Venus se meut selon l'ordre des signes, sur des poles qui luy sont propres, mais mobiles, avec les poles des deux concentriques en

partie. Il fait son tour précisément avec celui du Soleil,

L'eccentrique du Soleil, de Venus, & Mercure, faisant vn circuit sous le zodiaque en mesme temps précisément, ont donné occasion à quelques Astronomes de colliger de là qu'ils estoient en mesme ciel: Mais que Venus & Mercure tournoient au tour du Soleil, chacun dans vn epicycle particulier.

DV MOUVEMENT DE l'epicycle.

L'Epicycle de Venus se meut selon l'ordre des signes, au tour d'un axe mobile, incliné sur la superficie de l'eccentrique. Ce planete y fait son tour en 583. iours & 22. heures.

D'autant que ce planete & les trois superieurs ont l'eccentrique & l'epicycle qui declinent diuersement de l'ecliptique. Pour ce sujet ils ont vne double latitude; l'une qui despend de l'eccentrique, l'autre qui procede de l'epicycle.

DV MOUVEMENT DE l'equant, ou cercle d'egalité.

L'Equant de ce planete est vn cercle en mesme plan que l'eccentrique, mais décrit sur vn autre centre different toutesfois de celuy du monde.

En toutes les theories des planetes, la definition de ce cercle est semblable, pour auoir semblable effect. A celle du Soleil, il n'y en a point, ny en celle de la Lune, si ce n'est que l'on vueille dire que l'equant & l'eccentrique sont vnis ensembles sur vn mesme centre, à la sphere du Soleil. Et à la Lune, que le cercle d'egalité & le deferent sont vn, ayant leur centre ioincts avec celuy du monde.

DV DEUXIESME CIEL.

LE deuxiesme ciel est contigu à celuy de Venus, & contient le planete de Mercure, qui est vne petite estoille blanche, d'une vertu diuerse & inconstante, changeant son temperamment selon la qualité de ceux avec lesquels il est. Ce planete est petit, & ne contient que la 22. milliesme partie de la terre.

La plus part expliquent la theorie de Mer-

cure la dernière, à cause des difficultez qui s'y rencontroient. Car en pas-vn des autres on n'a point obserué tant de mouuemens diuers. Pour ce sujet, plusieurs ont excogité des hypotheses selon leur phantasie. Mais nous suiurons icy la commune, & l'expliquerons le plus clairement qu'il nous sera possible.


THEORIE SVCCINCTE de Mercure.

LEs diuers mouuemens qui se sont obseruez en ce planete, ont esté cause que l'on y a supposé plus d'orbes qu'en pas-vn des autres.

DV NOMBRE DES Orbes.

IL y en a six, quatre concentriques en partie, l'eccentrique & l'epicycle, avec lesquels on adionste l'equant ou cercle d'egalité.

DIAGRAMME.



L Es deux concentriques en partie qui portent l'apogée & perigée E, & D, les deux autres I, & K, qu'on appelle eccentrique de l'eccentrique, le centre du monde A, l'eccentrique l'orbe blanc entierement d'egale epaisseur, son centre B, le cercle d'egalité G, (quel'on conçoit tousiours egal au cercle C, qui est descrit par le mouuement du centre de l'epicycle) son centre H, l'epicycle F, qui porte le planete.

DV MOUVEMENT DES deux concentriques en partie, qui portent l'apogee & perigee.

CEs deux Orbes se meuuent selon l'ordre des signes, au tour du centre du monde, mais sur des poles qui leur sont propres, & qui errent ça & là, au tour des poles de l'ecliptique. Et par la vertu de la huitiesme sære, font vn circuit en 49000. ans.

Selon le calcul de Copernic, ces orbes font vn tour sous les estoilles fixes en 22405. années Egyptiennes, & sous le zodiaque en 11995. Par ce mouuement l'apogée de Mercure est maintenant au premier du Sagittaire.

DV MOUVEMENT DE l'eccentrique.

L'Eccentrique de Mercure se meut selon l'ordre des signes, sur des poles qui luy sont propres, mais mobiles avec les poles des deux qui portent l'apogée & perigée. Il fait son tour précisément avec celuy du Soleil.

Si Venus & Mercure n'auoient qu'un eccentrique, leur mouuement seroit entiere-

ment conforme au mouuement du Soleil, puis que ces trois orbes font leur circuit exactement en mesme temps. Mais la diuersité vient des epicycles, dans lesquels ils sont portez.

DV MOUVEMENT DE l'epicycle.

L'*Epicycle de Mercure se meut selon l'ordre des signes, au tour d'un axe mobile, incliné sur la superficie de son eccentrique, dans lequel ce planete fait son tour en 115. iours & 22. heures.*

Ily a trois choses dignes de remarque à la theorie des planetes. Premièrement, que tous les concentriques en partie ont leurs plans sous l'ecliptique, excepté ceux de la Lune, qui declinent de 5. degrez. Secondement, que tous les eccentriques declinent de l'ecliptique, fors celuy du Soleil. Et finalement, que les axes de tous les epicycles sont inclinez sur le plan des eccentriques, fors celuy de la Lune, qui est perpendiculaire.

DV MOUVEMENT DE de l'equant, ou cercle d'egalité.

L'Equant de ce planete est vn cercle en mesme plan quel'eccentrique, mais descrit sur vn autre centre, different toutesfois de celuy du monde.

En la sphere de Saturne, Iupiter, Mars, & Venus, le centre du cercle d'egalité est en la ligne de l'apogée, au dessus du centre de l'eccentrique. Mais à Mercure il est entre le centre du second eccentrique, & de celuy du monde.

DV MOUVEMENT DV second eccentrique.

LE second eccentrique de Mercure se meut contre l'ordre des signes, sur des poles qui luy sont propres, mais mobiles asec les poles des deux orbes qui portent l'apogée & perigée. Il fait son tour en 365. iours & 6. heures.

Cet orbe a esté adiousté pour rendre raison pourquoy l'apogée de l'eccentrique de Mercure va par fois selon l'ordre des signes, & par fois au contraire.

DV PREMIER CIEL

LE premier ciel est contigu à celuy de *Mercuré*, par en haut, & par en bas embrasse les quatre *Elemens*, & contient le planete de la *Lune*, qui n'a lumiere que du *Soleil*, d'une couleur diuerse, de temperamment froide & humide. Ce planete, selon les anciens, est moindre que la terre de 37. fois, & selon les nouueaux de quarante trois.

Endymion a esté le premier qui a obserué le mouuement de la *Lune*, & pour ceste cause les Poètes ont feint qu'il en estoit amoureux, cependant qu'il estoit en la montaigne d'*Ionie*.


THEORIE SVCCINCTE
de la *Lune*.

IL y en a qui expliquent la theorie de la *Lune* apres celle du *Soleil*, comme estant la plus simple & moins embarassée de difficultez. Mais ne traitant icy du mouuement des planetes que pour rendre raison des apparences plus manifestes, il n'y a pas beaucoup de sujet de vouloir changer l'ordre qui estoit commencé.

DV NOMBRE DES ORBES.

IL y a cinq orbes au ciel de la Lune, les deux concentriques en partie, l'eccentrique, l'epicycle, & le deferent de la teste & queue du Dragon.

DIAGRAMME.



LEs deux concentriques en partie sont les deux orbes d'inegale espaisseur E, & D, le centre du monde A, l'eccentrique C, qui porte l'epicycle F, dans lequel est le corps du planete. Le deferent est l'orbe ex-
terieur G.

DV MOUVEMENT DES deux concentriques en partie.

CEs deux orbes se meuuent contre l'ordre des signes au tour du centre du monde, mais sur des poles distans de cinq degrez de ceux du zodiaque. Leur mouuement iournal est d'once degrez & 12. minutes, & leur conuersion entiere se fait en 32. iours & 3. heures, il emportent quant & eux l'apogee & perigee de la Lune.

D'autant que l'axe de ce mouuement s'entre coupe au centre du monde avec l'axe du zodiaque, par consequent le plan de ces deux cercles decline de celui de l'ecliptique.

DV MOUVEMENT DE l'eccentrique.

L'Eccentrique de la Lune se meut selon l'ordre des signes, egallement au tour du centre du monde, mais sur des poles distans de cinq degrez de ceux du zodiaque. Son mouuement iournal est de 13. degrez & 11. minutes & sa conuersion entiere se fait en 27. iours & 7. heures ou enuiron.

Ce mouuement emportant le centre de l'epicycle luy fait circuir le zodiaque en 27. iours 7. heures & 43. minutes qui est la quan-

tité du mois periodique.

DV MOVVEMENT DE l'epicycle.

L'Epicycle de la Lune se meut contre l'Ordre des signes au tour d'un axe qui est perpendiculaire sur le plan de l'eccentrique, faisant chaque iour naturel 13. degrez & 4. minutes, & son periode en 27. iours treze heures & 19. minutes.

Il est aysé de colliger de ce que dessus que les deux concentriques en partie, l'eccentrique & l'epicycle, sont en mesme superficie plane tous declinans de la superficie de l'ecliptique.

D V MOVVEMENT DV deferent de la teste & queuë du Dragon.

LE deferent de la teste & queuë du Dragon, (que d'autres appellent Equant) se meut contre l'ordre des signes, egallement au tour du centre du monde, mais sur les poles de l'ecliptique, faisant chaque iour naturel 3. minutes & 11. secondes ou environ, & son periode en 18. ans & presque 224. iours.

Cest orbe entourant les trois autres &

entraînant, fait que la circonference de l'eccentrique coupe continuellement l'ecliptique en diuers endroits tirant vers l'Occident.

DE LA SECTION DE l'ecliptique & eccentrique de la Lune.

L'Ecliptique & l'eccentrique se mouuant tous deux au tour du centre du monde, mais sur des axes diuers, sont causes que les plans de ces deux orbes ou cercles, s'entrecoupent tousiours en deux endroits: les anciens ont nommé ces interfections nœuds, ou teste & queue de dragon.

DE LA TESTE DV dragon.

La teste du dragon, est l'interfection de l'ecliptique & eccentrique, par laquelle la Lune passe du Midy pour aller vers Septentrion.

La Lune partant de ce lieu, est dite Septentrionelle ascendante, iusques à ce qu'elle ayt atteint le 90. degré ou limite boreal, qui est le ventre du dragon, & de là sa latitude diminuant, est appelée Septentrionale descen-

descendent tant qu'elle soit arriuee à l'autre intersection.

DE LA QVEVE DV dragon.

La queue du dragon, est l'intersection de l'ecliptique & eccentricue par laquelle la Lune passe du Septentrion pour aller vers le Midy.

La Lune partant de ce lieu, est ditte meridionale descendante, iusques à ce qu'elle soit paruenue au 90. degré ou limite meridional, & de là, sa latitude se diminuant, elle est appelée meridionale ascendante, tant qu'elle soit arriuee à l'autre intersection.

DV MOIS.

Comme l'annee est reglee par le mouuement du Soleil, ainsi le mois est réglé par le mouuement de la Lune. Mais d'autant que le mouuement de la Lune n'est considéré qu'au respect de l'eccentricue ou au respect du Soleil: c'est pourquoy on fait deux sortes de mois seulement. Car touchant la douzième partie de l'annee, elle doit plus tost estre appelée mois solaire que lunaire.

DE LA DIVISION DES
mois.

LE mois est de deux sortes, *periodic & Synodic.*

Il y en a qui en font de trois y adjoustant le mois d'illumination, qui est l'espace de temps qu'il y a depuis la Lune nouvelle, iusques à ce qu'elle finisse, & cesse d'estre veüe.

Le mois periodic est l'espace de temps que la Lune demeure à faire vn tour sous le Zodiaque.

Ce periode est de 27. jours sept heures & 43. minutes & est ainsi nommé comme qui diroit circulaire, car *periodos* en Grec signifie circuit.

Le mois synodic est l'espace de temps que la Lune employe depuis l'instant de sa conionction avec le Soleil iusques à ce qu'elle s'y reioigne.

Ce periode est de 29. jours 12. heures & 44. minutes & est proprement le mois lunaire, car en cest espace là, la Lune se change en toutes les faces, croissante, cornuë, demy pleine, bossuë, pleine: & de pareille teneur décroist iusques à ce qu'elle perde entièrement sa lumiere, ce mois est dit synodic de *synodos* qui signifie conionction.

DE LA REGION ELE- mentaire.

L A region elementaire, est la partie du monde, qui est comprise dans la concavité du Ciel de la Lune, en laquelle toutes choses sont corruptibles, & sujetes au changement.

Nous auons dit au commencement de ce liure que le monde estoit diuisé en la region etheree & region elementaire, reste donc auant que de finir d'adiouster quelque chose des Elemens.

DES ELEMENS.

L Element est vn corps simple, qui sert à la composition de tous les corps composez, & ausquel tous se resoudent.

L'ordre semble requerir qu'apres auoir descendu depuis le dernier ciel iusques aux elemens, nous disions quelque chose en passant de leur nature & qualitez.

DV NOMBRE DES Elemens.

Les Elemens sont au nombre de quatre, sçavoir le feu, l'air, l'eau, & la terre.

Il y a quelques nouveaux Philosophes qui n'en mettent que trois, l'air, l'eau & la terre, pource que le feu elementaire ne tombe sous aucun des sens.

DES QUALITEZ DES Elemens.

Les principales qualitez sont, chaleur, siccité, froideur, & humidité, le feu est chaut & sec, l'air chaut & humide, l'eau humide & froide, la terre froide & seche.

Il y en a qui disputent si les qualitez des Elemens sont intenses ou remises, c'est à dire, si le feu qui est chaut & sec, est extrêmement chaut & extrêmement sec, ou extrêmement chaut & modérément sec, mais cette question n'est pas de ce lieu cy.

DV MOVVEMENT DES Elemens.

Lemouvement des Elemens n'est pas circulaire comme celuy des Cieux, mais il se fait selon vne ligne droite, ou haut, ou bas, celuy qui se

fait en haut est propre au feu & à l'air, & celui qui se fait en bas appartient à l'eau & à la terre.

Quand est du mouuement circulaire des eaux que d'aucuns assurent, la verité est que les Nautonniers ont experimenté que le cours qu'ils font au Leuant leur donne plus de peine que quand ils courent avec le monde vers le Couchant, & ce d'autant plus qu'ils approchent vers la ligne ou equinoxial. Mais conclure de là que les eaux suivent le mouuement des cieux, il n'y a pas grande apparence, d'autant que ceste difficulté qu'ils esrouuent peut arriuer à cause des vents qui soufflent de ces quartiers là que les Mariniers appellent Brises.

DEFINITION DES Elemens.

LE feu est vn Element chaud & sec, L'air vn Element chaud & humide, L'eau vn Element humide & froid, La terre vn Element froid & sec.

Les Medecins les definissent par les premieres qualitez, ainsi selon eux le feu est le premier chaud, l'air le premier humide, l'eau le premier froid, la terre le premier sec.



LIVRE III.

DES SUPPOSITIONS Astronomiques & Phænomenes.



Oicy où l'on trouuera du contentement, en considerant comment l'esprit humain a esté si curieux, que de rechercher les causes de tant d'effects si admirables en la nature, qui iournellement apparoissent en nos yeux. Nous auons ioinct les hypotheses avec les phænomenes, comme estant vne matiere presque semblable, & qui s'entre-aydent à l'intelligence les vnes des autres.

DES HYPOTHESES, OV suppositions Astronomiques.

Hypothese est vn principe manifeste, qui tombe ordinairement sous le sens, & qui n'est pas d'ordinaire contredit, comme estant facile à estre demonstre.

Les Astronomes pour fondement de leur doctrine, & pour rendre raison des apparences celestes, prennent ordinairement celles qui s'ensuiuent.

QUE LA TERRE EST AU milieu du monde.

IL y a enuiron 1800. ans que le Philosophe Aristarche Samien a creu, que la terre n'estoit point au milieu du monde, mais que c'estoit le Soleil, qui estant là comme immobile, donnoit de la clarté à tout l'vniuers. Ce Philosophe iugeant estre vne absurdité grande, que la terre qui produit vne infinité d'animaux mobiles, fut immobile, & que la cause fust de pire condition que son effect. Ceste opinion longuement enseuelie, a esté depuis quelque temps renouuellée par cet excellent Astronome, nommé Copernic, qui de gayeté de cœur, s'efforce de prouuer en ses reuolutions la verité de ceste hypothese Samienne. Mais pour demeurer à l'opinion la plus receüe, nous supposons avec les autres, que la terre est au milieu du monde, considerant vn grand déreglement qu'on obserueroit aux phanomenes, si elle en estoit ostée. Car en quelque lieu qu'elle peut

estre (principalement si elle estoit notablement distante du centre de l'vniuers, comme a supposé Copernic) il s'ensuiuroit que la distance de deux estoilles, obseruée par les instrumens ordinaires, ne paroistroit de tous les endroits de la terre tousiours egale comme elle fait. Que les equinoxes ne se feroient par tout le monde, quand le Soleil entre au Belier & en la Balance: Que les longs iours artificiels n'egaleroient les longues nuits artificielles: Que les ombres des styles Orientales & Occidentales seroient de grandeur inegale, le Soleil estant en mesme éléuation, & vne infinité d'autres absurditez. Et partant nous concludrons que la terre, comme vn element le plus pesant, a esté mise au lieu le plus bas. Or le lieu le plus bas, est celuy qui est plus esloigné du Ciel; & le lieu qui est plus esloigné du Ciel est le centre. Parquoy la terre est au centre, c'est à dire, au milieu du Ciel, ou du monde.

QUE LA TERRE EST immobile.


C'Est vn consentement presque vniuersel de tous les Astronomes, que la terre est immobile: car si elle se mouuoit, ce se-

roit hors de son lieu, ou sur son centre. Et si ce mouuement se faisoit hors de son lieu, toutes les apparences celestes seroient dereg-
glées, comme nous venons de demonstrier. Et si elle faisoit vn tour sur son centre en 24-
heures, comme il y en a qui le veulent, les choses graues ne tomberoient pas en an-
gles droits sur les superficies planes. Vn ject de pierres sur la terre, ou autre mouuement violent, seroit plus loing-tain d'un costé que d'autre. Les oyseaux qui volent en l'air, s'ils alloient vers l'Occident, à peine pour-
roient ils trouuer leur nid. Il faudroit que ceux qui sont sous l'equateur (où ces obser-
uations seroient plus manifestes, comme y estant le mouuement plus violent) fissent en vn iour naturel vn circuit de dix mil huit cens lieues (ayant la terre autant de tour) qui leur seroit vn mouuement non seulement sensible, mais dangereux, à cause de la rapidité qui ébranleroit tous les edifices: car en approchant vers les poles, ceste vitesse peu à peu s'allentiroit. Mais sans extrauaguer avec plusieurs esprits subtils, ie suppose icy que la terre est immobile au centre du monde, n'y ayant aucune raison assez forte qui aye peu me persuader de l'oster de sa place, n'estoit l'experience de Pierre Peregrin (si elle

est vraye) qui me tient en doute, qui assure qu'une petite boule d'aymant (qui represente une petite terre) estant suspendue par ses poles sous le meridien, selon l'elevation du pole du lieu, fait une revolution en 24. heures. Et conclud par là, que de mesme la terre fait une revolution sur l'axe du monde.

QUE LA TERRE EST VN point, comparee à l'univers.

ENCORE que le corps de la terre soit tres-gros, & son estendue immense, si est-ce qu'estant comparee à tout l'univers, ceste grosseur est si peu de consequence, qu'elle est insensible, & comme un point, pour plusieurs raisons.



La premiere, pour ce qu'en quelque endroit que l'homme soit, il voit, ou peut voir tousiours six signes du zodiaque, & la moitié du Ciel: ce qui ne

pourroit arriuer, si la terre auoit quelque quantité notable au respect de tout le monde. Secondement, cela se prouue par l'om-

bre des styles, qui ne laissent de monstrier
precisément l'heure sur la surface de la terre,
comme s'ils estoient dressez au centre d'icelle.
Tiercement, on confirme la chose estre
ainsi, par les instrumens des Mathematiciens,
avec lesquels ils obseruent la hauteur & distance
des astres de dessus la terre, comme s'ils
estoient au centre. Et finalement, par la
grosseur des estoilles fixes, entre lesquelles
la plus petite excède la grosseur de la terre.


QVE LA TERRE ET L'EAV constituënt vn corps spherique.

C'Est vne chose receuë de tous les Philosophes, que les eaux qui coulent de leur nature, vont tousiours vers la partie la plus basse. Et ainsi il y a vne infinité de collines, montaignes, & vallées sur la terre, que nature y a laissé, pour la commodité des animaux qui viuent sur icelle. Et encore que ces eminences & concautez considerées en soy, paroissent grandes, estant comparées toutesfois à la grosseur du globe terrestre, sont si petites, qu'elles ne changent pour cela la figure ronde. Car tout ainsi comme si vn cirron auoit à courir par dessus vne grosse boule de pierre, il ne feroit autre chose que

monter & descendre, à cause de la rudesse & inégalité du corps: De mesme, l'homme estant au respect de la terre, ce qu'un ciron est au respect d'une boule de pierre, il ne faut s'estonner s'il y rencontre quantité de montaignes & vallées, qui toutesfois, attendu la grosseur d'icelle, ne peuvent & ne doiuent empescher qu'elle ne soit dite ronde. Et de fait, en l'eclipse de la Lune, où l'ombre de la figure de la terre est représentée, on n'y apperçoit rien qui repugne à la rotondité du corps d'où elle prouient. Et que si nous pouuions voir de loing la terre, comme nous voyons le Soleil & la Lune, c'est sans aucune doute qu'elle nous apparoiroit de figure ronde.

Q V E L A T E R R E E S T .
Ronde.


LA figure de la terre n'est differente de celle du monde, pour prouue. Premièrement, on demonstre qu'elle est ronde d'Orient en Occident: d'autant que les signes & les estoilles ne se couchent & leuent à tous les habitans de la terre en mesme instant: Mais se leuent premieremēt aux Orientaux, passent par leur meridian, & se cachent plus



toſt qu'à ceux qui demeurent plus vers le couchant. Ce qui facilement ſe demonſtre aux eclipſes de la Lune, leſquelles encores qu'elles commencent en meſme inſtant par tout le

monde, toutesfois nous apparoiſſent en diuerſes heures, ſelon la diſtance que nous auons les vns des autres, plus ou moins vers l'Occident. Ainſi l'entiere eclipſe de Lune de ceſte année 1627. que ceux de Francfort ont veu le 28. Iuillet à 6. heures 41. m. nous a paru à 6. heures & 11. m. pource que Francfort eſt vne ville plus Orientale que Paris, enuiron de huit degrez, ou demy heure. Et pour monſtrer qu'elle eſt ronde auſſi du Septentrion au Midy, il faudra conſiderer le mouuement des Cieux, & on obſeruera que ceux qui demeurent vers le Septentrion, ont ſur leur horizon, vers le pole Arctique, des eſtoilles de perpetuelle apparition; c'eſt à dire, qui ne ſe couchent iamais, & d'autres auſſi qui ne peuuent iamais voir, qui ſont vers le pole Antarctique: Et que ſ'il leur arriue d'aller vers le Midy, ils pourroient aller ſi

loing, qu'ils apperceuroient des estoilles se
leuer, qui ne se leuoient point au lieu de leur
demeure accoustumée: Et au contraire, cel-
les du costé du Septentrion, qu'ils voyoient
toufiours, les vnes apres les autres s'abbais-
ser sur l'horizon. Dauantage, il obseruera
qu'à mesure qu'il ira vers l'un des poles, que



la latitude de la re-
gion s'augmentera
ou diminuera, à rai-
son du chemin qu'il
fera, qui est vn indi-
ce certain, que la ter-
rea vne forme ronde
du Septentrion au
Midy.

QUE L'EAV A LA FIGVRE ronde.

IL ne faut pas s'imaginer que l'eau est au
niveau sur la terre, encore que l'on s'en
serue pour mesurer les lignes droites aux pe-
tites distances, elle a la figure ronde aussi
bien que la terre, comme il est manifeste aux
grandes nauigations. Car au partir du Port,
insensiblement se perd de veüe le riuage, les
maisons, & les montaignes. Et quant on est



au milieu des mers, on ne voit plus que le Ciel & l'eau : Mais quant on commence à rapprocher vers la terre, on apperçoit petit à petit que les montaignes, les

chasteaux, les rochers se leuent & se descouurent, qui est experience asseurée, que les mers ont vne connexité: Et principalement, à cause que celuy qui est au haut de la hune d'un vaisseau, descouure plustost le Port que celuy qui est sur le tillac.

CEL VY QVI CIRCVIT LA
terre en sa nauigation, trouue vn iour de difference avec ceux de son pays à son retour.

C'Est vne chose digne de consideration, que ceux qui nauigent sur les mers pour circuir le monde, estant retournez en leur maison, ne s'accordent au iour qu'il est, avec ceux qui n'ont bougé du lieu.

Car s'ils ont fait leur tour en s'en allant par le Couchant, estant arriuez, ils content vn iour moins du mois qu'il n'est, & s'il est Dimanche, ils disent qu'il est Samedy. Et au contraire, ceux qui vont contre le mouuement iournal du Soleil, vers le Leuant, estant retournez, content vn iour dauantage, & s'il est Dimanche où ils arriuent, ils disent qu'il est Lundy. En sorte que si deux Marchands arriuent en leur pays au iour du Dimanche, apres auoir tourné au tour de la terre, l'un s'en estant allé deuers l'Orient, l'autre deuers l'Occident, celuy qui aura esté par l'Orient dira qu'il est Lundy, & l'autre qui aura esté par le costé d'Occident, dira qu'il est Samedy, & lors la difference sera de deux iours. Ce qui est toutefois vray sans qu'il y ait aucun mesconte. Car celuy qui va avec le cours du Soleil, fait en son voyage vn des circuits que le Soleil fait en vn iour, & pour ce subiet conte vn iour de moins: Et l'autre qui va contre son mouuement ordinaire vers le Leuant, fait que le Soleil passe vne fois dauantage sous son meridiem, comme allant au deuant de luy; & pour ceste cause, compte vn iour de plus. Ce qu'estant entendu, il est aisé de soudre cest enigme, comment il se peut faire que deux gemeaux
nez

nez en mesme heure, & morts en mesme au-
si, ayent vescu des iours l'un plus que l'autre,
d'autant que si l'un tourne au tour de la terre
plusieurs fois, en s'en allant vers le Leuât, ce-
uy là contera autant de journées dauantage
que l'autre, qu'il aura fait de circuits au mon-
de. Et y aura encore vne plus grande diffé-
rence de iours, si tous les deux tournent au-
tour du monde, s'en allant par diuers en-
droits.

QUE LE MONDE EST DE figure spherique.

Adis il y a eu des Philosophes qui ont
estimé que l'vniuers estoit de la forme
l'un œuf, à ce qu'escriit Plutarque. Et pour
ce suiet les Prestres de Bacchus reueroient
l'œuf en leurs Sacrifices, comme estant vn
symbole du monde. Ce que tesmoigne aussi
Proclus, quand il dit que τὸ ὀρφικὸν ᾠδὴν, ἢ τὸ
ἔκ πλατωνος ὄν, estre la mesme chose. Mais
ceux qui ont esté les plus celebres, ont tous
dit, que le monde estoit de figure spherique.
La premiere cause, pource que tel il appa-
roist à nos yeux. La seconde, d'autant que
la figure ronde est la plus parfaite, & comme
ayant quelque rapport avec la perfection de

l'Architecte. Tiercement, que c'est celle qui est la plus facile à se mouuoir, sans qu'il soit besoin d'autre espace, que le lieu là où elle est. Et finalement, pource qu'entre les figures solides isoperimetres; c'est à dire, de pareil circuit, la plus capable pour contenir l'univers, est le globe ou la sphere. Car si Dieu eut fait le monde d'autre figure que ronde, il y eut eu plus de circuit pour contenir ce qu'il contient.

QUE LE MONDE SE MEVT spheriquement.

VNe Sphere (comme est le monde, puis qu'il est de figure spherique) est icy dite se mouuoir spheriquemēt, quant elle se tourne sur vn axe, sans changer de lieu, comme il apparoiſt aux spheres artificielles, qui se meuuent par maniere de dire en soy. Or on a recogneu de tout temps, par deux raisons, que la sphere naturelle, ou du monde, se meut de semblable façon. La premiere est, que les anciens qui ont esté auteurs de ces hypotheses, ont obserué que les estoilles se leuoient, puis peu à peu montoient vers le Midy, & de pareille teneur s'abbaissoient vers le couchant. Et apres auoir sejourné quelque

temps sous terre, de rechef ils les voyoient
se lever de mesme part, & tousiours conti-
nuer le pareil circuit. L'autre raison est, qu'à
sous ceux qui habitent en la sphere oblique,
les estoilles qui sont aupres du pole, ne se ca-
chent point, mais descriuent des cercles
grands ou petits en 24. heures, selon les di-
verses distances qu'elles ont dudit pole du
monde. Si donc les estoilles qui sont comme
pointes ou petites parties, au regard des
Cieux, sont portez d'un mouvement circu-
laire Il est apparent, que le mouvement du
tout est semblable au mouvement des par-
ties: & par consequent la sphere du monde
se meut en rond, ou spheriquement.

DES PHÆNOMENES & apparences.

A Pres auoir traité des hypotheses Astro-
nomiques, nous expliquerons main-
tenant les apparences: sçauoir. Premiere-
ment, celles qui dependent de la conuersion
du premier mobile. Secondement, celles
qui suivent simplement le mouvement des
planetes. Tiercement, celles qui arriuent
par le mouvement d'iceux comparez à la ter-
re: & puis nous finirons ce troisieme liure.

DES PHÆNOMENES QV
suiuent le mouuement du premier
mobile.

IL y en a de deux sortes; à sçauoir, le leuer
& coucher des signes ou ascensions, &
descentes d'iceux: & le leuer & coucher de
estoilles.

DV LEVER ET COVCHE
des signes.

LE leuer & coucher des signes, autrement
leuer & coucher Astronomique, est le tem
que demeurent les signes du zodiaque à se leuer s
l'horizon, ou se coucher au dessous. Ils appelle
aussi ce leuer & coucher ascensions & descentes d
signes, lesquelles sont de deux sortes, droites &
obliques.

L'obliquité du zodiaque, au respect d
mouuement du premier mobile, est cau
que quelques signes se leuent & se couche
en diuerses façons, les vns plus droitemen
les autres plus oblique ment, d'où s'ensuit l
negalité du temps.

DES ASCENSIONS DROITES & obliques.

Les ascensions & descentes droites se font en la sphere droite, les obliques en la sphere oblique. Mais en l'une & l'autre vn signe est dit monter ou descendre droitement, quand il demeure plus de deux heures à se leuer & coucher: Comme monter & descendre obliquement, quand il y employe moins de deux heures.

Il y en a qui definissent les ascensions & descentes des signes par l'arc de l'equateur, qui monte & descend sous l'horizon avec les signes. Et lors vn signe est dit monter ou descendre droitement, quand vne plus grande partie de l'equateur monte ou descend avec luy Comme monter & descendre obliquement, quand c'est vne moindre partie qui monte & descend.

DES ASCENSIONS ET descentes selon la diuerse position de la Sphere.

Les ascensions & descentes des signes sont bien differentes par toute l'estendue de la terre. I'en diray icy ce qui sera de plus notable.

DES ASCENSIONS EN LA sphere droite.

Sous l'equateur où la sphere est droite, les huit signes qui sont les plus proches des equinoxes se leuent obliquement. Et les quatre autres voyfins des solstices droitement.

DES ASCENSIONS EN LA sphere oblique.

IAçoit qu'il y ayt vne grande inegalité d'ascensions en la sphere oblique, on peut toutesfois dire en general, que depuis le Solstice d'Este iusques au solstice d'Hyuer, que les signes se leuent droitement; & au reste du zodiaque obliquement.

DES ASCENSIONS SOVS les cercles polaires.

Sous les cercles polaires il y a beaucoup de chose digne de remarque. Premièrement, est à noter que le Soleil se leue & couche de tous les endroits de l'horizon deux fois l'an. Secondement, quand le Soleil est aux signes ascendans, il a toujours six signes

qui l'accompagnent à son leuer, & fix qui se couchent en mesme instant. Et quant il court par les signes descendans, il a tousiours six signes qui se couchent avec luy en vn moment, & fix qui se leuent. Tiercement, on remarquera que ce n'est pas vne regle generale, qu'en tous les iours artificiels il se leue six signes. Car encore qu'en ceste positioncy, au plus petit iour de l'an, qui n'est qu'un instant, il y ayt six signes du zodiaque qui se leuent. Neantmoins, quand le Soleil entre au Verseau, il y en a sept, quand il entre aux Poissons 8. quand il est en l'equinoxe 9. quand il entre dans le Taureau 10. quand il entre aux Gemeaux 11. & finalement quand il est au solstice d'Esté il y en a 12. sçauoir, six qui se leuent tousiours en vn instant, & les autres qui suivent avec espace de temps. On experimentera le mesme en l'autre moitié du zodiaque, mais avec ceste difference, que ceux qui se leuent avec espace de temps, montent les premiers, & ceux qui se leuent en vn moment viennent apres.

DES ASCENSIONS DANS les zones froides.

AVssi tost que l'on est entré dans les zones froides, les signes du zodiaque ne se leuent & ne se couchent selon l'ordinaire. Car par exemple, en la zone froide Septentrionale, les signes qui sont vers l'equinoxe du Prin-temps se leuent à rebours, comme les Gemeaux se leuent deuant le Taureau, le Taureau deuant le Belier, & par conséquent les dernieres parties des signes deuant les premieres. Le mesme se fait aux trois autres, Capricorne, le Verseau, & les Poissons, encore que ces signes ne l'aissent pour cela de s'abaisser sous l'horizon selon leur ordre. Au contraire, les signes qui sont proches de l'equinoxe de l'Automne, de part & d'autre, se leuent selon la coustume, mais se couchent tout au contraire.

DES ASCENSIONS EN LA sphere parallele.

EN la sphere parallele, sous les poles, il n'y a aucunes ascensions des signes, ny descentes : Car la moitié de l'ecliptique est

tousiours sur l'horizon, l'autre dessous.

DV LEVER ET COVCHER des estoilles.

LE lever & coucher des estoilles est de deux sortes, Vray ou apparent. Le Vray, est diuisé en cosmique & Acronyque: L'apparent, est dit Heliaque ou Solaire.

Voicy vn phænomené qui suit le mouuement du premier mobile, & le cours ordinaire du Soleil, & partant il n'importe pas auquel des deux on le veuille rapporter.

DV LEVER ET COVCHER Cosmique.

LE lever cosmique d'une estoille se fait au matin, enuiron le lever du Soleil: ce qui arrive quand vne estoille se leue avec le Soleil sur l'horizon, ou vn peu deuant, ou apres: Mais celle qui en mesme tēps s'abbaisse au dessous, à le coucher cosmique.

Les Astronomes appellent ce lever & coucher des estoilles cosmique; c'est à dire, mondain, ou avec le monde; pource que le monde semble au matin comme renaistre, & de nouveau recommencer ses actions.

DV LEVER ET COVCHER Acronyque.

LE leuer acronyque d'une estoile se fait au soir, environ le coucher du Soleil, & se fait quand une estoile se leue, lors que le Soleil se couche, ou un peu deuant ou apres: Mais celle qui se couche avec luy, a le coucher acronyque.


Quelques vns, non sans raison, ont appellé le leuer & coucher cosmique matutin, & l'acronyque ou cronyque vespertin: pour ce que comme celuy-là se fait au matin, aussi cestuy-cy se fait au vespre & sur le soir. Aussi acronyque signifie-il le commencement de la nuit.

DV LEVER ET COVCHER Solaire.

LE leuer Solaire d'une estoile se fait quand une estoile apparait sur l'horizon, qui auparavant ne pouuoit estre veüe, pour estre trop proche du Soleil.

E T


Le coucher Solaire se fait quand on cesse de voir une estoile sur l'horizon, qui auparavant se voyoit, pour ce que le Soleil en estoit esloigné.



Ce leuer & coucher des estoilles est dit apparent non vray, pource qu'il ne se fait pas en l'horizon, comme les precedens, mais plus haut, tant du costé d'Orient que d'Occident, selon que les estoilles ont plus ou moins de lumiere. Il y auoit quelque vtilité au temps passé d'entendre cecy, pource qu'auant que les saisons de l'année fussent determinees par le mouuement du Soleil les Poëtes, Historiens, Autheurs de l'Agriculture, les definissoient par le leuer & coucher des estoilles, comme il se voit dans Heliode, Homere, Hippocrate, Columelle, Virgile, Ouide, & autres.

DIAGRAMME QVI RE- presente facilement ceste doctrine.

Supposons que le Soleil aille par le cercle metoyen, les estoilles qui auront vn mouuement plus lent, par l'exterieur: & celui qui vont plus viste, par l'interieur. Cela estât ainsi, soit vne estoille en B, cachée en Orient



par les rayons du Soleil qui est en A, dans peu de iours, quand il sera au point C, ceste estoille B, se fera voir, & aura vn leuer solaire du matin. Apres soit la Lune en I, qui pour estre trop voisine du Soleil, qui est en H, ne peut estre apperceuë: quand elle sera au point K, elle apparostro, & aura vn leuer

Solaire du soir: De rechef, soit vne estoille en F, qui puisse estre veüe, pource que le Soleil est en G, quand dans peu de temps il sera paruenü au poinct H, elle disparoistra, & aura vn coucher Solaire du soir. Finalement, si on peut voir la Lune estant en E, à cause que le Soleil est en A, & esloigné d'elle: quand elle sera paruenüe au poinct D, on ne la verra plus pour estre trop proche de luy, & ainsi aura vn coucher Solaire du matin.

DES PHÆNOMENES QVI suiuent le mouuement des planetes.

IE ne feray icy recit que des principaux, & de ceux qui sont plus apparens, laissant vne honneste curiosité aux amateurs de ces sciences, de rechercher la cause de plusieurs autres.

LES DIAMETRES DES planetes paroissent de diuerse grandeur.

CE qui arriue à cause de l'inegale distance qu'ils ont au respect de la terre, en faisant leur tour, qui n'est pas concentrique

avec celui du monde. Car c'est vn principe de perspective, que plus les corps sont esloignez, plus paroissent-ils petits, & plus sont-ils proches, plus paroissent ils grands. Et de



là vient que le Soleil, quand il est en son eccentrique, au lieu le plus esloigné de la terre, qu'on appelle apogée, c'est lors qu'il paroist le plus petit: Et quand il est au lieu le plus proche, qui est dit perigée, c'est lors qu'il paroist le plus grand. Or le lieu de l'apogée du Soleil en ce temps icy est le 6. del'Ecreuifse, & le lieu du perigée le 6. du Capricorne.

LES QUATRE SAISONS de l'année sont inegales.

LEs Pythagoriciens, à ce que dit Geminus, considerant le mouuement des planetes, ont supposé qu'ils auoient des mouuemens circulaires (comme l'experience le tesmoigne assez) mais qu'ils estoient aussi tousiours egaux. Car d'admettre vne irregularité à ces corps celestes & diuins, & de dire que par fois ils vont plus viste, par fois plus lentement, ils estimoient cela estre vne chose tres-absurde, attendu qu'un homme sage, & de sens rassis, va tousiours d'un mesme pas, encore que quelques occurrentes necessitez, le pourroient aucunesfois presser à faire le contraire. Mais en ceste nature incorruptible des astres, il ne peut y escheoir aucune occasion de vitesse ou tardiueté. Ce qu'estant bien raisonnable, ils ont conclud que le Soleil couroit par vn cercle eccentrique sous le zodiaque, tant à cause qu'ils auoient obserué le diametre du Soleil estre d'une inegale grandeur, que pource qu'ils voyoiēt les saisons de l'année estre inegales. Estant par experience le Soleil vn plus longtemps à courir les signes Septentrionaux,




que ceux qui sont du costé du Midy, & qu'il y a plus de iours depuis l'equinoxe du Printemps iusques à celuy d'Automne, que de cestuy-cy iusques à l'autre. Ce qui est manifeste par ce Diagramme, auquel la ligne qui va d'Orient en Occident, diuise le zodiaque en deux parties egales, mais l'eccentrique du Soleil en deux inegales. Et supposant qu'il aille tousiours d'un pas egal, il est nécessaire qu'il sejourne dauantage en la partie de son eccentrique qui sera plus grande, & moins en celle qui sera plus petite. Et ainsi par ce mouue-

mouuement inegal, au respect du monde, il parcourt les signes du Prin-temps en 93. iours & 10. heures, ceux d'Eité en 93 iours 14. heures, les signes d'Automne en 89. iours & 4. heures, les signes d'Hyuer en 89. iours & 2. heures.

D'O V VIENT QVE LES
planetes vont par fois selon lordre
des signes, par fois contre l'ordre,
& par fois semblent ne bouger de
leur place.

Les Astronomes pour rendre encore
raison de quelques autres apparences,
ont supposé vn petit cercle, qui porte le pla-
nete, lequel a son centre en la circonference
de l'eccentrique, qu'ils appellent epicycle,
comme qui diroit cercle sur cercle, qui fait
que cependant que le planete se meut en
ron dans iceluy, il apparoit par fois aller
selon l'ordre des signes, d'Occident en
Orient, & lors il est dit directe, par fois au-
si aller contre l'ordre d'iceux, d'Orient en
Occident, & est dit retrograde. Et finale-
ment quand quelque temps il semble ne bou-
ger de sa place, & estre tousiours au mesme



lieu du zodiaque, c'est lors qu'il est dit stationnaire. Ou l'on obseruera premierement que le Soleil, entre tous les planetes, ne va iamais en retrogradant contre l'ordre des signes. Et pour ceste occasion n'a t'on supposé aucun epicycle en son mouuement, mais seulement vn eccentrique. Secondement, que iacoit que les planetes soient portez en la moitié de leurs epicycles contre l'ordre des signes, ils ne laissent pourtant d'estre dits directes, si ceste retrogradation qu'ils font en ce petit cercle, est surmontee par le mouuement de l'eccentrique, qui en tous va d'Occident en Orient, selon l'ordre des signes.




Ainsi la Lune, encore qu'elle aye vn epicy-
cle, elle n'est toutesfois iamais dite retrogra-
de, combien qu'elle aille par la partie supe-
rieure de son epicycle contre l'ordre des si-
gnes, pource que le mouuement de son ec-
centrique, surmonte celuy de l'epicycle. Les
tables des Ephemerides monstrent ceste do-
ctrine tres-clairement, pource qu'elles assi-
gnent pour tous les iours qu'il est le lieu des
planetes à midy precisément sous le zodia-
que, & si le lieu d'un planete de quelque iour
excede le precedent de quelques degrez ou

minutes, les planetes sont dits directes, si le mouvement décroist, ils sont dits retrogrades, & s'il ne croist ny décroist stationnaires.

D'O V V I E N T Q V E L A
Lune va par fois plus viste sous le
zodiaque, par fois plus lentement.

P Our bien entendre cecy, faut scauoir que tous les eccentriques vont d'Occident en Orient, comme nous auons dit, & que les planetes qui sont portez dans leur epicycle, vont tantost d'un costé, tantost de l'autre. Or est-il, que le mouvement que fait la Lune en son epicycle, estant tousiours surmonté par celuy de l'eccentrique, elle n'est iamais dite retrograde. Toutesfois, quand son mouvement est contre l'ordre des signes, cela allentit vn peu le chemin quelle fait sous le zodiaque. & est dite en ce temps-là tardive en sa course. Et quand son corps va de mesme part que l'eccentrique, elle va fort viste selon l'ordre des signes, & c'est lors qu'elle est dite viste en sa course. Et finalement quand elle nous paroist aller seulement comme à raison du mouvement de l'eccentrique, elle est dite mediocre en sa course. Ceste diuersité de vitesse se peut re-



marquer aux Almanachs, où l'on voit par fois que la Lune ne demeure que deux iours en vn signe, par fois aussi elle y demeure trois. Ce mouuement fait haster les crises aux maladies, ou les retarde.

D'OÙ VIENNENT LES
grandes retrogradations des planetes.

Cela vient du tardif mouuement de leur Ciel, & de la grandeur de leurs epicycles, lesquels on peut considerer en soy, ou

à comparaiſon des eccentriques qui les portent. Si on les conſidere en ſoy, le plus grand de tous eſt celuy de Saturne, puis celuy de Mars, de Iupiter, de Venus, de Mercure, & de la Lune. Et ſi on les compare avec leurs eccentriques, lors le plus grand fera celuy de Venus, puis celuy de Mars, de Mercure, de Iupiter, de la Lune, & de Saturne. Mais ceſte derniere conſideration ne fait pas tant les retrogradations grandes que la precedéte, principalement quand il ſ'y rencontre le tardif mouuement de l'eccentrique. Par exemple, le Ciel de Saturne fait en vn an quelque douze degrez du zodiaque, durant lequel temps ce planete va d'Orient en Occident par retrogradation, enuiron l'eſpace de quatre mois & demy. Iupiter eſt retrograde quelque peu moins, Mars enuiron deux mois & quelques iours. Les retrogradations des autres inferieurs, ſont de moindre durée. Et la Lune, à cauſe de la viteſſe de ſon eccentrique, & petiteſſe de ſon epicycle, n'eſt ſujete à aucune retrogradation: mais eſt portee touſiours vers l'Orient.

D'OV VIENT QUE LA
Lune approche plus près de nostre
zenith que le Soleil.

SI le chemin de la Lune estoit au dessous
de celui du Soleil, la Lune n'approche-
roit pas plus pres de nostre poinct vertical
que fait le Soleil: mais d'autant que le circuit
qu'elle fait au tour de la terre braise sous l'e-
cliptique, elle ne se trouue sous icelle que
deux fois le mois, & s'eloigne par ce braise-
ment de cinq degrez de la route ordinaire du
Soleil. D où vient que si en ceste elongation
elle se trouue du costé du Septentrion sous
nostre meridian, elle nous apparoit presque
verticale, comme approchant de nostre ze-
nith de cinq degrez dauantage que ne fait le
Soleil aux plus longs iours d'Esté. Mais au
contraire, aussi elle s'escarte plus vers le Mi-
dy, que le Soleil ne fait aux plus longs iours
d'Hyuer.

DES ASPECTS DES planetes.

L'Aspect des planetes est vne certaine distance
qu'ils ont au zodiaque, par laquelle ils s'aydent,

ou s'empeschent les vns les autres.

Il y a quatre sortes d'aspects entre les planetes ; sçauoir, quand la distance entr'eux est de deux signes, de trois, de quatre, ou de six. Et encore qu'il en puisse arriuer vne infinité d'autres, toutesfois pource qu'ils sont de peu d'efficace & de pouuoir, pour faire des mutations inlignes aux corps inferieurs. Les Astronomes se sont contentez seulement de ces quatre qu'ils ont nommez: Aspect sectil, quand il y a deux signes, ou 60. degrez entre deux: Quadrat, quand il y en a trois, ou 90. parties: Trine, quand il y en a quatre, ou six vingts degrez: Et finalement opposition quand la distance sera de 180. degrez, ou de 6. lignes. Ainsi le Soleil estant au 10. du Belier, a vn regard sectil avec la Lune, qui est au dixiesme des Gemeaux: vn regard quadrat à Mars, qui seroit au dixiesme de l'Ecreuisse: vn regard trine à Iupiter, qui occuperoit le dixiesme du Lyon: & finalement vn regard opposé à Saturne, qui se trouueroit au dixiesme de la Balance.

DES ASPECTS BONS ET mauuais.

LEs aspects des planetes ne sont de mesme genre: Car pas fois ils s'entreuoyent de mauuais œil, & par fois aussi d'un doux regard. L'aspect opposite est du tout malin, tant à cause de la distance, qui ne peut estre plus grande, qu'à cause de la discordance des signes opposez, qui sont de diuerse nature. En apres, suit l'aspect quadrat, qui n'est pas si mauuais, mais ne laisse de menacer quelque malheur, d'autant que les signes separez de telle distance, ne sont ny de mesme sexe, ny nature. Mais comme il y en a deux mauuais, aussi y en a il deux bons: l'un trine, qui promet tout bien, pource que les signes conuiennent en sexe & nature: & le sextil, auquel iacoit que les signes ne s'accordent comme au trine aussi ne sont-ils du tout contraires les vns aux autres, mais symbolisent en quelque chose.

DES PHÆNOMENES QUI suiuent le mouuement des planetes, comparez à la terre.


ON pourroit rapporter, si on vouloit, toutes les apparences celestes en ce lieu, pource qu'elles sont considerées au respect de ceux qui habitent sur la terre. Mais d'autant qu'il y en a qui arriuent, à cause de la quantité notable que la terre a en comparaison de certains Cieux. Pour ce sujet nous en ferons ce chapitre à part.

DES CONIUNCTIONS des planetes.

LA conionction de deux planetes est vne rencontre qu'ils font sous vne mesme ligne droite, au respect d'un certain lieu qui est sur la terre.

Il est facile à coniecturer pourquoy nous n'auons pas mis la conionction des planetes avec leurs aspects, pource que les planetes en ceste disposition n'ont aucune distance entr'eux, mais se trouuent en mesme ligne, l'un au dessus de l'autre. Or ceste ligne en laquelle ils se trouuent peut estre considerée, comme partant du centre de la terre,

ou de sa superficie. Si elle part du centre de




la terre, lors les planetes qui se trouuent sous ceste ligne, sont dits estre en vne vraye con-
ionction : Et si elle part de la superficie d'i-
celle, ceste conionction sera seulement dite
apparente, comme plus facilement il se voit
au Diagramme.

DES PARALLAXES DES planetes.

LE parallaxe est vn arc ou partie de circonfe-
rence du huietieme Ciel, compris entre le vray
lieu d'vn planete, & son lieu apparent.

I'expliqueray cecy en peu de mots. Si de
la superficie de la terre où nous sommes,
nous imaginons vne ligne droite qui parte
de nostre œil, & passe par le centre d'vn pla-
nete, icelle prolongée monstrera au zodia-

que le lieu apparent du planete. Mais si du centre de la terre on en imaginoit vne autre qui trauerfist le mesme planete, icelle prolongée montreroit lors le vray lieu; & l'arc qui seroit compris entre ces deux lieux, s'appelleroit parallaxe, ou diuersité d'aspect, comme l'un partant de la surface de la terre, & l'autre du centre. Ce qui arriue seulement aux planetes inferieurs, d'autant que le dia-



metre de la terre a quelque quantité notable au respect de leurs distances, & non pas aux superieurs & estoilles, à cause qu'ils sont trop esloignez. Au reste, on obseruera que plus les planetes sont pres de l'horizon, plus leur parallaxe est-il grand, & qu'il n'y en aucun quand le planete est vertical, pource que la ligne qui part de la superficie & du centre de la terre finissent ensemble, & montrent estant prolongées vn mesme lieu au Ciel. Voyez la figure.



DV LEVER ET COVCHER du Soleil.

C'Est vn des phanomenes plus manifestes, que le leuër & coucher du Soleil, à cause de la clarté & chaleur qu'il traïsne quant & soy, chassant par sa presence l'obscurité de la froidure, qui sont qualitez essentielles à tous les Elemens.



DE LA DIVERSITE' DES iours, & nuiëts artificielles par toute la terre.

POur bien considerer cecy, faut scauoir que le Soleil, tous les iours naturels, fait vn tour, estant emporté par le mouuement du premier mobile, cependant qu'il parcourt en son Ciel, enuiron l'espace d'un degré, qui fait que ces tours (à cause de l'obliquité de son chemin) ne sont pas cercles entierement. Car il faudroit qu'il fut immobile, mais sont comme lignes spirales, qui vont tousiours en croissant ou diminuât, selon qu'il s'approche ou s'esloigne de l'equateur, & en fait enuiron depuis vn tropique iusques en l'autre 182, lesquels cercles, ou pa-

rales du Soleil (car ainsi sont ils nommez de quelques vns) sont caule de l'egalité ou inegalité des iours & des nuités. Car s'ils




sont coupez en parties egales par l'horizon, les iours sont egaux aux nuités : ce qui arriue seulement à ceux qui sont souz l'equateur, & qui ont la sphere droite. S'ils sont coupez



inegalement, les iours sont inegaux, & ce d'autant plus que l'inegalité fera grande,

comme l'experimentent ceux qui ont la sphere oblique. Et s'ils y a quelques vnes de ces spires ou parallels du Soleil qui soient tous entiers sur l'horizon, autant qu'il y en aura, tout autant de iours le Soleil sera sans




se coucher, ainsi qu'ont esprouué les Hollandois en la zone froide. Finalement, ceux qui habiteront sous le pôle, auront vn iour artificiel de 182. iours, pource qu'il y a 182. parallels du

Soleil au dessus de l'horizon. La diuersité & inegalité des nuits est causée par les mesmes reuolutions du Soleil: Car selon la partie qui en sera cachée sous l'horizon, les nuits seront petites ou grandes. Et si le Soleil fait sous l'horizon vingt ou trente reuolutions, la nuit artificielle sera d'autant de iours naturels.

DE L'OMBRE DE LA terre & de la nuit.

LA terre & les hommes seroient en perpetuelle obscurité, n'estoit le Soleil qui



leur esclaire. On experimente cela estre tres-vray, parce que quand il est caché sous nostre horizon, la nuit & les tenebres nous environnent. Car la terre estant vn corps opaque, & n'estant pas possible que le Soleil encore qu'il la surpasse de beaucoup en grandeur, puisse illuminer tout l'air qui est autour d'icelle, s'ensuit qu'il en laisse vne petite partie obscurcie, que l'on appelle l'ombre de la terre, laquelle est tous-

iours directement opposee au Soleil, cōme y ayāt vne contrarieté entre la lumiere & les tenebres. La figure de cest ombre est conique

que

que, & s'estend enuiron de 268. demy diametre de la terre, & finit és enuiron de la Sphere de Venus.

DV CREPVSCVLE.

LE Crepuscule, est vne lumiere qui apparoist sur nostre horizon, auant que le Soleil se leue, & apres qu'il est caché: Ainsi dit de Creperus, qui signifie douteux, comme nous tenans en doute & suspens, s'il est iour ou nuict.

Le crepuscule se fait donc au matin & au soir, celuy qui se fait au matin, s'appelle l'aurore ou point du jour, & commence à paroistre quand le Soleil est à 18. degrez pres de l'horizon, & finit quand il se leue, & le crepuscule qui se fait au soir, on l'appelle vespre, ou l'entrenchien & loup: & commençant au Soleil couché, finit quand il est abbaissé de 18. degrez.

DES ECLIPSES.

LEs Phenomenes qui incitent le plus les hommes à l'admiration sont les eclipses du Soleil & de la Lune.

L

DE L'ECLIPSE DV SOLEIL.

L'Eclipse du Soleil est vne auersion des rayons du Soleil de dessus nous, par l'interposition de la Lune entre le Soleil & nostre veüe.

Où il faut noter premiereement que la Lune estant vn corps opaque, & se trouuant entre



le Soleil & nous, nous priue de la lumiere du Soleil, ce qui ne se fait iamais qu'en la nouuelle Lune, sçauoir quand le Soleil, la Lune, & nous, sommes en vne mesme ligne droite. Secondement que les Eclipses du Soleil sont particulieres, c'est à dire que le Soleil en mesme temps. n'est pas obscurcy par tout. Tiercement que le Soleil commence à s'eclipser du costé del'Occident,

& finit vers l'Orient, à cause que la Lune va plus viste d'Occident en Orient que le Soleil.

DE L'ECLIPSE DE LA LVNE.

L Eclipe de la Lune est vne priuation de la lumiere du Soleil au corps de la Lune, par l'interposition diametrale de la terre entre ces deux planetes.

Où il faut noter premierelement que la Lune n'ayant point de lumiere que celle quel-

le reçoit du Soleil, si la terre qui est vn corps opaque se trouue entre elle & le Soleil, elle la priue necessairement de sa lumiere ordinaire. Ce qui ne se fait toutefois qu'en la pleine Lune, quand elle se rencontre sous l'ecliptique ou proche d'icelle. Secondement que les eclipses de Lune sont toutes vniuerselles, c'est à dire que tous ceux qui peuvent voir la lune la voyent ecli-

L ij



psee. Tiercement que la Lune commence à s'eclipser du costé du Leuant, & finit vers le Couchant, pource que la Lune va plus viste que ne fait l'ombre de la terre, dans laquelle elle perd sa lumiere, qui va seulement à raison du mouuement du Soleil.

QV'IL N'EST PAS NECES.
faire que tous les mois il y ait
eclipse.

C'Est bien vne chose asseuree, que si la Lune alloit tousiours sous l'ecliptique comme fait le Soleil que tous les mois il se feroit deux eclipses, l'une du Soleil, & l'autre de la Lune. Mais d'autant que ces Phenomenes causent de grandes mutations en la region elementaire: pour ceste cause Dieu a donné vn cours à la Lune qui va seulement entrecoupant en deux endroits, celui que fait le Soleil. d'où vient que tous les mois il n'y a pas d'eclipse, pource que souuent au temps de la conionction ou opposition, la Lune est esloignee du chemin solaire, mais si par rencontre elle se trouue sous l'ecliptique en ces points d'interfection ou proche d'iceux, c'est lors qu'il peut arriuer quelque eclipse.

DE LA DIFFERENCE ENTRE les eclipses du Soleil & de la Lune.

1. **L** Es eclipses de la Lune se font quand la Lune est pleine, celle du Soleil quand elle est nouvelle.

L'eclipse du Soleil en la Passion de Iesus-Christ, fut donc contre l'ordre de la nature, car elle se fit en pleine Lune.

2. En l'eclipse de la Lune, la terre oste la lumiere à la Lune : en celle du Soleil, la Lune comme pour auoir sa reuanche, oste la lumiere à la terre.

Iadis ceux d'Athenes brusloient tous vifs ceux qui auoient ceste creance & les nommoient Meteoroleschis.

3. La Lune eclipse vrayment le Soleil en apparence.

Car en effect le Soleil ne laisse pas de luire, encore que nous le voyons obteurcy : mais la Lune n'ayant de soy aucune lumiere manifeste, elle est dite eclipsee quand le Soleil n'eclaire sur elle.

4. La Lune est eclipsee de mesme quantité par tout, mais le Soleil l'est en d'aucuns endroits plus, en d'autres moins, en d'autre point.

Ce qui se peut facilement entendre par la figure de l'eclipse du Soleil qui est icy mise.

5. L'eclipse de la Lune se fait en mesme instant, celle du Soleil en diuers temps, & apparoit premierement aux Occidentaux, puis aux Orientaux.

La Lune allant plus viste, selon son cours naturel d'Occident en Orient, que ne fait le Soleil, ceux qui sont plus Occidentaux voyent plustost l'eclipse du Soleil que ceux qui sont plus vers l'Orient.

D'O V VIENT QUE LES
eclipses de la Lune sont d'inegale
duree, encore que le Soleil soit en
mesme distance de la terre.

VOicy vn phænomené qui met vn cours
eccentrique a la Lune, pour lequel bien
concevoir, faut entendre premierement que
la Lune perd sa lumiere, quand elle entre
dans l'ombre de la terre. Secondement, que
le Soleil estant plus grand que la terre, com-
me il a esté dit, il faut que l'ombre d'icelle fi-
nisse en cône (qui est vne figure solide en for-
me de corne) large vers la terre, & s'appoin-
tissant en son esloignement. Si donc la Lu-
ne au temps de l'eclipse est proche de nous,
elle passe au trauers d'vne ombre plus espous-
se, & par consequent y demeure plus long-

temps que quand elle est esloignée de la terre, & qu'elle traaverse par l'extremité du cône. Voyez la figure pour plus facile intelligence.

De ce que dessus il est aisé à colliger, pourquoy il n'y a par fois qu'une petite partie de la Lune qui perd sa lumiere; sçauoir, celle qui se trouue en passant dans l'obscurité de ceste ombre.

DES DIVERSES FACES de la Lune.


L*es faces de la Lune, sont les diuerses figures qui apparoissent tous les mois à la Lune.*

Pour dire vray, le cours de la Lune, & tant de diuerses formes qu'elle nous represente, sont spectacles de la nature, si pleins d'admiration, que non seulement Endymion (que les Poëtes ont feint qu'il en estoit amoureux) mais tous les hommes la deuroient contempler; c'est à dire, obseruer son mouuement, tant à cause des insignes mutations qu'elle produit en l'air & aux corps des hommes, qu'à cause du flux & reflux des mers, que cét astre conduit, & des inondations qui s'en ensuiuent. On obseruera donc premierement, que tousiours la moitié de la

Lune est illuminée du Soleil; sçavoir, celle qui luy est opposée, encore que nous n'en voyons qu'une partie, petite ou grande, selon qu'elle nous représente sa face obliquement ou à plein. Secondement, que la Lune croist & décroist: elle croist quand elle paroist au soir, & a ses cornes tournées vers le Soleil levant: Et quand elle décroist, elle paroist au matin, & a ses cornes tournées vers le couchant. Tiercement, quand la Lune suit le Soleil, elle croist; quand elle marche devant, elle décroist. Finalement, pleine Lune luit tout le long de la nuit, la nouvelle au commencement, la vieille le iour.

DES REFRACTIONS.

C'Est vn principe d'Optique, que la veüe qui se fait par ligne droite, à la rencontre d'un milieu plus dense, fait vne refraction vers la perpendiculaire. Ce qui est manifeste par ceste experience. Mettez vn vaisseau contre terre, qui soit vuide, dans lequel apres y auoir mis vn double, ou autre chose notable, reculez petit à petit iusques à ce que le bord dudit vaisseau vous en empesche la veüe. Ce qu'estant fait sans partir du lieu où vous estes, commandez à quelqu'un qu'il



emplisse le vaisseau d'eau claire, & lors vous apparoiſtra de rechef l'object que vous ne pouviez plus voir. Ce qui arriue à cause que les rayons de l'œil, qui vont droit iusques à l'eau, se rabaiſſent & se rompent sur la superficie d'icelle, comme estant vn milieu plus dense, & plus espais que l'air. De meſme. les vapeurs qui sont sur terre, sont ſouuent ſi groſſes, que differant ſenſiblement de l'air qui nous enuironne, quand on conſidere les aſtres vers l'horizon, ſont cause que les rayons qui partent de noſtre veuë pour les voir, s'abaiſſent à leur rencontre : D'où ſ'enſuiuent ces apparences.


PREMIERE APPARENCE:

Les planetes & estoilles paroissent plus esleuées sur l'horizon, quand vray elles ne sont.

Et partant, pour auoir iustement la hauteur du Soleil & des estoilles, apres les auoir obseruées avec vn instrument, il en faut oster la refraction, qui est conuenable à ceste hauteur, car les plus plus grandes sont vers l'horizon.

SECONDE APPARENCE:

Les planetes & les estoilles paroissent se leuer plus tost, & coucher plus tard, qu'au vray elles ne font.



Car si les rayons visuels s'abbaissent vers la perpendiculaire, à la rencontre des vapeurs & nuages, on les peut voir selon le principe d'Optique, que nous auons icy mis, auant qu'elles se leuent & apres qu'elles sont couchées.

TROISIESME APPARENCE.

IL se peut faire eclipse, le Soleil & la Lune paroissant sur l'horizon.

Pline dit l'auoir autresfois obserué: Et de puis peu l'an 1590. vne eclipse de Lune parut à Tubinge (à ce qu'escrit Mestlin) le Soleil & la Lune estant sur l'horizon, le septiesme de Iuliet. Ce qui toutesfois seroit impossible, si vrayement les planetes estoient au lieu où ils se voyent. Mais les refractiōs sont cause de ces phanomenes, qui peuuent par fois estre si grandes, selon la qualité des vapeurs qui sont sur la terre, qu'elles feront paroistre le Soleil & la Lune leuez encore qu'ils soient abbaissiez de quelques degrez au dessous de nostre hemisphere. Pour preuue dequoy est l'experience des Hollandois, qui asseurent qu'estans en la nouuelle zemble, où le pole est esleué de 78. degrez, apres auoir sejourné quelques mois en ces quartiers-là, pour

attendre la venue du Soleil, l'apperceurent en fin quatorze ou quinze iours auant qu'il deuit se leuer, comme estant encore enuiron cinq degrez au deffous de l'horizon.

QVATRIESME APPARENCE.

L *E* Soleil paroist en l'horizon en forme d'ouale.

Les refractions sont encore cause de ceste apparence, pource que les vapeurs estant plus estenduës vers la surface de la terre, que vers la partie haute de l'air, les rayons qui partent de l'œil pour aller aux deux extremittez du Soleil, à droit & à gauche, font vne refraction, qui le fait paroistre de ces costez-là plus large, & par consequent luy donne ceste figure ouale.

CINQVIESME APPARENCE.

L *A* Lune paroist vers l'horizon aucunes fois de grandeur exceſſiue.

Quand la Lune se leue & se couche, s'il y a quelques vapeurs estendues sur la terre de toutes parts, elle paroist beaucoup plus grande qu'elle ne fait au milieu du Ciel, à cause que tous les rayons de l'œil, qui vont à sa cir-

conference, font vne refraction auparauant que d'y arriuer, grande ou petite, selon que les vapeurs sont rares ou denses. Ou bien cela se fait pource que les vapeurs sont comme vn miroir dans lesquelles s'imprime l'image de ceste astre, qui pour estre plus proche de nous quen'est son corps, nous semble plus grande, pource qu'elle est veüe sous vn plus grand angle.

DES PHÆNOMENES extraordinaires.

Seulement en passant nous expliquerons diuerses opinions touchant ces apparences, laissant à vn chacun libre eslection de croire ce qu'il voudra, comme estant encore vne matiere indecise.

DES COMETES.

ARistote a creu, & apres luy tous ceux de sa secte, que les cometes estoient vn meteore ignee, engendré en la region de l'air, d'vne matiere seche & grasse, attirée de la terre, par la chaleur du Soleil, en la supérieure region de l'air, laquelle estant là, s'allume par le voisinage qu'elle a du feu. Les

Astronomes ne different gueres d'auec Aristote, touchant la matiere : mais pour le lieu ne sont de son aduis. Car comme ils ont obserué quelques cometes estre au deffous de la Lune, aussi en ont-ils trouué plusieurs autres, qui sont bien au deffus d'elle : & quelques fois tellement esloignez de la terre, qui se sont trouuées plus hautes que le Soleil. Ce qu'ils asseurent principalement à cause qu'il ne s'y est trouué en la plus grande part aucun parallaxe ou diuersité d'aspect, mesme quand elles estoient proches de l'horizon, où il a accoustumé d'estre plus manifeste.

DES ESTOILES NOVVELLES.

POur monstrier qu'il se fait quelque alteration aux Cieux, le phanomené plus euident sont les estoilles, qui depuis vn siecle en ça, ont esté veuës. L'an 1572. on vit vne estoille en la constellation de la cassiopée, qui dura l'espace de 15. ou 16. mois, laquelle au commencement estoit si grande & claire, qu'en esclat & splendeur elle surpassoit le planete de Venus, & si esleuée, qu'elle a tousiours esté estimée estre au deffus de Saturne, comme n'y ayant iamais esté trouué aucun parallaxe. Elle surpassoit la solidité de la terre

quand on commença à l'appercevoir de 360. fois, & diminuant peu à peu en fin s'enuanoyt. Il y en a encore vne de present au Cygne, ioignant celle qui est en sa poitrine, qui ne se monstra que l'année 1600. laquelle est plus grosse que toute la terre de vnze fois. Et quelque quatre ans apres vers la fin d'Octobre, on en vit encore vne autre au Sagittaire, qui ne cedit en rien à la grandeur de celle de la Cassiopée, mais dura fort peu de temps. Ceux qui ne peuuent se persuader qu'il se fasse aucune mutation en la region etherée, disent que ces estoilles-là sont de tout temps au Ciel, mais qu'en s'abbaissant ils se font paroistre, & s'esloignant apres se perdent de venë. Raison qui n'a pas lieu en celle de 1572. car elle commença à se voir en sa plus grande beauté & splendeur, ny en celle-la aussi, que plusieurs de ce temps ont veu au Sagittaire.

DES PLANETES ET DES
estoilles nouuellement descou-
uertes.

Tous les siecles passez iusques à celuy du present, n'ont iamais obserué que sept estoilles errantes, qu'ils ont nommez pla-

netes : Mais auec l'ayde des lunettes Hollandoises , on en a bien veu d'autres du depuis. Galileus a obserué le premier les quatre satellites de Iupiter , qui font leur circuit au tour de ce planeté en treize ou quatorze iours, qu'ils a surnommez estoilles de Medicis. Après luy quelques Astronomes en ont obserué encore deux autres és enuiron de Saturne. Et plus recentemente on a recognu qu'il y a trente corps opaques , qui ont des periodes circulaires au tour du Soleil si irreguliers , qu'en l'espace de quinze iours qu'ils mettent à le faire , ils changent de figure, de nombre , & de grandeur. Entres lesquels il y en a quelques vns de la grosseur de la Lune, d'autres qui egalét la terre : on les a appelez les estoilles de Bourbon. Touchant le nombre des estoilles fixes, iacoit que la veuë ordinaire n'en ayt guere obserué dauantage que mil 22. si en obserue on maintenant vn bien plus grand nombre avec ce canal de perspective. Car par exemple , au lieu que l'on ne pouuoit discernier que 6. pleiades avec les yeux, par le moyen de cét instrumene, il s'en compte maintenât 27. Dauantage, les estoilles que iadis on appelloit nebuleuses, ne sont pas vne seule estoille, comme on a tousiours creu : Mais vne quantité de petits feux , qui
sont

sont l'un pres del'autre. Et finalement, ceste
Galaxie qui paroist à la veue ordinaire, com-
me vne bande blanchastre, comprend vne si
grande multitude d'estoilles, qu'il est impos-
sible de les nombrer: Et ce peut faire que les
premiers Peres ayent eu la veue assez bonne
pour les discerner. Et quand Dieu promet à
Abraham de multiplier sa semence comme
les estoilles, il en pouuoit admirer le nombre
en leuant les yeux au Ciel: mais que depuis
vne longue suite de siecles, les sens de l'hom-
me se sont tellemēt diminuez avec la vielles-
se du monde, que l'on ne pouuoit bien con-
cevoir la verité de ceste promesse, que par
cette admirable inuention de lunettes, qui
depuis peu d'années a esté mise en vsage.

Quant à la question de la vieillesse du monde, elle est
très difficile à résoudre. Les anciens philosophes
ont estimé que le monde n'avoit que six mille ans.
Mais les modernes, par leurs calculs, ont trouvé
qu'il en avoit plus de dix mille. Cependant, il est
certain que la vieillesse du monde a augmenté
depuis que l'homme a commencé à habiter la terre.
C'est pourquoy les premiers Peres ne pouvoient
pas concevoir la promesse de Dieu, qui leur
disoit qu'ils auroient une multitude de postérité.
Mais maintenant que nous avons les lunettes, nous
pouvons voir la multitude des estoilles, et nous
pouvons croire que la promesse de Dieu est véritable.



LIVRE IV.

DV GLOBE TER- restre.

LE Globe terrestre est vn corps, composé des deux Elemens inferieurs; sçauoir, la terre & l'eau.

C'a esté vn erreur ancien, de croire que les elemens estoient en raison decuple; c'est à dire, que la terre n'estoit que la dixiesme partie de l'eau, l'eau la dixiesme partie de l'air, & l'air la dixiesme partie du feu. Au contraire la superficie de la terre est presque egale à la superficie de l'eau: Et la profondeur des mers n'estant qu'à raison des montaignes d'où elles sont tirées, monstrent assez qu'au contraire la quantité qu'il y a de terre excède de beaucoup la quantité des eaux.

DE LA MESVRE DV GLOBE terrestre.

IL sera plaissant & vtile de mesurer la grandeur de ce centre, afin que plus on s'estonne de l'admirable structure de l'vniuers, & de la vastité des Cieux: la methode de ce faire est telle. Quelqu'un ayant trouué quelle est la latitude du lieu là ou il est, ou l'elevation du pole, s'en va directement vers le Midy ou Septentrion, iusques à ce qu'il apperçoie, apres auoir fait quelque notable chemin, que le pole soit haussé ou abbaissé d'un degré. Ce qu'estant arriué, s'il mesure l'espace de ce chemin qu'il aura fait, il trouuera 30. lieuës Françoises, qui seront la 360. partie du circuit de



la terre. En multipliant dont 360. par 30. il trouuera que le tour de la terre contient 10800. lieuës. Ce qu'estant cogneu, il sera aisé de trouuer le diametre ou epaisseur d'icelle, par la regle d'Archi-

mede, en disant si 22. de circonference donne 7. de diametre, que donnera le circuit de la terre qui contient 10800. lieuës. Le quatriesme proportionnel donnera 3436. lieuës & $\frac{4}{11}$ pour l'epaisseur requise. La moitié duquel nombre; sçauoir, 1718 $\frac{2}{11}$ monstrera combien il y a depuis la superficie iusques au centre. Et si la curiosité porte quelqu'un à sçauoir quelle est l'estenduë de la surface de la terre, & des eaux qui ne constituent qu'un globe; il faudra multiplier le tour, qui est 10800 par le diametre 3436. (reietant la fraction comme de peu de consequence) le produit donnera ce nombre 37108800. Et autant de lieuës quarées contient la conuexité de la terre. Et finalement, si l'on desire sçauoir la solidité, il faudra multiplier la tierce partie de la conuexité, sçauoir 12369600. par le demy diametre 1718. le produit donnera 21250972800. & autant de lieuës cubiques ou solides sera toute la solidité, qui n'est toutesfois qu'un point au respect des Cieux. Les anciens qui auoient de coustume de mesurer les grandes distances sur la terre par stades, ont aussi trouué le circuit d'icelle par la mesme mesure: Et disent que le circuit de la terre (si on croit Theodose, Macrobe, & Eratosthene) contient 252000. stades, don-

nant 700. stades à chaque degré que l'on fait de variation au Ciel. En quoy il different quelque peu du calcul du renommé Geometre Dionysiodorus, qui en donne 733. Dans le sepulchre duquel on trouua vne lettre qu'il escriuoit à ceux de ce monde icy, par laquelle il les aduertissoit qu'il estoit descendu de son sepulchre iusques au centre de la terre, & qu'il auoit mesuré que l'espace contenoit 42000. stades, partant le diametre de la terre, selon son dire, estoit de 84000. & le circuit de 264000. qui diuisé par 360. donne enuiron 733. stades pour vn degré de variation.

DES CERCLES DV GLOBE terrestre.


L*es cercles du globe terrestre, sont cercles qui droitement sont au deffous de ceux qui sont au dixiesme ciel.*

Les Geographes, à l'imitation des Astronomes, ont diuisé la surface de leurs globes par certains cercles, pour pouuoir distinguer plus aisément les regions de la terre: & les ont disposez de telle sorte, que les celestes sont droitement au dessus des terrestres. Ainsi voyez vous en nostre sphere, que tous

jours l'equateur celeste est au dessus de celui de la terre , & les deux tropiques celestes au dessus des terrestres ; ainsi de tous les autres : pareillement les poles de la terre droit au dessous des poles du monde.

DE L'EQUATEUR.

L'Equateur terrestre est un grand cercle, également distant des poles de la terre.



Quand les Marins ont passé ce cercle, ils croient que toutes meschancetez leur sont permises ; ils l'appellent la ligne equinoctiale, & absolument la ligne.

DV MERIDIEN.

L'E meridien terrestre d'un lieu est un grand cercle, qui passe par les poles de la terre, & par dessus le lieu.

En general , tous les cercles qui passent par les poles de la terre, sont dits meridiens terrestres, & les Geographes en imaginent

tant qu'il leur plaist, d'autant que chaque lieu a son meridien. Toutesfois de peur de confusion ils les esloignent de dix degrez en dix degrez ordinairement sur leurs chartes & globes, & pour y conseruer quelque ordre, constituënt pour le premier celuy qui passe par les Isles fortunées, & de là vont en constant vers l'Orient, iusques à ce qu'ils arriuent à leur premier meridien. Où on obseruera que leurs meridiens ne sont pris que pour demy cercles, qui se finissent aux poles de la terre.

DE L'ECLIPTIQUE.


L Ecliptique terrestre est vn grand cercle décrit sur le globe, tant pour l'ornement, que pour sçauoir sous quel signe celeste est chaque region, qui est comprise entre les tropiques.

Nous ne faisons point mention icy de l'horizon, ny des colures, pource qu'il ne sont point décrits sur le globe terrestre.

DES CERCLES PARALLELS.

L Es cercles parallels principaux, sont quatre petits cercles, les deux tropiques, & les deux polaires.

Les Géographes, outre ces quatre petits, en descriuent d'autres sur leurs globes de dix degrez en dix degrez, qui vont rousiours en s'appetissant vers les poles de la terre, avec



de l'autre.

liberté toutesfois d'en descrire tant qu'il plaira à vn chacun. Le premier de ces cercles parallels là, est l'equateur, duquel ils commencent à compter, tant du costé d'un pole, que

DES TROPIQUES terrestres.

Les tropiques terrestres, sont deux cercles parallels droitement mis au dessous des celestes, ausquels quand le Soleil est, il fait le plus long ou le plus petit iour de l'année. Le plus long au tropique de l'Ecreuisse, le plus petit au tropique du Capricorne.

Ces cercles sont en semblables distances entr'eux, que ceux qui sont au premier mobile, qui fait que si la sphere est bien faite, encore que l'on la tourne, la terre demeure

toutesfois immobile, & ces cercles drois au
deffous des autres.

DES CERCLES POLAIRES.

Les cercles polaires sont deux cercles parallels,
droitement mis au deffous de ceux qui sont au
Ciel, qui passent par les poles du Zodiaque.

Cela se voit aysément en nostre sphere.
Soit la sphere esleuée par le meridiem, ius-
ques à ce que la circonference du cercle po-
laire soit sous le zenith, lors vous verrez au
petit globe terrestre le polaire droitement
au deffous: en sorte que si quelqu'un est sur
le cercle polaire terrestre, il a au dessus de sa
teste le polaire celeste. Ils sont deux, le po-
laire arctique & antarctique, comme au
Ciel.

D E S Z O N E S.

Zone est vn espace du globe terrestre, enclos
entre deux petits cercles, ou entre vn petit
cercle & le pole de la terre.

Les quatre petits cercles parallels; sçauoir,
les deux tropiques, & deux polaires, que les
Geographes peignent sur leurs globes terre-
stres, diuisent la surface de la terre en cinq
espaces, qu'ils appellent zones, qui vaut au-

tant à dire que ceintures, pource que comme ceintures elles entourent la terre. Parmenides a esté le premier qui a diuisé la superficie de la terre en zones. Il y en a toutesfois qui veulent que les zones soient prises au Ciel & non à la terre. Mais il n'importe pas en quel lieu on les prenne, d'autant que la conuexité de la terre, estant concentrique à la concavité du Ciel, leurs superficies sont en semblable situation. En sorte que les parties du Ciel respondent exactement aux parties de la terre, mesmes les cercles aux cercles, & les poincts aux poincts.

DV NOMBRE DES ZONES.

Les zones sont au nombre de cinq, vne torride, deux tempérées, & deux froides.

Polibe toutesfois en a mis six, deux torrides, deux tempérées, & deux froides.

DE LA ZONE TORRIDE.

La zone torride est vn espace du globe terrestre, enclos entre le deux tropiques terrestres, qui contient de large 1410. lieues Françoises.

C'a esté vn erreur du temps passé, de croire que la zone torride estoit inhabitable,

à cause de l'extreme chaleur que l'on imagi-
noit y estre. Ce que Plin^e a entendu, quand
il a dit, qu'il n'y auoit aucuns hommes au zo-
diaque, prenant pour zodiaque l'espace de
la terre, qui est compris entre les tropiques
terrestres: ce mot torride, qui signifie rotie,
les sollicitoit à ceste croyëce. Mais l'experien-
ce tesmoigne le contraire. Car en Quito &
plaine du Peru, la zone torride est temperée,
mesme il y a des regions en icelle, où cepen-
dant que le Soleil est vertical, il fait extreme-
ment froid. Ce qu'Acosta attribue toutes-
fois aux terres hautes. Aussi se chauffe-t'on
sous l'equinoctial, le Soleil estant au Belier:
Bien est vray qu'elle est extremement chau-
de en Ethiopie. au bresil & molucques. Ge-
minus n'a pas esté ignorant que ceste con-
trée là estoit abondante en toutes choses:
Ce qu'il auoit appris par la relation de ceux
que le Roy d'Alexandrie y auoit enuoyez:
Comme aussi Polybe l'Historien, qui a fait
particulierement vn liure de ceux qui habi-
tent sous l'equateur. Et quelques Theolo-
giens ont creu, que le Paradis de volupté
estoit en ces lieux là: Et Lira dit, que le
Cherubin qui tenoit le glaive flamboyant,
n'estoit autre chose que les chaleurs excessi-
ues qui se trouuent sous les tropiques. Car

en effect, s'il y a lieu au monde incommode de la chaleur, c'est à l'entrée de ceste zone, & non sous l'equateur, comme il sera dit cy apres.

DES ZONES TEMPEREES.

LEs deux zones tempérées sont les espaces du globe terrestre, enclos entre les tropiques & polaires terrestres, qui contiennent chacun en large 1290. lieues Françaises.

Il y a donc deux zones tempérées, l'une qui est comprise entre le tropique de l'Ecrinisse & du cercle arctique, qui est celle que nous habitons, que l'on appelle tempérée Septentrionale: l'autre, qui est comprise entre le tropique du Capricorne & du cercle antarctique, qui est dite tempérée Meridionale. Ces zones sont ainsi nommées, à cause que la chaleur du Soleil y est modérée, tant pour ceux qui y habitent, que pour toutes autres choses qui y croissent.


DES ZONES FROIDES.

LEs deux zones froides sont les espaces du globe terrestre, enclos entre les polaires & poles terrestres, qui contiennent de large 705. lieues Françaises.

On ne peut pas parler si pertinemment des zones froides comme des autres, d'autant que l'on n'est entré encores qu'au commencement de celle qui est au Septentrion; par laquelle entrée on peut cognoistre toutes-fois que c'est vn lieu tres incommodé pour la demeure, attendu les glaces, les froids excessifs, les nuits de plusieurs mois, en quelque saison de l'année. On croit que les anciens en auoient eu quelque cognoissance, pour ce que Pytheas Massiliote, en son liure de l'Ocean, dit que les Barbares luy monstroient les lieux où la nuit estoit fort courte, comme de deux ou trois heures; d'autres ausquels le Soleil estant couché en Esté, vn instant apres il se leuoit. Ce qui n'est pas neantmoins indice certain, qu'il soit entré en la zone froide, mais bien qu'il en a approché, comme en l'Isle Thyle, ou Island, où quelquesvns disent qu'il seiourna quelque temps; auquel lieu, d'autant que le tropique d'Esté est tout entier sur la terre, ces phanomenes de la longueur des iours & des nuits s'y peuuent obseruer.

DES PROPRIETEZ DES
Zones.

C'Est vne consideration plaisante, de sca-
voir quele est le temperamment de l'air,
les commoditez ou incommoditez des
lieux, les phanomenes qui arriuent par tou-
te la terre, selon le cours du Ciel, sans y al-
ler voir. Ce qui se pourra toutesfois cognoi-
stre par le discours qui s'ensuit.

DES PROPRIETEZ ET
accidens qui arriuent à ceux qui ha-
bitent en la zone torride sous
l'equateur.

Ceux qui habitent sous l'equateur ont
la sphere droite, car l'un & l'autre pole

du monde sont en l'horizon: d'où s'en ensuiuent ces apparences.

1. En ceste demeure, toutes les estoilles du Ciel se leuent & se couchent: & partant, il est tres-facile de les y obseruer.

2. Toutes les estoilles qui se leuent en mesme instant, arriuent aussi en mesme instant sous le meridien, & en mesme instant se couchent.

3. Ils ont vn perpetuel equinoxe; c'est à dire, les iours leur sont tousiours egaux aux nuëts: pource que l'horizon coupe tous les parallels ou tours que fait le Soleil en parties egales.

4. Le Soleil leur est deux fois l'an vertical; sçauoir, au commencement du Belier, & de la Balance.

5. Ils ont deux solstices egalelement distans de leur zenith; sçauoir, de vingt-trois degrez & demy.

6. Qui fait que si la proximité ou esloignement du Soleil, est cause par tout le monde de la varieté des saisons de l'année: ils ont deux Estez, quand le Soleil approche de l'equinoctial: & deux Hyuers, quand il s'abaisse vers les tropiques.

7. En ceste contrée, les heures egales & inegales sont tousiours semblables;

ce qui n'arriue aux autres lieux que deux fois l'an ; ſçauoir , aux equinoxes.

8. Ils ont cinq ombres toutes differentes: Orientale, quand le Soleil ſe couche: Occidentale, quand il ſe leue: Septentrionale, quand il eſt aux ſignes auſtraux: Meridionale, quand il eſt aux Septentrionaux: & vne ombre perpendiculaire à Midy, quand il eſt en l'equateur deux fois l'an


9. Touchant la qualité de l'air, il y eſt fort temperé, pour pluſieurs raiſons. La premiere, à cauſe que le Soleil eſt autant de temps ſous terre que ſur terre: d'où vient que l'air eſtant refroidy par la nuit & l'eſpace de 12. heures, il ne cede pas ſi toſt à la chaleur du Soleil. Puis il y a pluſieurs exhalaiſons qui ſourdent de terre au leuer & coucher d'iceluy, qui ſe reſoudent en pluye, quand il eſt eſleué, ou pour le moins rendent le Ciel plein de nuées. D'auantage, la plus part des rayons du Soleil tombent ſur les eaux, qui font vne reuerberation fort foible, à cauſe de leur mouuement inconstant. A quoy ſi on y adiouſte les vents continuels qui viennent d'Orient, que les Mariniers appellent briles, on ne doit ſ'eſtonner ſi toutes ces cauſes concourantes, l'air n'y eſt pas ſi chaud comme on a creu. Mais outre tout cela, il faut conſiderer

encores

encores, que le Soleil allant plus vifte au milieu du monde, n'eschauffe pas tant que quand il va plus lentement, comme sous les tropiques. Et que s'il leur est vertical deux fois l'an, dès le lendemain aussi fait-il vne grande declinaison, s'esloignant de 24. minutes de leur zenith.

DES PROPRIETEZ ET accidens qui arriuent à ceux qui habitent en la zone torride, entre l'equateur & les tropiques.

Ceux qui habitent entre l'equateur & les tropiques, ont la sphere oblique. Car vn des poles leur est esleué, l'autre abaissé: d'où s'ensuiuent ces apparences.



1. En ceste position de la sphere, il y a des estoilles, qui ne se couchent

iamais, d'autant qui ne se leuent point.


2. Icy commence à paroistre l'inegalité des iours & des nuits, à cause que les iours

ou parallels du Soleil , sont coupés par l'horizon en parties inegales.

3. Le Soleil deux fois l'an leur est vertical, comme sous l'equateur , mais non pas aux mesmes degrez du zodiaque.

4. Ils ont aussi deux solstices , l'un haut, l'autre bas , inegalement distans de leur zenith.

5. Qui fait que si la proximité ou esloignement du Soleil , cause par tout le monde les diuerses saisons de l'an. Ils ont deux Estez, quand le Soleil approche de leur teste : & deux Hyuers, quand il descend vers les tropiques. Toutesfois , d'autant qu'il y en a vn, qui est moins esloigné que l'autre , il est manifeste que les Hyuers seront de diuers temperammens. Et si le lieu est bien près d'un



tropique, il n'y aura aucun Hyuer quand le Soleil s'en approchera.


6. Ils ont cinq ombres , comme sous l'equateur : Orientale , Occidentale , Meridionale , Septentrionale , & vne perpendiculaire à midy , deux fois l'an.

7. Il ya icy vne chose digne de remarque, qui est que quand le Soleil est plus esloigné de l'equateur, que n'est le point vertical ou zenith: Les ombres des arbres, des maisons, & autres corps s'auancent & reculent, deuât & apres midy, sans miracle toutesfois, à cause que le cours du Soleil coupe lors vn mesme azimuth en deux endroits, deuât & apres midy. On pourroit faire la mesme obseruation icy, mais sur vn plan incliné; car sur vn qui seroit parallele à l'horizon, cela n'arriuera iamais.

8. Touchant le temperamment, c'est chose manifeste, que les raisons alleguées cy-deuant, pour prouuer que l'air est temperé sous l'equateur, ne peuuent auoir tant de lieu icy: & partant il est necessaire qu'en Esté les chaleurs y soient incommodes, & plus grandes: Et que semblablement l'Hyuer soit plus froid, quand le Soleil est au tropique qui leur est plus esloigné.

DES PROPRIETEZ ET accidens qui arriuent à ceux qui ha- bitent à la fin de la zone torride, ou au commencement de celles qui sont temperées.

CEux qui habitent à la fin de la zone tor-
ride, ou au commencement de celles
qui sont temperées,
ont leur point ver-
tical sous les tropi-
ques, & la sphere
inclinée de 23. de-
gréz & demy : d'où
s'ensuiuent ces phe-
nomenes.



1. En ceste posi-
tion du monde, toutes les estoilles qui com-
prennent les cercles polaires, sont de per-
petuelle apparition, ou occultation.

2. Les iours & nuits sont plus inegales
en ceste demeure, qu'en la precedente.

3. Le Soleil vne fois leur est vertical,
quand il est au tropique qui est sur leur teste.

4. Ils ont deux solstices, l'un vertical,
autre e floigné de leur zenith de 47. degrez.

5. Qui fait que si la proximité ou esloignement du Soleil, fait les quatre saisons de l'an: ils auront vn Esté tres-chaud, quand il sera au tropique qui est sur leur teste: & vn Hyuer assez froid, quand il sera à l'autre qui est esloigné d'eux.


6. Ils ont seulement 4. ombres: Orientale, Occidentale, vne vers leur pole, & vne perpendiculaire seulement vne fois l'an.

7. Pour le temperamment de l'air, il n'y a contree qui mieux merite estre dite torride, que celle qui est és environs des tropiques, pource que toutes les causes de chaleur se trouent en cét endroit. Premièrement, le Soleil leur est vertical, aussi bien qu'en aucun lieu de la zone torride. Secondement, ce qui accroist extremement la chaleur, c'est que la declinaison du Soleil s'augmente ou se diminue de si peu és environs des tropiques, que l'on peut dire qu'il est sensiblement 40. iours & plus, à courir tousiours par dessus leurs testes, quand il est vers le solstice d'Esté. Dauantage, le Soleil demeure plus long temps en Esté sur l'horizon, & moins sous terre, qu'il ne fait entre les tropiques. Ioinct à ce qu'il va plus tardiement que sous l'equateur, comme s'estant esloigné de 23. degrez, & plus du milieu du monde, où le

mouuement des Cieux est plu rapide. Et puis il y a vne bien plus grande estendue de terre sous les tropiques, qui fait que les rayons du Soleil se reflechissent apres plus de violence, que quand ils tombent sur les eaux.

DES PROPRIETEZ ET accidens qui arriuent à ceux qui habitent aux zones temperées, entre les tropiques & cercles polaires.

Ceux qui habitent aux zones temperées, entre les tropiques & polaires, ont la sphere encore plus oblique qu'en la precedente position. Et partant le pole plus esleué que 23. degrez & demy, mais moins aussi que 56. & demy; d'où s'ensuiuent ces apparences.



1. Il y a plusieurs estoilles, plus ou moins, selon l'obliquité de la sphere, ou esleuation du pole, qui sont tousiours sur l'horizon sans se coucher, & d'autres qui sont tousiours au dessous sans se leuer.

2. L'inegalité des iours & nuicts s'augmentent, d'autant plus qu'ils ont le pole esleué, en sorte qu'il y a des nuicts qui ne sont qu'un crepuscule, en plusieurs endroits des zones tempérées.

3. Le Soleil ne leur est iamais vertical, mais s'approche de leur zenith, plus ou moins, selon qu'ils ont la sphere oblique.

4. Ils ne laissent pourtant d'auoir deux solstices, l'un proche, l'autre esloigné, de mesme partie du monde.


5. D'où vient que le Soleil faisant les saisons par son approchement ou esloignement: ils ont un Esté & un Hyuer quand le Soleil est aux tropiques.

6. Ils ont seulement trois ombres, Orientale, Occidentale, & vne vers leur pole.

7. Pour la temperie de l'air, elle est diuerse, à cause de l'estendue de la zone, qui contiét depuis un des tropiques iusques aux polaires 1410. lieues Françoises. Ceux donc qui seront plus proches des tropiques, auront un Esté plus ardent: Ceux qui approcheront des polaires, un Hyuer plus long.

DES PROPRIETEZ ET
accidens qui arriuent à ceux qui ha-
bitent à la fin des zones tempérées,
ou au commencement de celles qui
sont froides.

Ceux qui habitent à la fin des zones
tempérées, ou au commencement de
celles qui sont froids, ont le pole esle-
ué de 66. degrez &
demy, & leur zenith
dans le cercle polaire;
d'où s'ensuiuent ces
apparences:



1. Il y a encore plus
grande quantité d'es-
toilles, qu'en toutes les autres positions pre-
cedentes, qui sont de perpetuelle apparition
& occultation. Car toutes celles qui sont
enclofes dans leur tropique d'Esté, ne se cou-
chent iamais, encore qu'elles soient sur l'ho-
rizon: & toutes celles qui sont enfermées
dans le tropique d'Hyuer, iamais ne se le-
uent.

2. Il y a vne si grande inegalité de iours &

nuiçts, que le plus grand iour d'Esté est de 24. heures, & la plus grande nuit d'Hyuer de 24. heures aussi, à cause que le tropique d'Esté est entierement sur l'horizon, & le tropique d'Hyuer caché au dessous.

3. Ils n'ont iamais le Soleil vertical; mais au contraire, il en est si esloigné, qu'il ne s'approche iamais d'eux plus pres que de 43. degrez.

4. Ils ne laissent pourtant d'auoir deux solstices, l'un au tropique d'Esté, & l'autre au tropique d'Hyuer, distant de 90. degrez de leur zenith. Ce tropique ne paroist iamais, & touche seulement l'horizon en vn point.

5. L'esloignement du Soleil de leur point vertical, est cause qu'il fait tousiours froid en ces regions-là.

6. Ils ont quatre sortes d'ombres, Orientale, Occidentale, vne vers le pole, & vne fois l'an vne ombre circulaire tout à l'entour de l'horizon, quand le Soleil est à leur tropique d'Esté.

7. Le Soleil leur est tousiours du costé du Midy, fors vers le tropique d'Esté, où il semble, quand il s'abbaisse, estre du costé du pole.

8. C'est vne remarque notable, qu'en cette obliquité de sphere, en vn instant il y a 6. si-


gne de l'ecliptique qui se leuent, & six signes qui se couchent tous les iours quand le Soleil est en l'horizon: d'où s'ensuit que par fois cinq ou six planetes se couchent & leuent en vn moment.

9. En ceste habitation il y a vn iour naturel de 24. heurés, sans aucun crepuscule, ny nuit, qui est le plus long iour d'Esté. Plusieurs iours avec crepuscule, sans aucune nuit (qui est quand le Soleil s'abbaisse sous l'horizon moins de 18. degrez) és enuironns du solstice d'Esté. Plusieurs iours aussi avec crepuscule & nuit, quand il s'abbaisse apres qu'il est couché de quelques degrez dauantage. Et finalement vn iour naturel de 24. heures, composé de crepuscule & pure nuit, sans que l'on voye le Soleil: ce qui arriue au solstice d'Hyuer.

DES PROPRIETEZ ET
accidens qui arriuent à ceux qui habitent dans les zones froides, entre les cercles polaires & les poles.

CEux qui habitent entre les cercles polaires & les poles du monde, ont la sphere tres oblique, le pole esleué plus de

66. degrez & demy:
d'où s'ensuiuent ces
apparences.



1. Il y a vne tres-
grande quantité d'e-
stoilles, qui sont en
ces lieux-là de per-
petuelle apparition
& occultation, & ce

d'autant plus qu'ils approchent du pole du
monde.


2. Vne si grande inegalité de iours & nuits,
que le Soleil paroist sur l'horizon plusieurs
iours, & par fois plusieurs mois (quand on
approche des poles) sans se coucher: Ce qui
arriue à cause que l'horizon coupe tousiours
l'ecliptique en deux points equidistans du
solstice d'Esté: Entre lesquels s'il s'y trouue
20. ou 30. degrez, pendant que le Soleil cour-
ra par ceste partie, il fera 20. ou 30. iours à
luire sur l'horizon, sans se coucher. Mais en
contrechange aussi, il arriuera pour les mes-
mes causes, que les nuits d'Hyuer, egale-
ront ces longs iours d'Esté, pource qu'il y
aura vne pareille portion de l'ecliptique qui
ne paroistra point sur l'horizon, ou le Soleil
estant il ne se leuera point.

3. Ils ont le Soleil tres-esloigné de leur

zenith. Vn solstice seulement manifeste, sçauoir celuy d'Esté, & celuy d'Hyuer est caché sous l'horizon.

4. Ils ont comme les precedens habitans quatre sortes d'ombres, Orientale, Occidentale, vne vers le pole qui leur est apparent, & plusieurs circulaires, sçauoir, autant de fois que le Soleil luit de iours sans se coucher.

5. En ceste demeure il y a plusieurs reuolutions Solaires, sans crepuscule ny nuit: Plusieurs iours aussi avec crepuscule sans nuit, plusieurs avec crepuscule & nuit, & finalement plusieurs iours composez de crepuscule &



nuit: Et si on est proche du pole plusieurs nuits sans crepuscule ny iour.

6. Il y a vne chose à remarquer en ceste disposition du monde, que le Taureau se leue auparauant le Belier, le Belier avant les Poissons, les Poissons avant le Verseau, encore que les signes qui leur sont opposez se leuent selon leur ordre, mais aussi se couchent ils contrel'ordinaire.


7. Partant il peut arriuer aucunes fois, que

la Lune se leue deuant le Soleil, & qu'elle se couche quelque temps apres si elle est au signe du Taureau, & que le Soleil soit au commencement des Poissons ou du Belier.

8. Pour le temperamment de l'air, il y est tres froid, à cause que le Soleil est tres-esloigné, & neiette ses rayons que bien obliquement sur les terres, les vens du costé du pole si ordinaires, que nature semble leur auoir donné vn Empire parmy le Ciel de ces quartiers-là. L'hyuer y est si ennuyant, qui les tyrannise par l'espace de six ou sept mois, & tient la surface de la mer solide & asseurée, comme si on auoit à se pourmener dessus: l'Esté si plein de tenebres continuelles, qui dissipees enuiron les deux ou trois heures apres midy, reprennent incontinent leur premiere obscurité. Les glassons sont si grands sur les mers, que quand ils commencent à se desjoindre, l'on diroit que se sont Isles flotantes, qui s'entre-heurtent pour se perdre l'vne l'autre.

DES PROPRIETEZ ET accidens qui arriuent à ceux qui ha- bitent au milieu des zones froi- des sous les poles.

CEux qui habitent dans les zones froi-
des, directement sous les poles, ont la
sphere parallele: d'où s'ensuiuent ces pha-
nomenes.



i. D'autant que l'horizon & equinoctial
sont joincts ensemble, toutes les parties du
Ciel qui sont en l'hémisphere superieur, pa-
roissent tousiours sans se leuer ny coucher:
Et celles qui sont en l'hémisphere inferieur,
sont tousiours sous la terre, quoy que le
monde tourne.

2. L'année y est comme vn iour naturel, le Soleil estant six mois entiers sur la terre, & six mois entiers au dessous. A cause de six signes du zodiaque qui sont tousiours au dessus del'horizon, & autant au dessous.

3. Pour la mesme raison, le planete de Saturne y est quinze ans sans se coucher, Iupiter six, Mars vn an, le Soleil, Venus, & Mercure six mois, & la Lune quinze iours, où on notera que le leuer & coucher des planetes se fait à l'equinoxe.

4. Quand le Soleil est au tropique, il est à sa plus haute eslevation, sçauoir de 23. degrez & demy en toutes les parties de l'horizon.

5. Qui fait qu'ils n'ont aucun Orient ny Occident, pource que le Soleil fait toutes ses reuolutions paralleles à l'horizon, & par consequent, ils n'ont qu'vne ombre circulaire.

6. En ceste disposition du Ciel il y a enuiron 182. reuolutions Solaires sans nuit, ny crepuscule: plusieurs qui n'ont ny iour ny nuit, mais vn crepuscule continu. Et finalement plusieurs aussi qui sont en perpetuelles tenebres sans iour ny crepuscule.

7. Pour le temperamment de l'air, il ne peut qu'il ne soit tres-incōmode, à cause des

grands froids , des glaces , des neges , & des tenebres continuelles.

DES CLIMATS.

VN climat, est vn espace du globe terrestre, compris entre deux cercles parallels à l'equateur, entre lesquels il y a variation de demy heure au plus long iour d'Esté.

Les Geographes ne se sont pas contentez de diuiser la terre en zones, pour la diuerse temperature de l'air. Mais ils l'ont diuisée aussi, ayant esgard à la grandeur des iours artificiels, en ceste sorte. Par exemple, sur l'equateur, les iours ont perpetuellement douze heures: mais si de là on va vers les poles, ils s'augmentent tousiours de plus en plus, iusques à ce quel'on soit paruenue au pole où le iour y est de 6. mois entiers. Ils ont donc enfermé vn certain espace de terre, entre deux cercle parallels à l'equateur, qu'ils ont nommé climat: entre lesquels il y a variation de demy heure: c'est à dire, si sur le plus proche de l'equateur, le plus grád iour d'Esté est de 13. heures: Il faut que sur l'autre il y ayt 13. heures & demie, pour finir ceste espace de terre qu'ils nomment climat, qui est à dire inclinatió, pource que la sphere
selon

selon la diuersité des climats, se panche & s'incline. Ce qui se comprendra plus aisément à l'explication que i'ay faite de la chartre vniuerselle.

DV NOMBRE DES CLIMATS, selon les anciens.

L*Es anciens ont fait 7. climats, qu'ils ont nommé Diameroé, Diasyenes, Dialexandrias, Diarhodou, Diaromes, Dia Borystenous, Diaripheon, à cause que le lieu de ces climats passoit par les lieux cy-dessus:*

Celuy qui passoit par Meroé, qui est vne Isle du Nil, estoit selon les Astrologues sous la domination de Saturne. Celuy qui passoit par Syene, qui est vne ville d'Egypte, en la domination de Iupiter. Le troisieme, qui passoit par Alexandrie, ville d'Egypte, appartenoit à Mars. Le quatrieme, par l'Isle de Rhodes, au Soleil. Le cinquiesme, par Rome, à Venus. Le sixiesme, passant par l'emboucheure du fleuve Borysthene, à Mercure. Le septiesme, trauersant les Monts-riphées, estoit donné à la Lune.

DV NOMBRE DES CLIMATS, selon les nouveaux.

Les nouveaux ont distingué toute la surface de la terre, depuis l'equateur iusques aux poles en 30. climats, desquels les 24. premiers different entr'eux de demy heure, & les six autres de trente iours.

Les anciens, comme i'ay dit, constituoient 7. climats seulement, pource qu'ils estimoient qu'il n'y auoit que ceste partie-là de la terre qui fut habitable, laquelle ils diuisoient en 7. Ptolomée, qui en a cogneu dauantage, en a fait neuf: & les nouveaux, encore que toute la terre ne soit encore decouuerte, ne laissent de diuiser toute la surface d'icelle, depuis l'equateur iusques aux poles en climats, les vns d'une façon, les autres d'une autre. La plus facile à retenir, est celle que nous auons baillee; sçauoir en 30. Vingt-quatre desquels sont entre l'equateur & cercles polaires: les six autres, dans les zones froides. La pratique de cecy est demonstree à la 12. proposition du cinquiesme liure.

DES PARALLELES des iours.

VN parallele de iours, est vn espace du globe terrestre, enclos entre deux cercles parallels à l'equateur, entre lesquels il y a variation d'un quart d'heure au plus long iour d'Esté.

On a accoustumé de tout temps de diuiser chaque climat par la moitié, non pas ayant esgard à la largeur du climat, mais à l'espace de temps que contient le climat, & appelle-t'on ceste moitié vn parallele de iours, qui toutesfois est vn espace de terre, compris entre deux cercles parallels, entre lesquels il y a variation d'un quart d'heure; c'est à dire, si sous le plus proche de l'equateur, le plus grand iour est de 13. heures: sous l'autre il y doit auoir 13. heures & vn quart, afin que cét espace comprenne vn parallele de iours.

DU NOMBRE DES PARALLELES des iours.

Selon les anciens, il y en auoit 14. & selon les nouueaux, il y en aura 60.

Puisque chaque climat contient deux paralleles il est nécessaire que les anciens en eussent 14. & les nouueaux qui en mettēt 30. auront

60. paralleles: sçauoir, 48. qui vont de quart d'heure en quart d'heure, & 12. qui vôt de 15. en 15. iours. La douziesme propositiō de l'usage de la sphere, enseigne en quel climat & parallele, selon les anciens & nouueaux chaque contrée est située.


DE LA DIVISION DE LA superficie de la terre, par la diuerse consideration des ombres.

LE Soleil en diuerfes parties de la terre, iette des ombres bien diuerfes, pource que les corps, d'où procedent les ombres, sont opposées au Soleil bien diuersement en diuers endroits d'icelle. Qui a esté cause, que les Geographes ont obserué les ombres que le Soleil fait à midy, & par la diuersité de ces ombres, ont fait vne distinction des peuples, nommant les vns Amphisciens, les autres Heterosciens, & d'autres Perisciens.

DES AMPHISCIENS.

Les Amphisciens, sont ceux qui en diuers temps de l'année, ont à l'heure de midy, les ombres tantost du costé d'un pole, tantost de l'autre: ce qui arrive à ceux qui habitent en la Zone torride.

Ceux qui habitent en la zone torride en-



tre les tropiques,
ont deux ombres
diuerſes à midy en
diuers temps, &
par fois point. Car
quand le Soleil eſt
directemēt ſur leur
teſte, ce qui leur
arriue deux fois


l'an, lors les corps perpendiculaires n'ont
aucune ombre: Mais quand il quitte leur ze-
nith, & qu'il ſ'abbaiſſe vers les tropiques,
lors les ombres ſ'eſtendent deuers l'un ou
l'autre pole; & de là vient le mot Amphif-
cien, lequel ſignifie, qui a des ombres des
deux coſtez. Car *amphi*, ſignifie de part &
d'autre: & *ſcia*, ſignifie ombre.

*amphi
scien*

DES HETEROSCIENS.

Les Heteroſciens, ſont ceux qui tout le long
de l'année, ont à l'heure de midy touſiours les
ombres du coſté du pole qui eſt ſur leur horizon: ce qui
arriue à tous ceux qui habitēt aux zones temperées.


Ceux qui habitent en la zone temperée
Septentrionale, ont tout le long de l'an les
ombres à midy, vers le pole arctique: Et



ceux qui demeurent en l'autre zone tempérée, ont tout le long de l'année les ombres à midy vers le pole antarctique, & de là vient le mot heteroscien, lequel signifie, qui a les ombres d'un seul costé; car heteros, signifie vn, & scia, ombre.

DES PERISCIENS.

Les Perisciens, sont ceux à qui les ombres tournent en rond à l'entour d'un corps perpendiculaire: ce qui arrive à tous ceux qui habitent aux zones froides.



Pource que le Soleil est par fois vn iour, deux, trois, & plus, en ces quartiers-là sans se coucher, il est necessaire que l'ombre que fait vn corps perpendiculaire aux rayons du Soleil,

tourne en rond, puis qu'elle est tousiours opposée au Soleil, qui circuit au tour du corps opaque: Et de là vient le mot Periscien, lequel signifie, qui a les ombres circulaires: car *peri*, signifie au tour, & *scia*, ombre.

DE LA DIVISION DE la terre, par la diuerse situation des habitans.

LEs habitans de la terre, ont eu diuers noms, selon la diuerse situation qu'ils ont entr'eux. Car au respect du lieu où quelqu'un est, il appellera les vns Perieciens, les autres Anteciens, & les autres Antipodes, excepté quand on est sous l'equateur, ou sous les poles, où seulement il a des Antipodes, comme il se cognoistra aisément par les definitions suiuanes.

DES PERIECIENS.

L*Es Perieciens, sont ceux qui habitent sur mesme parallele & meridiem.*

Ils habitent donc en mesme zone, & mesme climat, ont la mesme esleuation de pole, les mesmes saisons de l'année quand & quād.



l'autre, mesmes augmentations de iours & nuicts. Mais quand l'un a midy, l'autre a minuit. Ils sont nommez Perieciens, c'est à dire, habitans à l'entour. Notez que les Perieciens qui habitent en la zone froide, ne peuuent auoir midy, quand les autres ont minuit : sinon lors que le Soleil court les parties du zodiaque, qui se leuent & se couchent.

DES ANTECIENS.

Les Anteciens, sont ceux qui habitent sur mesme moitié de meridiem, mais sur diuers paralleles, également distans de l'equateur.


Ils habitent donc en semblable zone, &

semblable climat , pour la temperature de l'air : car si les vns sont en la zone temperée Septentrionale , les autres sont en la zone australe temperee. Ont la mesme eslevation de pole, mais de pole diuers : Ont le midy ensemblement , mais les saisons contraires; c'est à dire, quand les vns ont l'Hyuer , les autres ont l'Esté, & sont dits Anteciens, quasi comme habitans en contraires regions. Notez que les Anteciens qui sont dans les zones froides , ne peuuent toutesfois auoir midy ensemblement , que quand le Soleil court les degrez du zodiaque, qui se leuent & se couchent.

DES ANTIPODES.

L*Es Antipodes, sont ceux qui sont distans entr'eux de tout le diametre de la terre.*

Ils habitent donc en semblable zone , & semblable climat , pour la temperature de l'air , comme les Anteciens. Mais sont toujours distans entr'eux de la moitié du circuit de la terre: ce qui n'arriue pas aux autres, qui sont tantost plus proches , tantost plus esloignez. Ils ont le iour quand les autres ont la nuit, l'Hyuer quand les autres ont l'Esté , le midy quand les autres ont minuiet, mesme



eleuation de pole, mais de poles diuers, & sont dits Antipodes, quasi pieds contre pieds. Ce que plusieurs des anciens toutes-fois n'ont peu croire, qu'il y eut des hommes qui leur fussent opposez de tout le diametre de la terre, les vns escriuant comme Plin, que c'est vne chose douteuse, & qu'il y a eu tousiours grande dispute entre les hommes de lettres, touchant ceste matiere: Les autres comme Lactance, le niant tout à plat: Les autres comme saint Augustin, ne le pouuant comprendre. Et de fait, ceste doctrine a esté tenue si absurde au commencement du Christianisme, que quelques Prelats furent estimez s'egarer du droit chemin, pource qu'ils tenoient qu'il y auoit des Antipodes.

Mais ceux qui ont circuy le monde comme Magelan, Drac, & Oliuier, en ont leuë toute la difficulté, estant vne chose vraye, que s'en estant allez vers le couchant, en fin ils sont retournez par le leuant.

DE LA DIVISION DE la terre, en longitude & latitude.

LEs Geographes ont encores distingué la terre en longitude & latitude, par le moyen de deux grands cercles; sçauoir, le meridien & l'equateur.

DE LA LONGITVDE ET latitude de la terre.

LA longitude de la terre, se prend d'Occident en Orient, la latitude de l'equateur aux poles.

Encore qu'en vn globe, on ne puisse pas plustost nommer d'un costé la longueur que la largeur, si est-ce que de tout temps on a compté la longitude d'Occident en Orient, & la latitude de l'equateur aux poles, pource que du temps des premiers qui ont fait la description des regions de la terre, la surface cogneuë s'estendoit bien plus loing d'Occident en Orient, que du Septentrion à Midy.

OV COMMENCE LA longitude & latitude.

LE commencement de la longitude, se prend au meridien des Isles fortunées, ou selon les modernes à celui des Isles azores. La latitude à l'equateur.

Pour determiner les longitudes, il a bien fallu mettre vn principe, pour commencer. Ptolomee l'a mis au meridien qui passe par les Isles fortunées, pource qu'on estimoit qu'il n'y auoit plus de terre au delà. Les nouueaux l'ont mis au meridien, qui passe par les Isles des Azores, pource que l'aiguille aimantée n'a sous ce meridien aucune variation, & qu'ils esperoient de pouuoir determiner les longitudes des lieux, par la declinaison de l'aiguille.

DE LA LATITVDE DES lieux.

LA latitude d'un lieu, est la distance qu'il y a entre le lieu & l'equateur.



D'autre la définissent en ceste façon : La latitude est l'arc d'un meridian, qui est compris entre le lieu & l'equateur, par laquelle définition ceux qui

sont sous l'equateur n'ont point de latitude.

DE LA LONGITVDE des lieux.

LA longitude d'un lieu, est la distance qu'il y a entre le lieu & le premier meridian.

D'autres la définissent en ceste façon : la longitude est l'arc d'un paralie compris entre le lieu & le premier meridian, par laquelle définition ceux qui habitent sous le premier meridian, n'ont point de longitude. Notez que les longitudes des lieux se peuvent estendre iusques à 360. degrez, mais la latitude seulement iusques à 90.

DES PARTIES DEXTRES
& fenestres du monde.

IL ne faut s'estonner s'il y a de la confusion à la determination de ces parties, à cause des diuerses considerations de ceux qui les y ont establies: Les Prestres & Augures du temps passé auoient leur face vers l'Orient, pendant qu'ils faisoient leurs sacrifices & dissections, qui est cause qu'ils appelloient l'Orient la partie anterieure du Ciel, l'Occident la postérieure: & par consequent, les parties Septentrionales sinistres, & les Meridionales dextres. Au contraire, les Poëtes tournoient la face vers le couchant, pource qu'ils auoient l'esprit tendu aux Isles fortunées, & disoient que l'Occident estoit la partie anterieure du Ciel, l'Orient la postérieure, le Septentrion la partie dextre, & le Midy la fenestre. Les Geographes qui sont attentifs à determiner la latitude des lieux, par l'elevation du pole; pour faire leurs chartes, disent, que l'Orient est la partie dextre du monde, l'Occident la partie fenestre: Ce qui a esté aussi l'opinion de Pythagore, Platon, & Aristote. Les Astronomes avec Empedocles & les Egyptiens, qui se sont addonnés à la recherche des mou-

uement des Cieux, pendant qu'ils sont tour-
nez vers le Midy, où le cours des Cieux y est
plus manifeste, disent au contraire des Geo-
graphes, & constituent l'Occident la partie
dextre du monde, & l'Orient la partie se-
nestre.



LIVRE V.

DE L'VSAGE DE LA Sphere.

L'Usage de la sphere presque de
tout temps n'a esté que pour sça-
voir, cognoistre les cercles que
l'on imagine au premier mobile.
En apres, on y a adiousté le Ciel du Soleil, qui
a ses poles attachez aux poles du zodiaque,
pour monstrier que son chemin ordinaire est
toujours sous l'ecliptique: & finalement le
Ciel de la Lune, qui tourne sur des poles di-
stans de ceux du Soleil environ de 5. degrez,
pour faire quelque demonstration des ecli-
psés. Nostre sphere, outre l'vtilité qu'elle a

commune avec les autres , a cela de particulier , qu'elle monstre la terre immobile au centre du monde , encore que les Cieux tournent à l'entour , & peut satisfaire à toutes ces propositions suivantes.

PROPOSITION I.

D*isposer la sphere selon les quatres parties du monde.*

Les quatres parties du monde sont l'Orient , l'Occident , le Septentrion , & le Midy , que les Mariniers appellent est , ou est , nord , & sud. Lesquelles sont trouuées en cette façon.

La sphere estant posée sur vne superficie plane & parallele à l'horizon , qu'elle soit tournée deçà & delà par son pied , iusques à ce que l'aiguille aymâtée de la petite buffole , soit droitement sur la ligne qui est au dessous d'elle , & lors la sphere sera disposée selon les quatres parties du monde. Et si on regarde sur l'horizon de la sphere , là où est escrit sud , de cemesme costé-là est le sud ou le midy à l'horizon du monde , & ainsi est-il de toutes les autres parties.

COROL.

COROLLAIRE.

PAr ceste methode vous ne trouuerez pas seulement les quatre parties principales, Midy, Septentrion, Orient, & Occident: mais aussi de quelle part de l'horizon sortent les 32. vens qui sont marquez tout à l'entour.

PROPOSITION 2.

Elleuer le pole de la sphere, selon l'inclination de quelque lieu.

L'inclination d'un lieu, est l'angle que fait l'axe du monde sur l'horizon, ou bien l'arc du meridiem compris entre l'horizon & le pole, que l'on nomme autrement esleuation de pole, laquelle est trouuée en ceste façon. Soit leué le pole de la sphere sur l'horizon du costé du Septentrion, iusques à ce qu'il y ayt autant de degrez compris entre le pole & l'horizon, que contient l'inclination du lieu: & lors le pole de la sphere sera esleué commela proposition le requiert. Comme si vous la vouliez esleuer pour l'inclination de Paris, qui est de 49. degrez, leuez le pole de la sphere sur l'horizon, du costé du nort

P

de 49. degrez, que conterez sur le meridiem:
& vous aurez le pole esleué selon l'inclina-
tion de la ville de Paris.

COROLLAIRE.

P Ar mesme methode, on disposera la
sphere selon la latitude du lieu, pource
que l'esleuation du pole & la latitude du lieu,
sont tousiours egales.

PROPOSITION 3.

Considerer quel est le mouuement du monde,
au respect de quelque lieu.

Le monde ne tourne pas à tous les habi-
tans de la terre de mesme façon, autrement
sement il à ceux qui ont la sphere droite, au-
trement à ceux qui l'ont oblique, ou paral-
lele. Si donc vous desirez considerer le mou-
uement du Ciel, au respect de quelque lieu,
Premierement, que la sphere soit disposée
selon les quatre parties du monde par la pre-
miere proposition, & que le pole soit esleué
par la seconde, selon l'inclination du lieu,
lors si vous faites tourner la sphere avec la
main d'Orient en Occident, vous considere-
rez aisément quel y peut estre le mouue-

ment du monde, qui est vne des gentilles considerations qu'on puisse auoir. Car non seulement l'horizon de la sphere est pour lors avec l'horizon du monde, mais le meridien d'icelle avec le meridien celeste, l'axe avec l'axe, & les poles vis à vis des poles du monde.

PROPOSITION 4.

Trouuer le lieu du Soleil au iour proposé.

Le lieu du Soleil est le degré de l'ecliptique où le Soleil est, lequel se trouue facilement, prenant sur l'horizon de la sphere le degré du zodiaque, qui est vis à vis de celui du iour; comme si ie veux sçauoir au dixiesme de Nouembre le lieu du Soleil, vis à vis du dixiesme de Nouembre sur l'horizon, est le 18. du Scorpion, pour le lieu du Soleil.

Que si on desire sçauoir à quel iour de l'année le Soleil sera en quelque degré du zodiaque: il n'y a qu'à chercher sur l'horizon le degré, & vis à vis on trouuera le iour demandé. Ainsi le Soleil entre au 10. du Belier le dernier iour de Mars.

PROPOSITION 5.

T Rouuer le nadir du Soleil.

Le nadir du Soleil, est le point du zodiaque, qui est opposé diametralement au Soleil : pour lequel trouuer soit mis le lieu du Soleil à l'horizon du costé d'Orient, & le nadir du Soleil sera au degré du zodiaque qui se couche : Ainsi quand le Soleil est au premier degré du Taureau, son nadir est au premier du Scorpion.

PROPOSITION 6.

T Rouuer les nouvelles Lunes des mois.

Sçachant l'epacte de l'année, cherchez la au cercle des epactes qui est sur l'horizon au mois proposé, & au iour qui est vis à vis sera la nouvelle Lune. Comme ie veux sçauoir ceste année 1627. quand nous aurons la nouvelle Lune de iuin, l'epacte de l'année sont 13. & vis à vis de 13. est le 14. de iuin : ie dis donc qu'au quatorziesme de iuin la Lune sera nouvelle.

COROLLAIRE.

DE là il sera aisé à trouuer les autres faces de la Lune, car 7. iours apres la nouuelle Lune sera le premier quartier, & 7. apres, pleine Lune, & 7. apres, dernier quartier.

PROPOSITION 7.

T*rouuer l'Orient du Soleil.*

Ce que nous appellons icy l'Orient du Soleil, les autres l'appellēt latitude Orientale, amplitude ortiue, qui est vn arc de l'horizon, compris entre le vray orient de l'equinexe, & le lieu d'où le Soleil se leue. Pour lequel trouuer, soit premierement la sphere à l'elevation du lieu. Secondement, le lieu du Soleil à l'horizon du costé d'Orient. Finalement, soient comptez les degrez de l'horizon, qui sont entre le lieu du Soleil & le vray Orient. Car d'autant de degrez sera l'Orient du Soleil: Ainsi quand le Soleil est au premier de l'Ecreuiffe, l'Orient du Soleil est de 37. degrez. Par la mesme methode, on trouuera l'Occident du Soleil, ou latitude Occidentale, en faisant l'operation du costé du couchant.

PROPOSITION 8.

Trouuer la hauteur du Soleil à midy.

La hauteur du Soleil à midy, est l'arc du meridien, compris entre l'horizon & le lieu du Soleil, laquelle se trouue en ceste façon. Soit premierement la sphere à l'esleuation du lieu. Secondement, soit mis le degré, où est le Soleil sous le meridien, & les degrez du meridien qui sont compris entre l'horizon & ledit degré, monstrent quelle est la hauteur du Soleil à midy. Ainsi à Paris, qui a 49. degrez d'esleuation, la hauteur du Soleil à midy est de 65. degrez, quand le Soleil est au premier degré de l'Ecreuiffe.

PROPOSITION 9.

Trouuer la declinaison du Soleil.

La declinaison du Soleil, est la distance qu'il a de l'equateur, ou l'arc du meridien, compris entre le lieu du Soleil & l'equateur: pour laquelle trouuer, soit mis le degré du Soleil sous le meridien, & soient comptez les degrez du meridien qui sont entre l'equateur & le lieu du Soleil. Car d'autant sera sa declinaison. Ainsi quand le Soleil est au der-

nier des Gemeaux , la declinaison du Soleil est de 23. degrez & demy.

PROPOSITION 10.

Trouuer la quantité des iours & nuicts artificielles.

La sphere estant à l'esleuation du lieu, soit mis le degré du Soleil à l'horizon du costé d'Orient, & le stile horaire sur 12. heures, puis la sphere soit tournée iusques à ce que le degré du Soleil soit au couchant : lors le stile horaire monstrera par le chemin qu'il a fait, de combien d'heures est le iour artificiel. Ainsi à Paris, quand le Soleil entre en l'Ecreuiffe, le iour artificiel est de 15. heures, & ce qui reste pour accomplir 24. heures, est la quantité de la nuit artificielle.

AUTREMENT ET PLUS
precisément.

Soit premierement la sphere à l'esleuation du lieu. Secondement, soit mis le degré du Soleil à l'horizon du costé d'Orient, & marqué le degré de l'equateur qui s'y trouue aussi. Tiercement, soit tourné la sphere vers l'Occident, iusques à ce que le lieu du Soleil

soit au couchant, & de rechef marqué le degré de l'equateur, qui pour lors se leue. Car les degrez de l'equateur, qui se sont leuez, compris entre les deux marques, determinēt la quantité de l'arc iournal du Soleil, lesquels si vous diuisez par 15. vous aurez la quantité du iour artificiel en heures. Ainsi à Paris, quand le Soleil entre en l'Ecreuiffe, l'arc iournal est de 238. degrez, lesquels diuisez par 15. donnent 15. heures & 58. minutes, pour la quantité du iour artificiel.

PROPOSITION II.

Trouuer le plus long iour de l'an.
 En la sphere oblique, iusques à l'eslevation de 66. degrez ou enuiron, il ne faut que par la precedente trouuer la quantité du iour artificiel, quand le Soleil est au premier de l'Ecreuiffe, qui est le 22. de Iuin. Mais il y a vne autre methode, par delà le 66. degré, pour ceux qui habitent aux zones froides, qui est telle. Soit disposée la sphere à l'eslevation de ces lieux-là, & qu'on obserue du costé du nort, combien il y a de degrez de l'ecliptique, qui en la reuolution de la sphere ne se couchent point. Car autant qu'il y en aura, d'autant de iours sera à peu pres le plus

long iour d'Esté : Ainsi à l'esleuation de 81. degré, où ont esté les Hollandois, le plus grand iour d'Esté dure quatre mois & demy, pource qu'il y a 135. degrez ou enuiron de l'ecliptique, qui en ceste position de la sphere ne se couchent iamais, & est necessaire que quand le Soleil les parcourt, qu'il luise tousiours sur leur horizon : De là on cognoistra la quantité de la plus longue nuit, qui tousiours est egale au plus grand iour.

AVTREMMENT PLUS FACILEMENT & GENERALEMENT.

LA sphere estant disposée à l'esleuation du lieu, qu'on regarde sur le meridien de la sphere, où est la description des paralleles des iours, & on trouuera ioignant l'horizon du costé du sud, la quantité du plus grand iour : Ainsi ayant esleué la sphere de 81. degré, on voit ioignant l'horizon 4. mois & demy, pour la quantité du plus grand iour.

PROPOSITION 12.

TRouuer en quel climat & parallele, chaque region est, de laquelle l'esleuation est cogneüe.

Soit la sphere disposée selon l'eslevation du lieu, & vous verrez sur le meridien, ioignant l'horizon du costé du nort, en quel climat & parallele, la region estoit située selon les anciens: & du costé du sud, en quel climat & parallele elle est, selon les nouveaux. Ainsi ceux qui ont 49. degrez d'eslevation, comme Paris, estoient au septiesme climat & 14. parallele, selon les anciens: & sont à la fin du huitiesme climat ou 16. parallele, selon les nouveaux.

PROPOSITION 13.

T Rouuer à quelle heure le Soleil se leue & se couche.

Soit la sphere disposée à l'eslevation du lieu, puis soit mis le degré du Soleil sous le meridien, & le stile horaire sur 12. heures, & soit tourné la sphere du costé d'Orient, iusques à ce que le degré du Soleil soit en l'horizon, & le stile horaire monstrera l'heure du leuer du Soleil. Que si le lieu du Soleil est porté en Occident, le stile monstrera à quelle heure il se couche. Ainsi à l'eslevation de 49. degrez, quand le Soleil est au premier des Gemeaux: le Soleil se leue à 4. heures & demie, & se couche à 7. & demie.

AUTREMENT ET PLUS
precisément.

PRemierement, soit disposée la sphere à l'esleuation du lieu. Secondement, soit mis le lieu du Soleil à l'horizon du costé d'Orient, & marqué le degré de l'equateur qui se leue quand & luy, puis soit tourné la sphere, iusques à ce que le lieu du Soleil soit au meridien, & soient comptez les degrez de l'equateur qui se sont leuez. Et iceux estant diuisez par 15. monstrent combien il y a d'heures entre le Soleil leué & le Midy; d'où on colligera aisément à quelle heure le Soleil se leue.

PROPOSITION 14.

T*Rouuer quel degré du Soleil se leue & couche, avec vne estoille du zodiaque.*

La sphere estant située, selon l'esleuation du lieu, soit mise l'estoile en l'horizon du costé d'Orient, & le degré du Soleil qui se trouuera en l'horizon en mesme temps, sera celuy avec lequel elle se leue. Et si on fait la mesme operation du costé del'Occident, on verra avec quel degré elle se couche. Ceste proposition sert pour le prognostique du changement du temps.

PROPOSITION 15.

Trouuer à quelle heure se leue ou couche vne estoille du zodiaque tous les iours, & de quelle partie de l'horizon.

La sphere estant située selon l'esleuation du lieu, soit mis le degré où est le Soleil sous le meridien, & le stile sur 12. heures: puis soit tournée la sphere, iusques à ce que l'estoille soit en Orient, & le stile monstrera à quelle heure elle se leue; & le degré de l'horizon, qui est vis à vis de quel endroit. Que si la mesme operation se fait du costé de l'Occident, on sçaura à quelle heure & en quel endroit elle se couche. Ceste proposition sert grandement à les cognoistre.

PROPOSITION 16.

Trouuer quelle heure inegale il est, de iour & nuict.

L'heure inegale de iour, est la douziesme partie du iour artificiel: & l'heure inegale de nuict, est la douziesme partie de la nuict artificielle: pour laquelle trouuer, qu'on prenne par la 10. proposition l'arc iournal du iour proposé; c'est à dire, les degrez de l'equateur,

qui montent sur l'horizon, entre le leuer & coucher du Soleil. Puis qu'ils soient reduits en minutes, les multipliant par 60. & apres soit diuisé le produit par 12. & le quotient donnera la quantité de l'heure inegale du iour. Finalement, soient reduites en minutes les heures egales, depuis le leuer du Soleil iusques à l'heure presente; & le produit estant diuisé par la quantité de l'heure inegale trouuee, le quotient monstrera quelle heure inegale il est.

On fera la mesme chose de nuit, en diuisant la quantité de la nuit en 12. parties egales: puis ayant compté les heures depuis le coucher du Soleil iusques à l'heure qu'il est, & les ayant reduites en minutes, on les diuifera par la quantité de l'heure inegale de nuit, & le quotient monstrera quelle heure inegale il est.

AVTREMMENT ET PLUS facilement.

SOit obserué premierement combien d'heures egales se sont escoulées, depuis le Soleil leué (si on desire cognoistre l'heure inegale de iour) ou depuis le Soleil couché, (si l'on veut scauoir quelle heure inegale il est

de nuit.) Secondement, combien d'heures egales contient le iour ou la nuit artificielle. Car cela estant cogneu, on reduira les heures par ceste regle. Comme les heures egales du iour artificiel sont à 12. heures inegales, ainsi les heures qui sont escheuës depuis le leuer ou coucher du Soleil, sont à l'heure inegale requise. Exemple: Je veux sçauoir à Paris, le 20. Iuin, à 3. heures apres midy, quelle heure inegale il est pour ce faire, d'autant que depuis le leuer du Soleil iusques à 3. heures, il y en a 11. Et que le iour artificiel en ce temps-là contient 16. heures. Je collige par la regle de trois, si 16. heures egales donnent 12. heures inegales, que donneront 11. heure egales? Le quatrième proportionnel donnera $7\frac{1}{2}$. & par tant à trois heures apres midy, ce sera encore la huitiesme heure inegale.

PROPOSITION 17.

Trouuer quel planete domine à toutes les heures inegales de iour & de nuit.

Les Babyoniens ont tant estimé la domination des planetes, qu'ils ont appelé les iours de la sepmaine des noms des planetes: Lundy, à cause de la Lune: Mardy, de Mars: Mercredy, de Mercure: Ieudy, de Iupiter:

Vendredy, de Venus : Samedy, de Saturne :
Dimanche, du Soleil : & disoient que les
planetes dominoient les vns apres les autres,
d'heure en heure inegale, qui a esté cause,
que donnant la premiere heure du Sabat à
Saturne, la seconde à Iupiter, la troisieme
à Mars, & ainsi consecutiuelement selon l'or-
dre des planetes, il arriue qu'apres auoir
compté 24. heures, & donné chaque heure
inegale à chaque planete, la 25. appartient
au Soleil, & ainsi apres le Samedy vient le
Dimanche, ou iour du Soleil. Et par mes-
me raison, apres auoir de rechef compté 24.
heures, & les auoir distribuees à chaque pla-
nete, apres le Dimanche vient le iour de la
Lune, ou le Lundy, & apres le Lundy le
Mardy. On trouuera donc quel planete do-
mine, sçachant par la precedente quelle heu-
re inegale il est. Car si la premiere heure de
Mardy appartient à Mars, la seconde sera
pour le Soleil, la troisieme pour Venus, la
quatrieme pour Mercure, la cinquiesme
pour la Lune, la sixiesme pour Saturne, se-
lon l'ordre des planetes.

PROPOSITION 18.

Trouuer l'ascension droite du Soleil.

L'ascension droite du Soleil est le degré de l'equateur, qui se leue quand & luy en la sphere droite, pour laquelle trouuer, soit mis le degré de l'ecliptique où est le Soleil sous le meridiem (car tous les meridiens sont horizons droits) & le degré de l'equateur, qui en mesme temps se trouuera au dessous, sera l'ascension droite du Soleil. Ainsi le Soleil estant au commencement du Taureau, aura vn ascension de 28. degrez, d'autant que le 28. degré de l'equateur se leuera quand & luy en la sphere droite.

PROPOSITION 19.

Trouuer l'ascension oblique du Soleil.

L'ascension oblique du Soleil, est le degré de l'equateur, qui se leue quand & luy en la sphere oblique. Pour laquelle trouuer soit premierement esleué le pole selon le lieu, puis mis le degré de l'ecliptique, où est le Soleil en l'horizon, du costé d'Orient; & le degré de l'equateur, qui en mesme instant s'y trouuera, sera l'ascension oblique du Soleil.

Soleil. Ainsi à Paris, le Soleil estant au commencement du Taureau, son ascension oblique sera de 15. degrez, à cause du 15. degre de l'equateur, qui se leue quand & luy en ceste obliquité de sphere.

COROLLAIRE.

AV contraire, le degre de l'equateur qui descend, ou se couche en l'horizon oblique, est la descente oblique du degre de l'ecliptique & du Soleil, que l'on trouuera facilement, faisant l'operation du costé du Soleil couchant.

PROPOSITION 20.

T*Rouuer les ascensions & descentes des signes.*

L'ascension d'un signe, comme nous auons dit cy-deuant, est le temps qu'il est à monter sur l'horizon, comme la descente, le temps qu'il est à descendre au dessous: & les signes sont dits monter droitement, quand ils sont plus de deux heures à se leuer; & au contraire monter obliquement, quand ils sont moins de deux heures: Si donc on desire sçauoir l'ascension d'un signe, soit mis le commencement du signe à l'horizō (la sphere

re estant à l'elevation du lieu, & le stile horaire sur 12. heures) & soit tournée la sphere, iusques à ce que le signe soit entierement leué, lors le stile horaire monstrea le temps qu'il est à se leuer: que s'il est plus de deux heures, il se leue droitement, si moins, obliquement.

On en fera de mesme du costé d'Occident, pour cognoistre les descentes des signes, & qui sont ceux qui descendent droitement, & ceux qui descendent obliquement.

Si on veut vne plus grande precision, on obseruera les degrez de l'equateur, qui se leuent & se couchent quant & eux.

PROPOSITION 21.

T*rouuer l'ascendans ou horoscope d'une natiuité.*
 L'ascendant d'une natiuité est le signe qui à l'heure de la naissance, monte sur l'horizon, qui autrement est dit horoscope. Et pour le trouuer, soit disposée la sphere à l'elevation du lieu où s'est fait la natiuité: puis soit mis le degré où le Soleil est, sous le meridiem, & le stile horaire sur 12. heures, & soit tournée la sphere, iusques à ce que le stile horaire soit iustement à l'heure que s'est faite la naissance: & en l'Orient, apparaitra le signe ascendant ou horoscope.

Ainsi le 22. de Iuin, à Paris, vne natiuité s'estant faite, à 7. heures du matin, a pour ascendant le signe du Lyon.

PROPOSITION 22.

MArquer sur le zodiaque de la sphere le lieu des planetes.

Qu'on cherche dans les Ephemerides le lieu des planetes, & ayant trouué en quel degré des signes ils sont, qu'on applique sur le zodiaque de la sphere des petitis morceaux de cire aux mesmes endroits, lesquels representeront le lieu des planetes. Cecy seruira pour les deux propositions suivantes.

PROPOSITION 23.

Cognoistre les planetes de Saturne, Iupiter, Mars, Venus, & Mercure.

Par la precedente, soit premierement marqué sur le zodiaque le lieu des planetes, que l'on desire cognoistre au Ciel, avec des petits morceaux de cire. Puis ayant disposé la sphere selon les parties du monde, & esleué le pole selon le lieu, soit mis le degré du Soleil sous le meridiem, & le stile sur 12. heures, En apres, soit tourné la sphere, iusques à ce que

ree quand elle y est arriuee: de là descendant vers le couchant, la mer décroist, de sorte que quand la Lune est en l'Occident, la marée est au plus bas: mais aussi tost qu'elle quitte l'horizon du couchant, & que par dessous la terre elle s'auance vers le meridien, de rechef la marée croist, & est pleine marée quand elle y est arriuee. Finalement, quittant le meridien, les eaux décroissent tousiours, iusques à ce qu'elle arriue à l'horizon. Ce qu'estant cogneu, il est aisé de sçauoir par la sphere, à quelle heure la mer va & vient en ceste façon.

Soit la sphere à l'elevation du lieu, le degré du Soleil sous le meridien, & le stile horaire sur 12. heures, puis soit tournee la sphere, iusques à ce que le lieu de la Lune, marqué par vn petit morceau de cire, soit en Orient, ou Occident, & le stile horaire monstrea à quelle heure la marée est basse, & qu'elle commence à venir. Que si on tourne la sphere, iusques à ce que le lieu de la Lune soit sous le meridien, tant sur terre, que sous terre, le stile horaire monstrea l'heure que la marée est toute pleine, & qu'elle commence à s'en aller.

F I N.

Fautes à corriger.


P Age 10. ligne 3. lisez axe. pag. 18. l. 11. lisez semble.
 pag. 49. l. 15. lisez Orientale. pag. 62. l. 9. lisez loing.
 pag. 63. l. 7. lisez ceux-là. pag. 91. l. 6. lisez copernic. pag.
 113. l. 1. lisez descendante. pag. 130. l. 27. lisez le couchant.
 pag. 140. l. 10. lisez Solaire. pag. 152. l. 16 lisez signes. pag.
 168. l. 14. lisez avant le iour. pag. 173. l. 4. lisez se fait. pag.
 176. l. 24. lisez instrument. pag. 180. l. 13. lisez conuexité.
 pag. 213. l. 14. lisez quand il est.



July 10. 1811

1016 [BOULENGER, Jean, *Lecteur du Roi*] TRAICTÉ de la SPHERE du MONDE, avec l'Usage
dicelle, 2^e Edition, augmentée par l'Auteur; *with numerous woodcuts*, 12mo. hf. calf (rare),
158 1628

Unknown to Pogendorf and other bibliographers.



E628
B763t

157

157

